

# O Laasaga Ia Keriso

Mataupu I—O Le Alofa o le Atua mo tagata.....	1
Mataupu E II—E Tatau Ona Maua Keriso e le Tagata Agasala.....	31
Mataupu E IV—O le Faaali Atua o Agasala.....	114
Mataupu E V—O le Faapaiaina o le Olaga.....	133
Mataupu E VI—O le Faatuatua Ma le Taliaina.....	158
Mataupu E VII—O le Tofotofoina o le Ua Fia Avea ma Soo....	186
Mataupu E VIII—O le Tupu a'e ia Keriso.....	223
Mataupu E IX—O le Galuega ua Tatou Feagai ai i le Olaga Nei....	258
Mataupu E X—O Ala e Mafai Ona Iloa ai le Atua.....	288
Mataupu E XI—O lo Tatou Tofi o le Tatalo.....	318
Mataupu E XII—O le Mea e Faia i le Masalosalo.....	369
Mataupu E XIII—Ia Olioli i le Alii.....	407

<https://m.egwwritings.org/sg>

# Mataupu I—O Le Alofa o le Atua mo tagata

Ogaluega a Ona aao ma faaaliga  
mai Lona Agaga, ua molimau  
faatasi ia e ta'utino mai ai le alofa  
o le Atua. O lo tatou Tamā o i le  
lagi, o Ia o le puna o le ola, ma le  
poto, atoa ma le olioli. Se'i tatou  
vaai atu i le matagofie ma le uiga  
'ese o Ana galuega. Se'i tatou  
mafau i le feagai lelei ma le  
faatatau tonuina o mea uma ua  
Na faia i mea e ao ina maua mo le  
tausiga, atoa foi ma mea e tusa  
ma le fiafiaga mo tagata, faapea  
foi ma mea ola. O le la ma le timu

o loo faafiafiaina ai ma  
faalafulemūina ai le laueleele, ma  
mauga, ma le sami, ma fanua  
laugatasi, o mea uma ia ua faaalia  
mai ai ia i tatou le alofa o Lē na Ia  
faia i latou. O le Atua lava o loo  
Ia faamalieina mana'oga o Ana  
mea ola uma, e pei ona molimau  
mai Tavita i se tasi o ana  
salamo:—

“E faasaga atu ia te oe mata o  
mea uma lava;  
E te avatua foi a latou mea e 'ai i  
ona aso e tatau ai.  
O loo e faamafola lou aao,

Ma faama'ona le mana'o o mea  
ola uma lava.”

Sa atoatoa le paia ma le fiafia o le  
tagata ina ua faia o ia e le Atua. O  
le lalolagi matagofie foi e pei ona  
tuuina mai i aao o Lē na Na faia,  
e le'i aliali mai ai lava sina ila o le  
iuvale, po o sina ata o le  
faafanoga. A e peitai o le soliga o  
le Tulafono a le Atua—le  
Tulafono o le alofa —o lea ua oo  
mai ai nei le ōi ma le oti. A e ui  
lava ina o loo vevela nei le tigaina  
ona o le tau'i o le agasala, a e o loo  
aliali mai pea lava le alofa o le

Atua. Ua tusia, na faafanoina le  
eleele e le Atua ona o le tagata.  
Ua i ai laau tuitui ma laau  
talatala, o mea faigatā ma  
tofotofoga, ua avea ai nei le olaga  
o le tagata ma olaga puapuagatia  
i galuega ma le vao mea e mafatia  
ai le loto ma le mafaufau. A e  
peitai ua atofaina foi ia mea ina ia  
maua ai se lelei o le tagata; auā o  
le tasi foi lea vaega o le a'oa'oga  
tatau e tusa ma le faatatauga poto  
a le Atua mo le toe fia atiina a'e o  
le tagata mai le malaia ma le  
faate'aga ua oo mai ona o le  
agasala. E ui lava ina ua pa'ū le

lalolagi, a e le o matuā ufitia e le faanoanoa ma le pagātia. Ua aliali mai lava i galuega a le Atua ni faaaliga tāua o le faamoemoe ma le faamafanafanaga. Ua i ai fugālaau i laau talatala, a o laau tuitui foi ua ufitia i fugālaau matagofie.

Ua tusia i fua mātala uma ma mutia lau olaola uma ia nei upu, “O le Atua, o le alofa lava ia.” Ua tausani le vānimonimo i pese fiafia a manu felelei matagofie; o fugālaau lanu eseese matagofie ua sasala atu lo latou manogi; a o

laau mafalā o le vao ua latou  
faaali mai le vaaiga manaia—o  
mea uma ia ua molimau i le  
tausiga alofa ma le tausiga  
faa-Tamā a lo tatou Atua, ma ua  
mautinoa ai foi Lona finagalo  
alofa ina ia fiafia Lana fanau.

O le uiga ma le amio a le Atua, ua  
faaalia mai lea i Lana Afioga. O Ia  
lava ua Na ta'utinoina mai Lona  
alofa lē mafuatia ma Lona alofa  
mutimutivale. Ina ua talosaga atu  
Mose, “Ia e faaali mai ia te a'u lou  
mamalu,” na tali mai le Alii, “Ou  
te faaui atu lo'u lelei uma i ou

luma.” O Lona mamalu lava lea,  
o Lona agalelei. Na afio ane le  
Alii i luma o Mose ma Na faapea  
atu, “O Ieova, o Ieova, o le Atua  
alofa mutimutivale ma le alofa  
fua, e telegese lona toasa, a e tele  
le alofa ma le faamaoni; o lē tausī  
le alofa e oo atu i afe o tupulaga;  
o lē faamagalo foi i le amioletonu  
ma le solitulafono ma le agasala.”  
O Ia “e telegese lona toasa, a e  
tele lona alofa,” “auā e fiafia o ia i  
le alofa.”

Ua noatia e le Atua o tatou loto ia  
te Ia i faailoga e le mafaitaulia o i

le lagi ma le lalolagi. Na te fia faailoa mai foi o Ia ia i tatou i Ana galuega loloto o loo siomia ai le lalolagi; a e le o matuā mae'a mai ai le faaaliga o Lona alofa ia i tatou. A e ui lava ina o loo aliali mai Lona agalelei i nei faamatalaga e tele, a ua faatauasoina pea mafaufauga o tagata e toatele e le fili, ua latou vaai a'e ai pea i le Atua ma le fefe, ma ua latou manatu ai o le Atua o se Alii sauā, ma o se Alii Na te le faamagalo atu. Ua ta'ita'iina e Satani manatu o tagata ina ia latou faapea ifo, o le Atua o se

Alii e tasi Lona uiga tumau, o Ia o se faamasino sauā ma sē e le mafai ona faamagalo atu. Ua faapea ona faia e Satani o le faatusa o sē o loo lamalama vale i 'aleu ma sesē o tagata, ina ia faataunuuina atu ai Lana faamasinoga ia te i latou. I le o le mea lava lea na afio mai ai Iesu e mau faatasi ma tagata, ina ia tafia 'ese ai le ao uliuli o mafaufauga sesē faapea, a ia faaalia mai i le lalolagi le alofa le mafuatia o le Tamā.

Na afio mai le Alo o le Atua mai le lagi ia Na faamalamalamaina mai le uiga o le Tamā. “E le'i vaai lava le Atua e se tasi; o le Alo e toatasi o loo i le fatafata o le Tamā, o ia ua na faailoa mai o ia.” “E leai foi se tasi ua iloa le Tamā, ua na o le Atalii, ma sē ua loto le Atalii e faaali atu i ai.” Ina ua faailoa atu ia Iesu le mana'o o le tasi o le 'au soo e faapea, “Ia e faailoa mai le Tamā ia te i matou,” na tali atu ai le Alii, “Filipo e, ua loa ona ou i ai ia te outou, a e te le'i iloa ea a'u? O lē ua vaai mai ia te a'u, ua vaai o ia i

le Tamā; pe se a foi e te fai mai ai,  
Faailoa mai le Tamā ia te i  
matou?”

Ina o faamatalaina e Iesu le uiga o  
Lana galuega na ala ai ona Ia afio  
mai i lenei lalolagi, na Ia fetalai  
mai ai, “Ua i o'u luga le Agaga o  
le Alii, auā ua na faauu mai ia te  
a'u e folafola le tala lelei i e  
matitiva; ua 'auina mai a'u e ia e  
faamalolo i e loto momomo, e  
tala'i le sa'olotoga i le tafeaga, ma  
ia pupula mata o e tauaso, e tuu  
sa'oloto i e ua sauāina.” O Lana  
lava lea galuega. Sa femaliuai o Ia

ma agalelei atu ma faamalolo atu  
i e na faapuapuagāina e Satani. Sa  
i ai lava nisi aai ato'atoa na le toe  
faalogoina ai le leo o le ōi mai  
faama'i ina ua afio ane i ai Iesu  
ma Na faamaloloina o latou  
tagata mama'i uma lava. Sa  
molimau Ana galuega ia te Ia, o  
Ia lava Lē na faauuina e le Atua.  
Sa faapea lava ona faaalua o le  
alofa, ma le tigā alofa, ma le alofa  
mutimutivale i galuega uma o  
Lona soifuaga. Sa faasaga atu le  
alofa naunau o Lona finagalo i le  
fanau a tagata. Na faaeeina atu ia  
te Ia le uiga o i tatou tagata, ina ia

mafai ai e Ia ona lagona o  
mana'oga ma faanaunauga uma  
faaletagata. O e aupito matitiva  
ma le faatauva'a, sa le matata'u i  
latou e o' atu ia te Ia. E oo lava foi  
i tamaiti, sa fia o' ane i latou ia te  
Ia. Sa fiafia i latou e fe'a'ei a'e i  
Ona aao ma matamata atu i Ona  
fofoga poto ua tumu i le alofa.

Sa le 'alo lava Iesu i le faaaliga o  
se upu moni e tasi, a e sa Ia  
faailoa atu lava ma le alofa. Sa ia  
te Ia le matua faautauta lelei, ma  
sa Ia mataala ma le alofa i Lana  
galuega ma Ana fesootaiga uma

ma tagata. Sa ia te Ia pea le āva;  
sa le soona fetalai o Ia i se upu  
malosi; Na te le'i soona faatigā  
atu foi i se agaga te'ite'i vale. Sa Ia  
onosai i itu e vaivai ai le uiga  
faaletagata. Sa Ia ta'utino atu le  
upu moni ma le faamaoni, a e sa  
faia pea lava ma le alofa. Sa Ia  
matuā a'oa'i atu i le uiga faatagā  
fai, ma le lē talitonu, ma le  
solitulafono; a e sa i ai loimata I  
Ona fofoga a o fetalai atu o Ia i  
upu a'oa'i.

Sa tutulu o Ia ona o Ierusalema, le  
aai sa alofagia e Ia, a e sa le

taliaina o Ia e ona tagata. Sa latou  
teena o Ia, Lē ua avea o le Ala, ma  
le Upu Moni, ma le Ola, a e ui  
lava i lea, sa silasila atu pea lava o  
Ia ia i latou ma le finagalo alofa.  
Sa le usiusitai o Ia ia te Ia lava, a e  
sa sili ona faaeteete o Lona  
finagalo mo le ola o nisi. Sa tāua  
tagata uma lava i Lana silafaga.  
Sa ia te Ia pea le mamalu faale  
Atua, a e sa ifo atu lava o Ia ma le  
finagalo maualalo, atoa ma le  
faaaloalo lelei, i tagata uma o le  
aiga o le Atua. Sa avea tagata  
uma i Lana silafaga ma ē ua  
faatoilaloina e le fili, ma o Lana

feau lea na Ia afio mai ai, o le fia faaolaina o i latou.

O le uiga lava lea o Keriso e pei ona faaalia mai i Lona soifuaga. O le uiga foi lea o le Atua, le Tamā. E mai le finagalo lava o le Tamā o loo tafe mai ai le alofa tunoa i le fanau a tagata e pei ona faaalia i le soifuaga ma le galuega a Keriso. O Iesu, le Faaola agalelei ma le alofa mutimutivale, o Ia lava o le Atua, a “ua faaalia mai i le tino tagata.”

O le fia laveaiina o i tatou na liu tino tagata ai Iesu, ma faapuapuagāina, ua oo lava ina maliu. Na avea lava o Ia ma “Tagata o faanoanoaga” ina ia avea ai i tatou ma ē mautofi i le fiafiaga e faavavau. Ua tuuina mai e le Atua Lona Alo pele e toatasi, Lē ua tumu i le alofa tunoa ma le faamaoni. Na tuua e Ia le lagi, o Lona afioaga paia lea o i ai le pupula tele ma le mamalu e le mafaamatalaina, a ua afio ifo i le lalolagi ua faaleagaina ma faafanoina e le agasala, ma ua faapouliuligiaina e le ata o le oti

ma le faafanoga. Na tonu lava i le Atua, o le a te'a 'ese mai Lona Alo pele mai Lona fatafata alofa; te'a 'ese mai viiga a le 'au agelu, ina ia faafeagai o Ia ma le faalumaina e tagata, upu leagaina, faaleagaina, inosia, ma le maliu. “O le a'oa'iga e filemu ai tatou sa i ona luga lea, o ona faalavalava foi ua malolo ai tatou.”

Faauta ia te Ia ua i le vao, ua i Ketesemane, i luga o le satauro. Ua aapa mai le Alo lē ponā o le Atua Na te amoina le avega o le agasala. Sa mafuta o Ia ma le

Atua, a ua Na lagona fua le leaga matuitui o le vāvāmamao o le Atua ma tagata talu le agasala. O lea na pa'ū mai ai ia te Ia lenei alaga o le mafatia, “Lo'u Atua e, lo'u Atua e, se a le mea ua e tuulafoai mai ai a'u.” O le avega mamafatū o le agasala, ma le finagalo mafatia ona o Lona mautinoa lelei o le uiga mata'utia o le agasala i lona faate'a 'eseina o agaga mai lo latou Atua—o mea uma ia na momomo ai le finagalo o le Alo o le Atua.

A e peitai e le'i saunia lenei  
taulaga tele ma le t̄aua ina ia  
faatupuina ai le alofa mo tagata i  
le finagalo o le Tamā, pe ina ia  
faatupuina ai i le finagalo o le  
Atua se fia laveaiina o i latou. E  
leai, leai lava! “Auā ua faapea ona  
alofa mai o le Atua i le lalolagi,  
ua ia 'au mai ai lona Atalii e  
toatasi.” Ua alofa mai le Tamā ia i  
tatou e le ona o le taulaga tele ua  
Ia saunia; a e peitai na ala ona Ia  
saunia o le taulaga ona o Lona  
alofa tele ia i tatou. Ua avea  
Keriso ma ala ua liligi ifo ai le  
alofa tunoa o le Atua i le lalolagi

ua pa'ū. “Sa ia Keriso le Atua, ua faaleleia e ia le lalolagi ia te ia.”

Na tigāina lava le Tamā faatasi ma Lona Alo. O le afutoto i Ketesemane ma le maliu i Kolokota, o le tau faigatā lava lea ua faatauina mai a'i lo tatou sa'olotoga e le alofa lē mafaamatalaina faale Atua.

Ua fetalai mai Iesu, “O le mea lea e alofa mai ai le Tamā ia te a'u, auā ou te tuuina atu lo'u ola, ina ia ou toe au mai ai.” O lona uiga o lea fetalaiga, “Ua faapea ona tele o le alofa o le Atua ia te

outou le fanau a tagata, ua faateleina ai foi ma Lona alofa ia te A'u, talu ai ona ua ou tuuina atu Lo'u ola e fai ma Sui o outou. Talu ai ona ua avea A'u ma outou Sui, ma outou Malu, i le tuuina atu o Lo'u ola mo outou, ma lo'u tau'aveina o a outou soligātulafono, o lea ua atili ai ona noatia o a'u i noataga o le alofa i Lo'u Tamā; auā o le avea o A'u e fai ma Taulaga, ua faaalitoina mai ai le amiotonu a le Tamā, ina ia iloa ai o Ia o Lē amiotonu, ma ua

ta'uamiotonuina e Ia lē ua  
faatuatua ia Iesu.”

E leai se tasi, a ua na o le Alo lava  
o le Atua ua Na mafaia ona  
galueaiina o lo tatou faaolataga;  
auā ua na o Ia, Lē sa i le fatafata o  
le Tamā, Na te mafaia ona  
faamatala mai o Ia. Na o Ia lava  
Na te mafaia ona faamaninoina le  
maualuga ma le loloto o le alofa o  
le Tamā. E leai lava se tasi mea, a  
ua na o le taulaga tāua ua saunia  
e Keriso ina ia toe faatuina mai ai  
le tagata ua pa'ū, ua na o lea ua  
mafai ona faamatalaina ma

faamaninoina ai le alofa tele o le Tamā mo le fanau a tagata ua le iloa.

“Ua faapea ona alofa mai o le Atua i le lalolagi, ua ia au mai ai lona Atalii e toatasi.” E le gata ina ua tuuina mai e le Tamā Lona Alo ina ia mau o Ia faatasi ma tagata, ma ia maliu o Ia o le taulaga mo i latou, a ua matuā iloga lava ona foaiina mai o Ia mo le fanau ua goto ifo i le lua o le malaia. Sa uiga faatasi o Ia ma i tatou i mea uma lava. O Lē sa tasi ma le Atua, a ua sosoo nei o Ia ma le

fanau a tagata i noataga e le mafai  
ona toe motusia. E le mā Iesu “e  
ta'ua i latou o ona uso.” O Ia o la  
tatou Taulaga, o lo tatou  
Puluvaga, ma lo tatou Uso. O loo  
Ia tau'aveina foliga o i tatou  
tagata i luma o le nofoālii o le  
Tamā, i le o le a le toe tete'a 'ese  
lava o Ia ma le fanau a tagata o e  
ua Ia laveaiina. E oo lava i le  
faavavau, o Ia lava o le Atalii o le  
tagata. Ua faia nei mea uma ina ia  
mafai ona toe siitia a'e ai le tagata  
mai le faafanoga ma le malaia ua  
galueaiina e le agasala, ina ia toe  
maua ia te ia foliga o le Atua

alofa, ma ia toe lagona ai e ia le olioli e tupu mai i le olaga ua ō gatasi ma Lona finagalo paia.

O le tau na togia mo lo tatou faaolataga, o le taulaga tele lava lea na saunia e lo tatou Tamā faalelagi i Lona tuuina mai o Lona Alo e maliu mo i tatou, o lea ua tatau ona tatou mautinoa lelei ai o le tulaga maualuga ua faaavanoaina e Keriso mo i tatou. Ina ua mafaufau le aposetolo o Ioane i le maualuga, ma le loloto, ma le lautele o le alofa o le Tamā i le fanau ua tanumia i le malaia,

na faatumuina ai lona loto i le viiga ma le āva tele. Ona ia le maua ai lea o ni upu e faaalia ai le tele ma le mutimutivale o lenei alofa, a ua ia valaau atu i le lalolagi se'i o latou vaai atu i ai, "Faauta i le silisili o le alofa ua foaiina mai e le Tamā ia te i tatou, ina ua ta'ua i tatou o le fanau a le Atua!" Ua matuā tāua tele lenei avanoa ua saunia mo le fanau a tagata! O le solitulafono e avea ai i latou ma fanau a Satani. A o le faatuatua i le togiola ua saunia e Keriso e mafai ona toe avea ai le fanau a Atamu ma fanau a le

Atua. O Lona liu tino tagata ua  
matuā siitia a'e ai e Keriso le  
tulaga oi tatou le fanau a tagata.  
O e ua pau'ū, ua oo nei i latou i le  
tulaga ua mafai ai ona toe  
faaigoaina i latou i lenei igoa  
tāua, “o le fanau a le Atua” talu ai  
lenei fesootaiga ma Kariso.

Ua leai sona tusa o lenei alofa! O  
le fanau a le Tupu o le lagi! O se  
folafolaga tāua! O se faamatalaga  
loloto i matematega o le ola.  
Faauta i le alofa le mafaatusaina o  
le Atua i le lalolagi sa le alofa ia te  
Ia. O se manatu lava lenei e

faa'augofieina ai le agaga, ma o le  
a gaua'i atu ai le mafaufau e avea  
ma pagotā i le finagalo o le Atua.  
A o tatou o sailiili atu pea i uiga  
ma amioga faale Atua e pei ona  
faamalamalamaina mai i le  
satauro, o le a tatou mautinoa  
atili pea lava le agaalofa, ma le  
alofa mutimutivale, ma le  
faamagaloga ua faia i le  
amiotonu. O le a atili ai foi ona  
pupula ia i tatou le manomanō o  
molimau i le alofa e le fai tuāoi  
ma e le mafuatiaina, ma le alofa  
mutimutivale e sili mamao atu

lava i le alofa naunau o se tinā mo  
sana tama ua sē 'ese ma ia.

## Mataupu E II—E Tatau Ona Maua Keriso e le Tagata Agasala

Na matuā tuuina atu lava i le tagata i le amataga o uiga tāua ma le mafaufau sa'o. Sa malosi atoatoa lona tino, ma sa ō gatasi ona mana'o ma le finagalo o le Atua. Sa mamā ona mafauauga, ma sa paia mea sa faatatau i ai ona manatu. Peitai, ona o le lē usitai, ua faaleagaina ai ona uiga tāua, ma ua liua ai le alofa i le manatu faapito o le tagata ia te ia lava. Talu ai le agasala, ua matuā vaivai ai lava le tagata i le vaivai ua le mafai ai e ia i lona lava

malosi ona tetee atu i le malosi o  
lē o loo leaga. Ua  
faatagata-otauaina o ia e Satani, i  
le semanū lava e tumau ai pea o  
ia i lea pologa e oo i le faavavau,  
pe ana le matuā tulai mai le Atua.  
O le manatu lava lea sa i lē  
taufaaosooso, ia na faafelaveia le  
finagalo faale Atua na ala ai ona  
faia o le tagata, a ia na  
faatumuina le lalolagi i le ōi ma le  
puapuagā. A e mulimuli ane o le  
a ia faapea ane ai, Ua māfua lenei  
leaga uma talu ai ona ua faia le  
tagata e le Atua.

Ina o mamā pea o ia, sa matuā maua ai e le tagata le fesootaiga ma le mafutaga fiafia ma Lē “ua ia te ia le oloa uma o le poto atoa ma le malamalama.” A e peitai ina ua agasala o ia, ua le o toe mafai ai e ia ona fiafia i lea mafutaga paia, a ua ia saili se mea e lafi ai mai le Atua. I le o loo faapena lava pea le uiga o le loto ua le'i toe fuataiina. Ua le o gatasi ma le Atua, ma ua na le lagonaina le olioli e tupu mai i le fesootaiga ma Ia. E le mafai le tagata agasala ona fiafia pe a mafuta ma le Atua, a o le a me'i

'ese o ia mai le fefaauōaiga ma ē paia. Pe ana fai foi a e mafai ona faatagaina o ia i le lagi, o le a le maua ai lava sona fiafia; auā o le alofa mamā lē faapito o loo i ai i loto o i latou o e ua ainā ai le lagi, o le alofa lea ua ō gatasi ma le alofa faale Atua, o le a le tutusa lava lea ma uiga o loo lagona pea e ia i lona agaga. O ona manatu, o mea e tāua i lona loto, o uiga e ta'ita'iina ai lana amio, o le a matuā eseese lava ia ma le uiga mamā o e o loo mau i le lagi. Na fai e aveā o ia ma leo faapa'ulua i le pese mālie a le lagi. O lana

faalogo, o le a avea ai le lagi ma nuu e tigaina ai o ia; o le a fia lafilafi pea o ia mai Lē o loo fai ma malamalama o le lagi, i le ma le totonugalemu foi o ona fiafiaga uma. E le ona o se finagalo fia tau o le Atua e māfua ai ona le faitauina o e agasala faatasi ma e o i le lagi; a e peitai ua punitia 'ese i latou ona o lo latou lava le tatau ai ma lea faatasiga. E avea le pupula o le Atua ma afi e fano ai i latou. E sili ia i latou le malaia, ina ia tete'a 'ese atu ai i latou mai fofoga o Lē na maliu e faaolaina ai i latou.

E le mafai e i tatou lava ona toe  
sosola 'ese mai le lua o le agasala  
ua tatou pau'ū i ai. Ua leaga o  
tatou loto, ma ua le mafai e i  
tatou ona toe liliuina. “Po o ai ea  
e au mai se mea mamā nai le mea  
eleelea? e leai se tasi.” “O le loto i  
la le tino o le ita lea i le Atua; auā  
e le usiusitai i le tulafono a le  
Atua, e le mafai foi i ai.” O  
a'oa'oga, o le tausisi atu i tu ma  
amio faatamalii, o le faaaogāina  
eseese o le mafaufau, ma le  
taumafai po o le gaoioi  
faaletagata, e fai le aogā tāua o ia

mea uma; a e peitai ua leai lava  
so latou malosi e laveaiina ai i  
tatou mai le nofo pologa i le  
agasala. Atonu e mafai e soo se  
uiga faapena ona faaalua mai ai o  
foliga o le amio tatau, a e le mafai  
ona faaliliuina ai o le loto, e le  
mafai ona faamamāina ai punāvai  
o le ola. E ao lava ona ia i ai o le  
malosi faale Atua e galue mai  
totonu, o le ola fou lea mai lugā, i  
le faato'ā mafai ai ona liua o  
tagata mai le agasala i le  
amiotonu. O lea malosi faale  
Atua, o Keriso lava lea. Ua na o  
Lona alofa tunoa na te mafai ona

toe fuataiina lo tatou ola  
faaleagaga na fai a tineia, ma na  
faaliliuina atu faanaunauga o o  
tatou loto i le Atua ma le olaga  
paia. O lea ua fetalai mai ai le Alii  
Faaola, “A le toe fanau le  
tagata”—o lona uiga, pe a le  
maua e ia le loto fou, mana'oga  
fou, mafaufauga fou, ma  
faatatauga fou e ta'ita'iina atu ai o  
ia i le ola fou—“e le mafai ona  
iloa e ia le malo o le Atua.”

O le taofi taatele e faapea, ia tau  
lava ina ia faalauteleina le lelei o i  
totonu o le tagata i ala eseese

faale a'oa'oga, o se taofi lava e fano ai. “E le talia e le tagata faaletino o mea a le Agaga o le Atua; auā o mea valea ia ia te ia, na te le mafai foi ona iloa, auā e faamasinoina faaleagaga.” “ 'Aua e te ofo auā na ou fai atu ia te oe, E ao ina toe fanau mai outou.” Ua tusia foi ia Keriso e faapea, “Sa ia te ia le ola; o le ola foi o le malamalama lea o tagata,” “e leai lava se isi igoa i lalo o le lagi ua foaiina mai i tagata e mafaia ona faaolaina ai o i tatou.”

E le lava pe afai ua na ona tatou  
mautinoaina le alofa  
mutimutivale o le Atua ma Lona  
agalelei, ma tatou molimau atu i  
Lona uiga fofoga alofa ma Lana  
tausiga faa-Tamā. E le lava foi lo  
tatou talitonu i le poto ma le tonu  
o Lana tulafono ma lona faavae  
mau, o le alofa lea e faavavau. Sa  
talitonu Paulo i nei mea uma, na  
ala ai ona ia ta'utino atu, “Ma te  
'au upu faatasi ma le tulafono, e  
lelei ia.” “E paia lava le tulafono,  
ma le poloaiga e paia, e tonu ma  
ua lelei.” A ua toe faaopoopo i ai  
e Paulo nisi upu ona o le mafatia

tele o lona agaga ma lona loto  
vaivai, e faapea, “A o a'u ou te i la  
le tino, ua faatauina atu a'u e fai  
ma tagata o le agasala.” Sa  
naunau atu o ia i le mamā ma le  
amiotonu, auā o ia lava mea, sa  
leai sona malosi e maua ai, ona ia  
alaga atu ai lea, “Auē o a'u le  
tagata malaia! o ai sē laveai ia te  
a'u ai le tino o lenei oti?” O le tagi  
lava lea ua alu a'e mai loto  
mafatia i nuu uma ma tupulaga  
uma; a e na o le tasi lava o le tali i  
lenei valaau, o lenei, “Faauta i le  
Tamai mamoe a le Atua, na te  
aveesea le agasala a le lalolagi.”

E tele ata ma faatusa ua  
faaaogāina e le Agaga o le Atua i  
Lona fia faamaninoina o lenei  
upu moni, ina ia pupula ai i  
agaga o e o loo naunau i le fia  
sa'oloto mai le avega o le agasala.  
Ina ua 'olegiaina Esau e Iakopo,  
na ia sola 'ese ai mai le aiga o lona  
tamā, a e peitai sa matuā taomia  
lava o ia i le manatu i lana  
agasala. Ua nofo toatasi nei o ia,  
ua faasevasevaloaina, ma ua nofo  
'ese ma i latou o e sa pele ia te ia.  
I le o le manatu sa sili ona mafatia  
ai o lona agaga i lo isi manatu

uma, o lona mata'u lea ina ne'i  
avea lana agasala ma ala ua  
motusia ai lo la fesootaiga ma le  
Atua, ma ua tuulafoaiina ai o ia e  
Ia. Na ia ta'oto ifo ma le loto  
faanoanoa o le a ia malolo i luga o  
le fogāeleele, o loo siomia o ia e  
atumauga valevalenoa, ma le lagi  
ua faapupulaina i fetu i ona luga  
a'e. A o moe o ia, ua oso mai se  
malamalama 'ese i lona manatu;  
faauta, ua peiseai o se ala puaoa  
faa'apefa'i ua aga'i a'e mai le  
fanua laugatasi o loo moe ai o ia,  
ua loo a'e lava i faitotoa o le lagi,  
o loo a'ea'e ma ifoifo ai agelu a le

Atua; a o le itula foi lea na ia faalogoina ai le siufofoga mai le lagi o loo momoli mai ai se feau o le faamafanafanaga ma le faamoemoe. Na faapea ona faailoa ane ia Iakopo Lē na ia manaomia ma sa naunau i ai lona agaga—o le Faaola lea. Na oo ia Iakopo le olioli ma le faafetai tele ina ua faapea ona faaalua ia te ia o le ala e mafai ai e ia, le tagata agasala, ona toe maua o le fesootaiga ma le Atua. O le ala faa'apefa'i lilo na ia vaaia i lana miti, o le faatusa lava lea o Iesu,

ua na o Ia lava lea o le fesootaiga  
i le va o le Atua ma tagata.

O le faatusa lava lenei e tasi na  
faasino i ai le fetalaiga a Iesu ina  
o la talatala ma Natanielu, na Ia  
faapea atu ai, “E vaaia e outou le  
lagi ua avanoa; o agelu foi a le  
Atua e o a'e ma ifoifo i luga o le  
Atalii o le tagata.” Ina ua fouvale  
ma pa'ū le tagata, na faate'aeseina  
ai o ia e ia lava mai le Atua, ma sa  
motusia 'ese le lalolagi mai le lagi.  
Sa le toe mafai lava se fesootaiga i  
lea va. A e peitai talu Keriso, ua  
toe faafesootaiina ai le lalolagi ma

le lagi. Talu ai le olataga ua Ia galueaiina mo i tatou, ua avea ai Keriso ma ala ua toe sosoo a'i le avanoa na tupu talu le agasala, ma ua mafai ai e le 'au agelu o loo feaveai feau ona toe fesootai ma tagata. O le tagata ua pa'ū, ua vaivai tele, ma ua na le toe mafaia se mea e tasi, a ua toe faafesootaiina nei i tatou e le Keriso ma le Pogai o le malosi uma lava.

Pe afai latou te faaleamaniaina le pogai e tasi o le faamoemoe ma le fesoasoani, o le a le pine lava ona

iuvale le taumafai o tagata ina ia latou maua le lelei moni, ma o le a latou galulue fua mo le toe fia siitia a'e o le fanau a tagata mai le tulaga maualalo ua latou pau'ū i ai talu ai le agasala. “O mea lelei uma e foaifuaina mai, ma mea alofa uma e atoatoa ona lelei,” e mai le Atua lava ia. Pe a aunoa ma Ia, o le a le mafai lava e se tasi ona 'ausia o le tapulaa o le amio moni ua sao ona lelei. I le ua na o le tasi o le ala tatou te o'o atu ai i le Atua, o Keriso lava lea. O Lana fetalaiga lenei, “O a'u nei le Ala, ma le Upu Moni, ma le Ola; e le

alu atu lava se tasi i le Tamā, pe a  
le ui mai ia te a'u.”

E mutimutivale le finagalo o le  
Atua mo Lana fanau o i le lalolagi  
i le alofa e sili atu lona malosi i lo  
le oti. Ina ua Na foai mai Lona  
Alo, ua Ia liligi uma mai ai le lagi  
atoa i lea mea alofa e tasi. O le  
soifuaga, le maliu, ma le fautuaga  
a lo tatou Faaola; o galuega a le  
'au agelu, ma olega a le Agaga  
Paia; o le galuega aoao a le Tamā,  
ma le manatu mai e le aunoa o ē o  
i le lagi—o loo latou galulue

faatasi uma ona o le fia faasaoina  
o le tagata.

Se'i o tatou iloilo ia i lenei taulaga  
ofoofogia ua faia ona o i tatou  
lava! Se'i o tatou mafaufau ma  
loto faafetai i le tele o le galuega  
ma le malosi o loo faaaogāina nei  
e le lagi ina ia toe maua mai ai ē  
na le iloa, ma ia toe aumaia i le  
maota o le Tamā. E ui i nisi  
malosi o loo galulue i le lalolagi,  
po o ni tasi foi sailiga o loo  
tautigā ai nisi, a e le sili atu lava i  
lo ia. O le tau tele ua folafolaina  
mo i latou o e latou te faia le

amiotonu, o le fiafiaga o loo  
faatali mai i lugā i le lagi, o le  
mafutaga faatasi ma le 'au agelu,  
a e maise foi o le mafutaga paia  
faatasi ma le Tamā ma Lona Alo,  
ma le saga faamalosiina ma  
faalauteleina pea o o tatou uiga  
tāua uma lava e oo i le  
faavavau—pe le o  
faamafanafanaga silisili ea ia e  
tatau ona pulunaunauina ai i  
tatou ina ia tuuina atu ato'atoa o  
tatou loto e auauna atu ai ma le  
faamaoni i Lē na Ia faia i tatou ma  
lo tatou Faaola?

E le gata i lea, a o loo i ai foi i le tasi itu o mea nei: O faasalaga mai le Atua e faasaga i e ua latou faia pea le agasala, o le tau'i e le ma'alofia, o le faaleagaina o o tatou uiga, ma le faaumatiaga i le aso gataaga—ua faailoa mai ia mea uma i le Afioga a le Atua e lapatai mai ai ia i tatou mai galuega leaga a Satani ma le auauna atu ia te ia.

Po o le a tatou le faaaogāina ea le alofa o le Atua? O le a ea se tasi mea e le'i faia e le Atua mo i tatou? Se'i o tatou tuuina atu ia o

i tatou i le fesootaiga tonu ma Lē  
ua Ia alofa mai ia i tatou i se alofa  
ua faapea ona tele ma le  
ofoofogia. Se'i o tatou faaaogāina  
ia o mea uma ua saunia mo i  
tatou ina ia liua ai i tatou i Ona  
foliga, ma ia toe maua e i tatou le  
mafutaga faatasi ma le 'au agelu  
paia, a e maise o le mafutaga paia  
faatasi ma le Tamā ma le Alo.

## Mataupu E III—O le Salamo

Pe faapefea ona amiotonu o le tagata i luma o le Atua? Pe faapefea ona faatonuina o ala o le tagata agasala? Ua na o Keriso lava ma Lana galuega mana e mafai ona tatou oo atu ai i le tulaga tatou te lelei ai ma le Atua, ma o le a ō gatasi ai a tatou amio ma Lana tapulaa paia. A e pe faapefea ona tatou ō atu ia Keriso? E toatele nisi o loo latou fesili i lea lava fesili e pei ona sa faia e le motu o tagata i le Aso Penetekoso, ina ua tuia o latou loto ma ua latou alalaga atu, “Se a

se mea matou te faia?" O upu muamua o le tali a Peteru ua faapea, "Inā salamō ia." Ma o se isi foi o ana lauga e vāvā lalata ma lea, na ia toe ta'utino atu ai, "Inā salamō ia outou ma outou liliu, ina ia sōloiese a outou agasala."

O le salamō e aofia ai le loto mafatia ma le loto faanoanoa ona o agasala ua faia. a e maise foi o le matuā liliu 'ese mai ai. Tatou te le tuu 'eseina le agasala, se'ilogā ua tatou vaai tino i lona leaga; vaganā ona ua tatou liliu 'ese mai

ai ma le loto, e faalē tino mai lava se fesuiaiga i o tatou olaga.

E toatele latou te le o malamalama i le uiga o le salamō moni. E salamō nisi e toatele ona o a latou amio sesē, seia oo foi ina latou faaaliali atu nisi uiga o le faafouina I le vaaiga i fafo, ona o lo latou fefefe ina ne'i ootia i latou i ni faalavelave talu ai a latou agasala. A e le o le salamō moni lenei e pei o le salamō o loo a'oa'oina mai e le Tusi Paia. E sili ona fetagisi i latou ona o le faalavelave ua ootia ai i latou, a e

le ona o le agasala ua latou faia.  
Sa faapena le tagi auē o Esau ina  
ua vaai atu ua faoa mai ia te ia  
lona tofi o le ulumatua e  
faavavau. Sa faapea foi ona gatete  
o Palaamo ina ua vaai atu, o tu  
mai le agelu i ona luma ma le  
pelu ua i lona lima, ona ia  
ta'utino atu loa lea i ai o lana  
agasala ina ne'i oti o ia; a e sa le  
matuā ia te ia le salamō moni ona  
o le sesē o lana amio, e le'i liua o  
ia, e le'i lagona e ia le matuā  
'ino'ino tele i le leaga.

Ina ua mavae ona faalataina e Iuta le Sekara o lona Alii, na ia toe faapea ane ai, “Ua ou agasala, ina ua ou faalata le ua le sala.” Na faia faamalosi lea ta'utinoga e lona agaga agasala ona o le mata'utia o le avega o le faasalaga na ia lagona ua faafaulai i ona luga, atoa foi ma le vaavaai mamao atu i luma i le faamasinoga a le Atua. O lona mafaufau atu i le iuga o loo faatalitali mo ia na faatumuina ai lona loto i le mata'u, a e peitai sa le maua ia te ia se faanoanoaga loloto e momomo ai le loto, ona

ua ia faalataina le Alo lē ponā o le Atua, ma ua ia faafiti I Lē paia o Isaraelu. O Farao foi, ina o puapuagatia o ia i lalo ifo o le aao totoo o le Atua, na ia ta'utino ai lana agasala ina ia faasaoina ai o ia mai nisi faasalaga e toe mulimuli mai; a e peitai na vave foi ona ia toe fo'i i lana amio o le tetee atu i le Atua ina ua taofia mala. O i latou uma nei na fetagisi ona o faigatā na tutupu mai talu le agasala, a e latou te le'i maua le loto faanoanoa ona o le agasala lava ia.

A e peitai, pe afai e gaua'i atu le  
loto i le galuega mana a le Agaga  
o le Atua, o le a fāgua ai le loto  
fuatia ifo, ma o le a amata ai ona  
lagona e le tagata agasala o nisi  
uiga tau le loloto ma le paia o le  
tulafono a le Atua, o le tulafono  
lava lea ua faavaeina ai Lana  
faigā malo i le lagi, atoa foi ma le  
lalolagi. “O le malamalama  
moni,” o Lē “na te  
faamalamalamaina tagata uma  
lava i lona maliu mai i le  
lalolagi,” o Ia lea Na te  
faamalamalamaina tulimanu lilo  
o le agaga, atoa ma mea lilo o i le

pouliuli. O le a ootia ai lava le  
loto i le matuā talitonu i le  
faaaliga o mea tonu, ma o le a  
lagona ai foi ma le fia te'a 'ese ma  
mea uma ua le tusa ma le  
finagalo o le Atua. Ina ua ootia le  
loto o le tagata agasala i le  
faaaliga o le amiotonu a Ieova, o  
le a ia lagona ai foi ma le mata'u  
tele i tu atu i luma o Lē Na te  
su'esu'eina loto uma, a o nofo sala  
pea o ia ma lē mamā. O le a ia  
iloa atu le alofa o le Atua, le  
matagofie o le olaga ua  
faapaiaina, ma le fiafia e tupu mai  
i le faamamāina, ona naunau ai

lea o ia ina ia faapena foi ma ia  
ona toe faafouina, ma ia toe maua  
e ia le fesootaiga ola ma Lē o i le  
lagi.

O le tatalo a Tavita ina ua mavae  
lona pa'ū, ua faaalia mai ai le uiga  
o le salmō moni i le agasala. Sa  
matuā faamaoni ma loloto le  
salamō o Tavita. Ua le aliali mai  
lava I lana tatalo sona taumafai e  
faaufiufi lana agasala, po o sona  
taumafai e 'alo i le faasalaga na  
folafolaina atu. Sa mautinoa lelei  
lava e Tavita le matuā tele o lana  
agasala; na ia vaai atu i le

faaleagaina o lona agaga; na ia matuā 'ino'ino i lana agasala. Ua le na o le faamagaloga na ia ole atu ai, a e sa ia tatalo atu foi mo se loto mamā. Sa naunau o ia ia na toe lagona le fiafia e maua i le olaga ua faapaiaina, ma ia toe faafoi atu lava o ia ia lelei ma ia toe mafuta ma le Atua. Sa faapenei ona tautala o lona agaga:—

“Amuia le tagata ua faamagaloina lona solitulafono, ma ua ufitia lana agasala.

Amuia le tagata e le ta'usalaina e  
Ieova, e leai foi se 'ole'olega i lona  
loto.”

“Le Atua e, ia e alofa mai ia te  
a'u, e tusa ma lou lava alofa;  
E tusa ma le tele o lou alofa  
mutimutivale, ia e sōloieseā o'u  
solitulafono. . . .

Auā ua ou iloa e a'u lo'u  
solitulafono; e le aunoa foi ona i  
ai i o'u luma la'u agasala. . . .

Ia e faamamā ia te a'u i le isopo,  
ona mamā ai lea o a'u;

Ia e fufulu mai ia te a'u, ona  
sinasina ai lea o a'u e sili i lo le  
kiona. . . .

Le Atua e, ia e faia se loto mamā  
mo a'u; ma ia e faafouina se loto  
mau i totonu ia te a'u.

'Aua e te lafoaiina a'u i ou luma;  
'aua foi e te aveeseina lou Agaga  
Paia ia te a'u.

Ia e faafoisia mai ia te a'u le olioli  
o le olataga mai ia te oe. . . .

Le Atua e, le Atua o lo'u olataga,  
ia e lavea'i mai ia te a'u ai le sala o  
le toto;

Ona pese fiafia ai lea o lo'u  
laulaufaiva i le amiotonu mai ia  
te oe."

O le salamō faapenei, e le mafai  
ona maua e i tatou mai ia te i  
tatou lava; a e gata ona maua mai  
ia Keriso, Lē ua afio a'e i lugā, ma  
Na foaiina mai mea alofa i tagata.

O le tasi lava lenei itu ua sesē ai  
nisi e toatele, ma ua ala ai ona  
latou le maua o le fesoasoani o  
loo finagalo le Keriso e tuuina  
mai ia te i latou. O lo latou  
manatu, e le mafai ona latou ō atu

ia Keriso, se'i vaganā ona ua latou  
mua'i salamō, ma o le a avea foi  
lo latou salamō ma mea e saunia  
ai le ala mo le faamagaloina o a  
latou agasala. E moni lava, e  
muamua le salamō i lo le  
faamagaloina o agasala; auā e  
gata i le loto momomo ma le  
nutimomoia na te lagona le fia  
maua o le Faaola. A e po o le a  
faatali ea lava le tagata agasala  
seia oo ina ua salamō o ia i le  
faato'ā alu atu ai ia Keriso? Po o  
le a avea ea lenei uiga o le salamō  
ma ala e punitia ai le va o le  
tagata agasala ma le Faaola?

Ua le o a'oa'o mai le Tusi Paia e faapea, e ao ona mua'i salamō le tagata agasala i le faato'ā tatau ai ia te ia ona taliaina o le valaau alofa a Iesu, “Ia outou o mai ia te a'u, o outou uma o e tigāina ma mafatia i avega, o a'u foi e malolo ai outou.” O le mana e sau mai le Keriso, o lea e ta'ita'iina atu ai i tatou i le salamō moni. Sa faamalamalamaina lea mea e Peteru i lana faamatalaga i tagata Iutaia, e faapea, “O ia ua aveina a'e e le Atua i lona aao taumatau o le Alii i le ma le Faaola, na te

avatua ia Isaraelu le salamō ma le faamagaloina o agasala.” E pei ona le mafai ona faamagaloina o i tatou e aunoa ma Keriso, e faapea lava foi ona le mafai ona tatou maua o le salamō e aunoa ma le Agaga o Keriso e fāgua ai o tatou loto fuatia ifo.

O Keriso, o le pogai lava Ia o mafaufauga tonu uma e tutupu mai. Ua na o Ia lava Na te mafai ona totōina i le loto le 'ino'ino i le agasala. O mana'oga uma mo le upu moni ma le uiga mamā, o mautinoaga uma o o tatou lava

uiga faaletonuga ma le agasala, o faailoga lava ia o le galuega mana o le Agaga o Keriso i o tatou loto.

Ua fetalai mai Iesu, “O a'u foi, afai e siitia a'u ai le eleele, ou te tosina uma mai tagata ia te a'u.” E tatau lava ona faaalua Keriso i le tagata agasala, o Ia lava o le Faaola na maliu mo agasala a le lalolagi; i le a o tatou o vaavaai atu i le Tamai mamoe a le Atua o loo faalavā'au mai i luga o le satauro i Kolokota, o le a amata ona pupula mai ai i o tatou mafaufau le uiga lilo o le

faaolataga; ma o lo tatou  
mautinoaina foi o le agalelei o le  
Atua, o le a ta'ita'iina ai i tatou i le  
salamō. O le maliu o Keriso mo  
tagata agasala ua faaalua mai ai le  
alofa e le mafaamatalaina; i le a o  
vaavaai atu la le tagata agasala i  
lenei alofa, e faamalūlūina ai lona  
loto, e matuā ootia ai lona  
mafau, ma e osofia ai lona  
agaga i le matuā salamō a'ia'i ona  
o ana agasala.

E moni lava e i ai nisi tagata o e  
ua maua i le masiasi ona o a latou  
amio sesē, ona tuua ai lea e i latou

o nisi o a latou masaniga leaga, i  
le a o faapea ona latou faia, ua le  
masalomia lava e i latou ia, ua  
amata ona tosina atu o i latou ia  
Keriso. E soo se ala lava e  
taumafai ai e tagata agasala ina ia  
faafouina ai la latou amio, mai le  
mana'oga moni i le fia faia o le  
amiotonu, o le mana lava lea o  
Keriso ua tosina atu ai i latou. Ua  
galueaiina o latou loto e se malosia  
latou te le o mautinoaina, a e  
peitai ua fafaguina ai o latou loto  
fuatia ifo, ma ua faatonuina ai lo  
latou ola i fafo. Ina o faapea ona  
tosina atu o i latou e Keriso ina ia

latou vaai i Lona satauro, I mea  
na manu'a ai o Ia ona o a latou  
agasala, ua oo ane ai le tulafono a  
le Atua i o latou mafaufau. Ua  
faaalia atu ia i latou le uiga  
agasala o lo latou olaga, ma le  
loloto o le agasala o loo i o latou  
agaga. Ua amata nei ona tau  
pupula ia te i latou o le uiga o le  
amiotonu a Keriso, ona latou  
faapea ifo ai lea, "Faauta i le  
mata'utia o lenei mea o le agasala,  
fua ina ua mana'omia se taulaga e  
faapea ona tele e togiola a'i e ua  
nofo to'ilalo i ai! Faauta i lenei  
alofa tele, ma lenei mafatia, ma

lenei faamaualaloga ofoofogia, o  
mea uma lava ia sa ao ona  
faataunuuina ina ia le fano ai i  
tatou, a ia tatou maua le ola e  
faavavau.”

Atonu foi o le a teena e le tagata  
agasala lenei alofa, ma o le a lē  
mana'o ina ia tosina atu o ia ia  
Keriso; a e afai e le tetee atu o ia,  
o le a tosina atu lava o ia ia  
Keriso. O se malamalama ua ia te  
ia i le ala o le faaolataga, o le a  
ta'ita'iina atu ai lava o ia, seia oo  
ina ua faatulagaina o ia i lalo ifo o  
le satauro ma le loto salamō ona o

ana agasala na māfua ai ona  
faapuapuagatiaina o le Alo pele o  
le Atua.

O lea lava finagalo malamalama  
faale Atua o loo galue nei i le  
aoao o mea ua faia, o lea foi o loo  
fetalai mai i loto o tagata, ma na  
faatupuina ai le naunautai e le  
mafaamatalaina mo se mea e le o  
ia i latou. E le mafia i mea o loo i  
le lalolagi nei ona faamalieina ai o  
lea faanaunauga. O loo tu'itu'i atu  
pea le Agaga o le Atua ia i latou  
ina ia latou saili atu i mea e gata  
ona maua ai le filemu ma le

malologa—o le alofa tunoa lea o Keriso, ma le olioli e tupu mai i le olaga ua faapaiaina mo Ia. E tele ala o le mana; i mea e vaaia ma mea e le o vaaia, o loo galue ai pea lava lo tatou Faaola, ina ia taofia mai tagata mai le mana'o atu i mea faafiafia o le agasala, a ia latou faasaga atu e saili mo le manuia tumau e maua ia te Ia. O agaga uma nei, o e o loo saili vale i le fia inu i “vai eli māvaevae e le tali ai ni vai” o le lalolagi nei, o loo faaoo mai pea i ai lenei valaau alofa, “O lē ua fia inu, ina sau ia,

atoa ma lē mana'o i ai, ina ave fua  
ia le vai o le ola.”

O outou o e ua i ai le mana'o i  
mea e sili atu i lo mea e mafai ona  
maua i lenei lalolagi, ia outou  
iloa, o lea mana'o, o le siufofoga  
lava lea o le Atua o loo fetalai mai  
i outou agaga. Ia outou ole atu  
loa ia te Ia ia Na foaiina atu ia te  
outou le salamō, ma ia Na faaalua  
ai ia te outou le Keriso i Lona  
alofa tunoa, ma Lona mamā  
ato'atoa. O loo i le soifuaga o le  
Alii Faaola ma Ana galuega uma  
le faaaliga manino o le autu ma le

aano o le tulafono a le Atua, o le alofa lea i le Atua, atoa foi ma tagata. O le agalelei, ma le alofa ua le faapito ia te Ia lava, o uiga tāua lava ia sa fiafia i ai Lona agaga. I le a o tatou o vaavaai atu ia te Ia, ma o loo suluia i tatou i le malamalama mai lo tatou Faaola, o le a mafai ona tatou mautinoa lelei ai o le agasala tele o o tatou lava loto.

Atonu na faasesēina i tatou e o tatou lava loto, e pei o Nikotemo, ma tatou faapa ifo ai, o loo tonu lo tatou olaga, ma sa'o Ia tatou

amio, ma ua le tatau ai ia te i  
tatou ona faamaulaloina o tatou  
loto i luma o le Atua e pei o le tele  
o tagata agasala; a e peitai ane, pe  
afai e susulu mai le malamalama  
o le Keriso i o tatou loto, o le a  
tatou iloa lelei ai lava lo tatou le  
mamā, ma le uiga faapito o lo  
tatou alofa, atoa ma le ita i le  
Atua ua faaleagaina ai mea uma  
ua tatou faia. Ona tatou mautinoa  
lelei ai foi lea, o la tatou lava  
amiotonu faaletagata ua “tusa ia  
ma le ie o le ma'i” ma ua na o  
Keriso lava Na te mafai ona  
faamamāina i tatou mai le leaga o

le agasala, ma Na faafouina o  
tatou loto ia foliga ia te Ia.

E tasi sina 'ave mai le pupula o le  
Atua, e tasi sina malamalama mai  
le mamā ma le paia o Keriso, a e  
ati i o tatou agaga, ma suluia ai le  
leaga uma, ma faataatia mai ai  
uiga uma faaletagata ua  
faaleagaina e le agasala. E faaali  
tino ai mana'oga leaga, ma le loto  
le talitonu, ma laugutu lē mamā.  
E faaalia foi e lenei malamalama i  
le tagata agasala lona le  
faamaoni, ma lona fe'alofai i lona  
va feagai ma le tulafono a le

Atua, ona taia ai lea o lona loto i  
le su'esu'e mai o le mana o le  
Agaga o le Atua. Ona tupu ai lea  
o le 'ino'ino o le tagata agasala ia  
te ia lava pe a vaai i le uiga ma le  
amio lē ponā a Keriso.

Ina ua vaai atu le perofeta o  
Tanielu i le pupula faalelagi sa  
siomia ai le 'ave feau mai le lagi  
na auina mai ia te ia, na osofia ai  
loa o ia i le manatu ifo i lona lava  
vaivai ma lona le ato'atoa. Ona ia  
faamatalaina mai ai lea o le uiga o  
lena vaaiga ofoofogia, e faapea,  
“Ona leai lea o se toe malosi ia te

a'u; ua mavae lo'u matagofie, ua ou pulavale, ua leai lava se malosi ua toe ia te a'u." O le agaga ua faapea ona ootia, o le a matuā 'ino'ino lava i le alofa ua faapito ia te ia lava, a o le a saili, i le amiotonu e mai ia Keriso, mo le loto mamā ua ō gatasi ma le tulafono a le Atua, ma le amio moni faaKeriso.

Ua faapea le molimau a Paulo i lona olaga muamua, fai mai, "O la le amiotonu foi i le tulafono"—o lana amio aliali lea na ia taumafai ai i le malosi

faaletagata ona savali e tusa ma le tulafono—“e le'i mata'uleagaina a'u,”—i le manatu faaletagata—a e peitai ina ua pupula ia te ia le uiga loloto faaleagaga o le tulafono, na ia mautinoa ai, o ia o le tagata agasala. Pe a faamasinoina Paulo i upu o le tulafono e pei ona faitau i ai le tagata, ona foliga lea ua le agasala o ia; a e peitai ina ua matuā vaavaai ifo o ia i le loloto o poloaiga paia o le tulafono, ma ua na iloaina o ia e pei ona silafia mai o ia e le Atua, ona ia ifo atu ai lea ma le faamaulalo, ma ua

ta'utino atu e ia, o ia lava o le tagata agasala. Ua fai mai o ia, "Sa ou ola foi anamua, ina ua le oo mai le tulafono;" ua ia fealuai ai ma lana lava amiotonu faaletagata—"a ua oo mai le poloaiga,"—ua ootia lona loto i lona uiga loloto faaleagaga—"ona toe ola mai ai lea o le agasala,"—na faato'ā ia iloa ai lona uiga moni e pei ona silafia mai o ia e le Atua, o ia o le tagata agasala—"ona ou oti ai lea"—ua mavae loa lona faafiaamiotonu. Na vaaia loa e Paulo le uiga moni faaleagaga o le tulafono, ona

pupula ai lea ia te ia o le  
mata'utia tele o le agasala, ona  
mavae ai lea o lona lotovii ma  
ona manatu faafiatagata.

E le tutusa agasala uma i le  
finagalo o le Atua; e eseese tulaga  
o agasala i Lana faatatau, e pei  
lava foi o le faatatau faaletagata; a  
e peitai e tusa lavapefaatauvaa se  
mea sesē i le vaaiga a tagata, a e  
leai se agasala e faatauvaa i le  
silafaga a le Atua. O le  
faamasinoga a tagata e faapito ma  
e le tonu, a e faatatau tonuina  
lava e le Atua mea uma e pei ona

tatau ai. E inosia lē ua tago tele i le 'ava malosi, ma e faamatala atu ia te ia e faapea, o le a avea lana agasala ma ala e teena ai o ia mai le lagi; a e peitai le faamaualuga, ma le manatu faapito, ma le matapeapea, e tele ina le faatatau tonu i ai se a'oa'iga. A e peitai o agasala lava ia ua matuā iloga ona inosia tele e le Atua; auā o uiga lava ia e 'ese mamao mai Lana amio, o le agalelei lea ma le alofa fua, ma ua le feagai lava ma lea agaga alofa ua fai ma savili mālū o loo mānavaina e i latou o e ua ainā ai isi lalolagi e le'i pau'ū.

Atonu o le a lagona e se tasi ua na faia se agasala mamafa tele le masiasi ma le mativa tele faaleagaga, ma lona fia maua o le alofa tunoa o Keriso; a e peitai lē ua i ai le loto mitamita ma le faamaualuga, na te le fia maua se fesoasoani mai se tasi, ona punitia ai lea o Keriso mai lona loto, ma o le a le maua ai e ia le manuia tele na afio mai Iesu e momoli mai i le fanau a tagata.

Ina o tatalo atu le telona faatauva'a i lenei tatalo, "Le Atua e, ia e alofa mai ia te a'u le tagata

agasala,” sa manatu ifo lava ia i lona loto, o ia o se tagata ua sili ona agasala, i le sa faapea lava foi le manatu o nisi ia te ia. A e peitai sa lagona lava e lenei tagata lona fia maua o se fesoasoani, i le ua o'o ane lava o ia i luma o le Atua ma lana avega o le agasala ma le masiasi, ma ua ole atu ia te Ia ina ia alofa mai ia te ia. Sa avanoa lona loto mo le galuega mana o le Agaga o le Atua, ma sa faasa'olotoina ai loa o ia mai le pule ma le malosi o le agasala. A e peitai le faresaio loto fefete, ma lana tatalo faafiaamionu, na ia

teena i lona loto le feau lelei a le Agaga Paia. Talu ai ona ua la vāvāmamao ma le Atua, ua le manatu ifo ai o ia i lona lava uiga leaga ua matuā 'ese mamao mai le ato'atoa o le paia faalelagi. Na te le'i lagona le fia maua o se fesoasoani mai se tasi, i le e leai foi se mea na ia maua mai le Atua.

Pe afai ua e mautinoaina lou lava leaga, 'aua e te faatali se'i e nofo ma e taufaaleleia oe e oe lava. Ua matuā toatele i latou o e ua manatu ifo i o latou loto, ua le

lava so latou lelei e tatau ona  
latou ō atu ai ia Keriso. O lou  
manatu ea o le a e lelei i lou lava  
taumafai? “E mafai ea ona liua e  
le Aitiope o lona pa'u, pe liua e le  
nameri ona ila? A mafai lea, ona  
mafai foi lea ona amio lelei o  
outou ua masani i amio leaga.”  
Na o le Atua lava tatou te maua  
ai le fesoasoani mo i tatou. E le  
tatau ona tatou faatali seia  
tauanauina atili i tatou, po o le  
faatali seia maua se avanoa lelei,  
po o le faapea foi seia faapaiaina  
o tatou loto. E le mafaia se mea e i  
tatou ia i tatou lava. E tatau lava

ona tatou ō atu pea ia Keriso ma  
o tatou uiga e pei lava ona i ai  
nei.

A e peitai, 'aua lava ne'i  
faasesēina i tatou i le manatu e  
faapea, o le alofa tele ma le alofa  
mutimutivale o le Atua o le a i'u  
ina faasaoina ai ma i latou foi o e  
ua latou teena Lona alofa tunoa.  
E gata ona manino le leaga a'ia'i o  
le agasala i le malamalama ua  
pupula mai le satauro. O i latou o  
e ua faamoemoe vale e faapea, ua  
sili atu ona tele o le agalelei o le  
Atua Na te le mafai ona lafoai

'eseina ai o lē ua agasala pea ma le loto i ai, ia vaai nei i latou i Kolokota. O le pogai tonu lava lea na ala ai ona aapa mai o Keriso ina ia lafo atu i Ona luga le sala o le lē usitai, ma ia faapuapuagaina o Ia e fai ma sui o a tatou agasala; auā ua leai lava se tasi ala e faasaoina ai le fanau a tagata. Pe ana leai lenei taulaga ua matuā lava, po ua le mafai lava ona sosola 'ese tagata mai le malosi e fano ai o le agasala, le mafai ona toe mafuta faatasi o i latou ma e paia, le mafai foi ona toe maufi faatasi i le ola moni faaleagaga. O

le alofa, ma le faapuapuagaina,  
ma le maliu o le Alo o le Atua, ua  
molimau faatasi e faaali tino mai  
ai le leaga a'ia'i o le agasala, ma  
ua ta'utino mai ai foi, ua leai lava  
se tasi ala e sola 'ese ai le tagata  
agasala mai le malosi o le malaia,  
leai sona faamoemoe mo le olaga  
sili atali, vaganā lava ona ua  
gaua'i atu ato'atoa lona agaga ia  
Keriso.

O nisi o i latou o e ua  
faama'a'aina pea o latou loto, ua  
fia lelei i latou i lo latou faapea  
ane e uiga i nisi, o e ua ta'ua i

latou e i latou o Kerisiano, “E tutusa lo'u lelei ma lo latou. E leai se mea e sili atu ai i latou i lo a'u i le alofa lē faapito, ma le mataala, po o le amio faautauta. E manana'o foi i latou i faafiafiaga e pei lava o a'u.” Ua faapea ona avea o lo latou faipona atu i nisi ma ala ua latou fia ufiufi ai i lo latou lava faatamala. A e peitai, ua le mafai lava ona faasaoina o se tasi i lona matauina o agasala ma pona o nisi; auā ua le faatuina mai e le Atua i o tatou luma se tapulaa lē atoatoa faaletagata. Ua tuuina mai le Alo lē ponā o le

Atua ina ia avea o Ia ma  
faata'ita'iga ia i tatou, i le o i latou  
o e ua fai ma a latou masaniga le  
soona amanaia vale o ni uiga po o  
ni ala sesē o nisi Kerisiano, o i  
latou lava ia ua tatau ona latou  
faaalia mai le amio ua sili a'e, ma  
tuuina atu le faata'ita'iga tatau. O  
lo latou faipona atu i nisi ua aliali  
mai ai, o loo latou malamalama  
lelei i le tapulaa maualuga ua  
tatau ona 'ausia e le tagata  
Kerisiano, i le o lea la ua sili atu ai  
la latou lava agasala. O loo latou  
iloa le mea tonu e tatau ona faia,  
a ua latou le faia lava.

Ia outou ma le uiga lenei, o le faagesegese. Soia le faifai mālie i le galuega o le lafoaiina o agasala ma le saili i le loto mamā e maua mai ia Iesu. O le itu lava lenei ua sesē ai le afe ma afe o tagata, ua oo ai lava ina fano i latou i le malaia e faavavau. Ou te le faaumiumi ona faamatalaina le uiga o le puupuu ma le faaletonu o aso o le olaga nei; a e peitai o loo i ai le faigatā mata'utia o loo lamatia ai pea i tatou—o lea faigatā foi ua faale malamalama i ai le tele o tagata—pe a

faagesegese pea ona tatou gaua'i  
atu i le siufofoga o loo ole mai  
pea o le Agaga o le Atua, a o le a  
fia nonofo pea i le agasala; auā o  
lona uiga tonu lava lea o le  
faagesegese faapena. Soo se  
agasala ua tatou manatu o se  
agasala faatauvaā ma ua tatou  
saga faia ma faapelepeleina, e fai  
lava lea ma ala e oo mai ai lo  
tatou malaia e faavavau. O' se  
mea o le a tatou lē manumalo i ai,  
o le a manumalo mai lea ia i  
tatou, ma na galueaiina lo tatou  
malaia.

Sa mafaufau ifo Atamu ma Eva i o la loto e faapea, o se mea faatauvaa lava lo la aai i fualaau faasaina, ma e faamata o le a le tupu mai ai lava se mea mata'utia e pei ona ta'utinoina mai e le Atua. A e peitai lenei mea faatauvaa, o le soliga lava lea o le tulafono paia ma le lē liua a le Atua, i le ua faate'a 'eseina ai le tagata ma le Atua, ma ua tatalaina ai punāvai o le oti ma le ōi e le mafaamatalaina i le lalolagi. I lea tupulaga ma lea tupulaga ua alu a'e ai pea le alaga o le tagi auē mai le lalolagi, ma

“ua ōi faatasi, ma oono faatasi  
mea uma lava na faia,” talu ai le  
lē usitai o le tagata. E oo lava foi i  
le lagi, ua na lagona lava le mea  
ua tupu talu le fouvale o le tagata  
i le Atua. O loo tu nei Kolokota e  
pei o se maa faamanatu o le  
taulaga ofoofogia na saunia ina ia  
toe faalelei ai le soliga o le  
tulafono a le Atua. 'Aua lava ne'i  
o tatou manatu, o se mea  
faatauva'a le agasala!

O solitulafono uma e te faia, po o  
lou teena foi o le alofa tunoa o  
Keriso, e toe galulue ia mea uma i

totonu ia te oe; e faama'a'aina ai  
lou loto, faaleagaina lou  
faamoemoe, ma faanenefuina lou  
atamai; ona tupu ai lea o lou lē fia  
gaua'i, ma o le a tauau foi ina e le  
mafai ona gaua'i atu i le olega  
alofa a le Agaga o le Atua.

E toatele o loo latou faafilemuina  
o latou loto fuatia ifo i le manatu  
faapenei, latou te mafaia lava ona  
liliu 'ese mai o latou ala leaga i  
soo se aso e manatu ai i latou; ma  
e ui lava i lo latou fāiaga pea i le  
valaau alofa a le Atua, a o le a  
faapea lava i nisi aso o lumanai

ona toe lagona ai e i latou le  
musumusuga a le Agaga. O lo  
latou manatu, e ui lava ina sa  
latou faaleamaniaina le alofa  
tunoa o le Agaga, ma sa tuuina  
atu pea lo latou mafaufau ma lo  
latou malosi i le itu a Satani, a e o  
le a mafai lava ona latou liliu 'ese  
mai lo latou ala sesē pe a latalata  
mai le malaia. A e peitai e le o se  
mea faigofie lea mea. O le tele o  
mea i le olaga nei e mafaufau i ai  
ma a'oa'oina ai, o le a pulea ai le  
loto o le tagata ma o le a maua  
mai ai foi lona uiga tumau, ona  
toaitiiti ai lea o i latou o e o le a

toe manana'o ai ina ia liua i latou  
ia foliga ia Keriso.

E oo lava i se uiga sesē e tasi, po o  
se mana'o le tatau e tasi, a e afai o  
le a faaolaolaina pea i totonu o le  
tagata, e i'u lava ina faaleaogāina  
ai le mana uma lava o le tala lelei.  
Soo se gaua'i atu i le agasala, a o  
le a faamalosiina ai lava le liliu  
'ese o le agaga mai le Atua. O le  
tagata o lē ua na faailoa mai lona  
matuā le talitonu, ma lona  
faatu'iese i le upu moni mai le  
lagi, ua ia toe seleseleina mai fua  
matua o fatu na lūlūina e ia lava.

E ui i lapataiga e tele o i le Tusi Paia e faasino i e ua latou manatu faatauva'a i le agasala, a ua leai se tasi ua sili atu lona mata'utia i lo upu nei a le poto o Solomona e uiga i le tagata agasala, e faapea, "o maea o ana agasala e taofia ai o ia."

O loo nofo sauni lava Keriso e faasa'olotoina i tatou mai le agasala, a e peitai e le faamalosiā mai e Ia Lona finagalo; i le pe afai o le saga faia pea o le agasala ua i'u ina matuā atoatoa ona gaua'i atu ai o o tatou loto i le leaga, ua

tatou le manana'o ai ina ia  
faasa'olotoina i tatou, ma ua tatou  
mumusu ai foi e taliaina Lona  
alofa tunoa, o le a ma se tasi mea  
o le a toe mafaia e Iesu? Ua  
malaia i tatou ia i tatou lava talu  
ai ona ua tatou finau vale e tetee  
atu pea i Lona alofa. "Faauta, o  
lenei le tausaga e talileleia mai ai;  
faauta, o lenei le aso e faaolaina  
ai." "O le aso nei afai tou te  
faalogo ai i lona siufofoga, 'aua  
tou te faama'a'a i o outou loto."

"Auā e vaai tagata i le tino, a e  
vaai Ieova i le loto," ioe, o le loto

lava o le tagata o loo feteenai ai uiga eseese o le fiafia ma le faanoanoa; o le loto lē usitai ma le manatu solo i lea mea ma lea mea, o le loto ua fai ma nofoaga o le eleelea ma le taufaa'ole'ole ua matuā tele lava. E silafia lelei mai lava e le Atua o mafaufauga ma manatunatuga lilo uma o le loto o le tagata. Ia e alu atu pea ia te Ia ma lou agaga o loo faapena ona eleelea. Ia e fai e pei ona sa faia e Tavita, ia e faaavanoaina lou loto uma lava i le silafaga a Lē e le mafai se mea ona lilo mai ia te Ia, ma ia e faatoga atu e faapea, “Le

Atua e, ia e su'esu'e mai ia te a'u,  
ma ia e silafia lo'u loto; tofotofo  
mai ia te a'u, ma ia e silafia o'u  
manatunatu; ma ia e silafia po o  
ia te a'u se ala e tigā ai; ma e  
ta'ita'iina mai a'u i le ala o le  
faavavau."

E toatele ua ootia na o o latou  
mafau fau i le upu moni, ua ia i  
latou foliga o le amio Atua, a e  
peitai o latou loto, e le'i oo lava  
ina faamamāina. Ia faapenei ona  
e tatalo, "Le Atua e, ia e faia se  
loto mamā mo a'u; ma ia e  
faafouina se loto mau i totonu ia

te a'u." Ia e faamaoni i lo oulua  
va ma lou lava agaga. Ia e  
faamaoni i ai, ma e pulunaunau i  
ai, e pei ona e faia i lou lava olaga  
faaletino pe afai ua oo mai i ai se  
faalavelave e faamata o le a  
faaumatia ai. E gata ona maua o  
le tonu o lenei mataupu i le va o  
oe lava ma le Atua; e maua ai le  
iuga tumau mo lou lava agaga. Pe  
afai ua ia te oe se faamoemoe ua  
le faavae tonuina, e i'u atu lava i  
le faafanoina o oe.

Ia e su'esu'e i le Afioga a le Atua  
ma le tatalo. O le Afioga lea na te

tuuina atu i ou luma, i le tulafono  
a le Atua ma le soifuaga o Keriso,  
o faavae ola o le amio paia, a  
aunoa ma lea, “e leai se tasi na te  
iloa atu le Alii.” Na te faaali tino  
mai le agasala; na te faaaliali  
manino mai le ala o le faaolataga.  
Inā e faalogo atu i ai; auā o le  
siufofoga lava lena o le Atua o loo  
fetalai mai i lou agaga.

Ina ua e vaai atu i le uiga  
mata'utia o le agasala, ma ua e  
mautinoaina lou lava uiga moni e  
pei ona silafia mai oe e le Atua,  
'aua ne'i e soona faalotovaivai ai.

O tagata agasala na afio mai ai  
Keriso e faaolaina. E le tau  
faaleleia le Atua ia i tatou,  
auā—oi se alofa uiga 'ese!—ua  
avea Keriso ma ala tāua ua  
“faaleleia ai e le Atua le lalolagi ia  
te ia.” O le alofa mutimutivale ma  
le alofa tunoa o Lona finagalo o  
loo Ia tosina atu ai Lana fanau  
agasala ia te Ia.

E leai se matua faalenei lalolagi e  
tusa lona onosa'i i uiga le tonu  
ma amio sesē e faia e le fanau ma  
le onosai o le Atua mo e ua Ia  
saili e laveaiina. E leai se tasi na te

faapea ona pulunaunauina ma le mutimutivale sē ua agasala. E leai ni laugutu faaletagata e maua mai ai ni olega o le alofa mutimutivale i se tagata taasē e faapei o afioga e maua mai le Atua. O Ana folafolaga uma, ma Ana lapataiga, ua na ona mānavaina mai ai o le alofa e le mafaatusaina.

Pe afai e o'o ane Satani ma na faailoa atu ia te oe e faapea, o oe o se tagata ua matuā agasala tele, ia e tepa a'e loa i lou Faaola ma e talatala i Lona alofa tele, ma Lona

faamaoni, ma Lona mana. O le mea lava e tasi o le a fesoasoani ia te oe, o lou vaai a'e lea i Lona malamalama. Ia e ta'utino atu pea, o oe o le tagata agasala; a e peitai ia e faaali atu lenei upu i le fili, "Na maliu mai Keriso Iesu i le lalolagi, na te faaolaina o e agasala," ma o le mea lava lea ua e mautinoa ai, o le a faaolaina lava oe i Lona alofa silisili. Sa fesili atu Iesu ia Simona i se fesili e uiga i ni tagata nonō tupe e toalua. O le tasi o i la'ua sa nofo aitalafu i lona matai ni nai tupe itiiti, a o le tasi sa tele lava lana

aitalafu; a e peitai na  
faamagaloina uma i la'ua e ia, ona  
fesili atu ai lea o Keriso ia  
Simona, po o ai o lenei toalua e  
sili ona alofa i lo la matai. Na tali  
mai Simona, “Ai lava o lea na  
faamagaloina atu ana mea e tele.”

Ua tatou agasala a'ia'i lava, a e  
peitai ua maliu Keriso ina ia  
faamagaloina i tatou. O le aogā o  
Lona faasatauroina, ua lava lea e  
puluvaaga a'i i tatou i le va ma le  
Tamā. O e ua Ia faamagalo tele i  
ai, o le a tele foi ona latou alolofa  
atu ia te Ia, ma o le a sili i latou

nei ona tutū latalata atu i Lona  
nofoālii e vivii atu ia te Ia ona o  
Lona alofa tele, i le ma le taulaga  
ofoofogia na Ia saunia. O ona po  
lava tatou te matuā iloa tino ai le  
alofa o le Atua, o le a sili foi ona  
tatou mautinoa lelei ai o a tatou  
agasala. Pe afai tatou te vaai atu i  
le umi o le filifili ua tuutuu ifo i  
lalo nei mo i tatou; pe a tatou  
malamalama atili foi i le taulaga  
lē fai tuāoi na saunia e Keriso mo  
i tatou, o le a faamalūlūina ai o  
tatou loto i le mutimutivale ma le  
nutimomoia.



## Mataupu E IV—O le Faaali Atu o Agasala

O le ufiufi lona solitulafono, e le manuia o ia; a o lē ua faaali ma lafoaiina, e alofagia o ia.”

O ala e maua ai le alofagiaina o i tatou e le Atua, e faigofie lava, e tonu foi ma e tatau. E le finagalo le Atua i lo tatou faia o se mea e tigā ai ina ia maua ai e i tatou le faamagaloina o a tatou agasala. E le ao ona tatou faia o ni malaga uumi ma le fitā i le Nuu Paia po o se tasi mea, po o le faia foi o ni faasalaga tigā, ina ia ta'uleleiina

ai o tatou agaga i luma o le Atua  
o le lagi, pe ina ia togisalaina ai o  
tatou soligātulafono; a e peitai o  
lē ua faaali ma lafoaiina lana  
agasala, e alofagia o ia.

O loo faapea mai le aposetolo, “Ia  
fefaaaliai a outou agasala, ma  
tatalo le tasi mo le tasi, ina ia  
faamaloloina outou.” Ia faaali atu  
a outou agasala i le Atua, auā ua  
na o Ia lava Na te mafai ona  
faamagaloina; ma ia faapea foi  
ona outou fefaaaliai o mea ua  
outou feagaleagai ai. Pe afai ua e  
agavale atu i sau uō, po o sē lua

te tuāoi, ia e ioe i lou sesē, i le o ia  
foi ua tatau ona matuā  
faamagaloina loa oe. Ona e saili  
atu lea i le faamagaloga mai le  
Atua; auā o le uso na e agavale i  
ai, e ā le Atua ia; i le talu ai ona  
ua e faatigā ia te ia, o lea ua e  
agasala atu ai foi i Lē na Ia faia o  
ia ma faaola ia te ia. I le o le a  
faapea ona faaooina atu o lenei  
mataupu i luma o lo tatou Fautua  
moni e toatasi, o lo tatou  
Faitaulaga Sili lea, o Lē na  
“faaosoosoina i mea uma pei o i  
tatou, a ua leai se agasala ia te ia,”  
ma o Ia foi e “tigā alofa faatasi ma

i tatou i o tatou vaivai,” o Ia Na te mafaia ona faamamā mai ia i tatou i le leaga uma o le agasala.

O i latou o e ua latou le faamaulalo atu o latou agaga i luma o le Atua i lo latou faaali atu o a latou agasala, ua latou le'i faataunuuina le laasaga muamua o le faamaga-loina. Pe afai tatou te le'i maua le salamō moni, o le salamō lea “e oo i le ola e le toe salamō ai,” ma ua tatou le'i faaali atu a tatou agasala ma le faamaulalo moni, ma le loto momomo, ma le matuā 'ino'ino i

ai, ua ia i tatou faailoga o le lē sailia faamaoni o le faamagaloina o a tatou agasala. I le pe afai ua tatou le'i saili atu, ua tatou le'i maua foi le manuia mai le Atua. O le ala lava e tasi ua tatou le maua ai le faamagaloina o a tatou agasala ua mavae, ona ua tatou mumusu ina ia faamaulalo atu o tatou loto i Ona luma, ma tatou savavali e tusa ma le faasinoga ua i ai i Lana upu moni.

O loo i ai lava le faatonuga malamalama e uiga mo lenei mataupu. O le faaalua o agasala, e

tusa pe ua faia faaaliali i luma o tagata, pe ua faia faalilolilo i le va o le tagata ma le tagata, a e maise foi o le va o le tagata ma le Atua, a ua tatau lava ona faia ma le loto ua ootia faamaoni, ma ia faia foi ma le matuā loto malie ato'atoa. E le tatau ona soona uuna'ina malosi le tagata agasala. E le aogā foi ona faia o se faaaliga i se ala soona fai ma le lē faaeteete, po o le faamalosia foi mai ē o loo latou le o lagona le loto 'ino'ino i le uiga o le agasala. O le ta'utinoga ua sau mai le totonugalemu o le agaga, o le a maua lava lona ala i

le Atua o le alofa mutimutivale e leai sona gataaga. O loo faapea mai Tavita, “Ua latalata mai Ieova i e ua loto momomo; ua ia faaola foi i e ua loto nutimomoia.”

O le ta'utinoga ua faia ma le faamaoni, e le fe'alofai, a e peitai e sunu'i tonu i le uiga o le 'aleu o loo nofosala ai le tagata. Pe afai o ni agasala e faasino tonu i le va ma le Atua, o le a na o le Atua e faaali atu i ai; po o ni sesē i le va ma nisi tagata ua agasala i ai, ona faaali lea i ia tagata taitoatasi; po o ni sesē i luma o le toatele, ona

faapea foi lea ona tatau ona ta'utino atu i luma o le toatele. A e peitai o faaaliga uma o a tatou agasala, ia matuā faia ma le mautinoa lelei, ma ia sunu'i tonu i lea lava sese o loo tatou nofosala ai.

I ona po o Samuelu, na sē 'ese ai le fanauga a Isaraelu mai le Atua. Sa puapuagatia i latou, o le fua o a latou lava agasala; auā na latou lafoai le faatuatua i le Atua, na latou le vaai atu i Lona mana ma Lona poto Na te mafai ona ta'ita'iina ai o le nuu, na latou le

talitonu foi i le fai mea mafai o le Atua Na te puipui mai ma taofi mau ai i latou e tusa ma Ona ala. Na liliu 'ese i latou mai le Tupu o le aoao o mea, ma sa manana'o i latou ina ia pulea i latou e pei o isi nuu sa latou tuāoi ai. Na faato'ā maua e i latou le filemu ina ua latou faaali tonu e faapenei: “Ua matou faaopoopoina i a matou agasala uma lenei mea leaga, ina ua matou faatoga atu ai i se tupu mo i matou.” O le agasala tonu lava na latou nofosala ai, o lea sa ao lava ona fai tonu i ai la latou

ta'utinoga. Sa mafatia o latou loto  
ona o lo latou uiga lē faafetai, ma  
o lea foi ala ai ona latou momotu  
'ese ma le Atua.

E le taliaina e le Atua le faaalua o  
a tatou agasala pe afai a e aunoa  
ma le matuā salamō faamaoni,  
atoa ma le faafouina. Ua tataua  
ona matuā suia le amio; ia lafoai  
'ese mea uma e leaga i le silafaga  
a le Atua. O le fua lena o le  
salamō moni mai le agasala. Ua  
manino lava ona tuuina mai i o  
tatou luma o le vaega a i tatou e  
ao ina tatou faia: “Inā fafano ia

outou, inā faamamā ia outou;  
faate'a 'ese ia a outou galuega  
leaga i o'u luma, soia tou te fai  
mea leaga. Ia outou faamasani i le  
amio lelei, sailiili ia i le  
faamasinoga; ia outou faasaoina  
lē ua sauāina, ia faamasino i lē ua  
mātuaoti, ia outou finau mo le  
fafine ua oti lana tane.” “Afai e  
faafoi e lē ua amio leaga le mea e  
tuu faafaatau, ma toe avane le  
mea na ia fao, ma ia savali i  
sauniga e ola ai, ma ua le fai le  
amio leaga; e ola lava ia, e le oti.”  
O loo faapea mai foi le upu a  
Paulo, a o tautala o ia i le galuega

o le salamō: “Na tigā outou e tusa i le Atua, ua tele lava le filigā na tupu ai ia te outou, i le ma le faatonu, i le ma le loto tigā, i le ma le mata'u, i le ma le naunau tele mai, i le ma le maelegā, i le ma le tau'i atu. Ua uma ona faailoa outou e outou ua outou mamā i lena mea.”

Pe afai ua faanenefuina e le agasala le vaai faaleagaga, o le a le mafaia e le tagata fai mea sesē ona iloa o ona uiga leaga, ma o le a le pupula foi ia te ia le anoanoai o le leaga ua na faia; i le pe afai e

le gaua'i atu o ia i le mana  
faatonu o le Agaga Paia, o le a  
tumau ai pea lava o ia i le  
faatauasoia i ana agasala. E ui  
foi ina o le a faaali atu ni ona  
leaga, a e o le a le faia ma le  
faamaoni, na te le matuā lagona  
foi. O ni sesē o le a ia ioe atu i ai,  
a o le a tatau foi ona  
faaopoopoina i lana ta'utinoga  
ma ni faamatalaga e tau faasao ai  
ia te ia, e faapea, ana le seanoa lea  
mea ma lea mea, po ua ia le faia  
le amio sesē o lo ua a'oa'iina ai o  
ia.

Ina ua mavae ona 'aina e Atamu ma Eva o le fualaau na faasaina, ona faatumuina ai le o o la loto i le masiasi ma le mata'u. O le mea na mua'i o'o ane i o la mafaufau, o le saunia lea o sa la faamatalaga ina ia faasaoina ai i la'ua mai le sala mata'utia o le oti. Ina ua fetalai mai le Atua e uiga i la la agasala, na tali atu loa Atamu, ma na lafoina le tasi vaega o lona leaga i le Atua, a o le tasi vaega ua ia tuu atu i luga o le fafine, e faapea, "O le fafine na e au mai ia te a'u, ua na au mai ia te a'u le fua o le laau, ona ou 'ai ai lea." A o le

fafine foi ia, ua na tuua'i le leaga i  
le gata, ma ua faapea ane o ia,  
“Na faasesē mai le gata ia te a'u,  
ona ou 'ai ai lea.” O lenei  
faamatalaga a le fafine i le  
māfuaaga o lana agasala o loo  
aliali mai ai peiseai o ni fesili ua  
ia tau tuua'i atu ai i le Atua le  
leaga ua ala ai ona la pau'ū: O le a  
le mea na E faia ai le gata? O le a  
foi le mea na E faatagaina ai le  
gata e sau i Etena?

O lenei loto fia tonu ua māfua ia  
Satani, le tamā o le pepelo, ma ua  
aliali mai pea lava i le uiga ma le

amio a le fanau uma a Atamu. O ta'utinoga ua faapenei ona faia, ua le galueaiina e le Agaga o le Atua, ma o le a le talia foi e le Atua. O le salamō moni e ta'ita'iina ai le tagata ia na tauaveina lana lava agasala, ma ioe atu lava i ai e aunoa ma le fe'alofai po o le fia nātia o se mea. E pei lava o le telona, na le mafai ona tepa a'e ona mata i le lagi, a ua faapea atu, "Le Atua e, ia e alofa mai ia te a'u le tagata agasala." O i latou uma o e ua ioe i o latou sesē, o le a ta'uamiotonuina i latou; auā o le a

fautua lava Iesu i luga o le aogā o Lona toto mo le agaga ua salamō.

O tala tusia o loo i le Afioga a le Atua e uiga i le salamō moni ma le agamaulalo, ua faaalia mai ai le agaga moni o le faaali atu o agasala, o le agaga lea na te le taumafai e puipui pe faalelei i sesē ua faia, e aunoa lava foi ma le loto fia tonu. Sa le'i taumafai Paulo e puipui pe faasao ia te ia, a e sa na faaalia le ato'atoa o le leaga o lana agasala, e aunoa lava ma se tau faamāmāina. Ua ta'utino mai e ia e faapenei: “Ona

ou puipuia lea o le 'au paia e  
toatele i fale puipui; na fasiotia  
foi i latou, ua ou faaopoopo i ai.  
Na ou tauī soo atu foi ia te i latou  
i sunako uma lava, ma ou  
tauanau atu ai ia latou upu leaga  
ia Iesu; na ou faavalemalosi atu  
foi ia te i latou, ua ou sauā atu ua  
oo lava i aai ese.” Ua le  
faagesegese o ia i ta'utino mai,  
“Na maliu mai Keriso Iesu i le  
lalolagi, na te faaolaina o e  
agasala; ua sili musa a'u nei ia i  
latou.”

O le loto maualalo ma le  
nutimomoia, ma ua gaua'i atu i le  
salamō moni, o le a na taliaina ma  
le fiafia, atoa ma le faafetai, le  
alofa o le Atua ma le togisala  
faigatā na saunia i Kolokota; i le e  
pei ona faaali atu e se atalii lona  
sesē i se tamā alofa, o le a faapea  
lava foi ona 'aumaia e lē ua  
salamō moni o ana agasala uma i  
luma o le Atua. I le ua tusia foi e  
faapea, "A e afai tatou te faaali a  
tatou agasala, e faamaoni o ia, ma  
le amiotonu e faamagalo ai a  
tatou agasala, ma faamamā mai ia  
i tatou i amioletonu uma lava."

## Mataupu E V—O le Faapaiaina o le Olaga

Ua folafola mai e le Atua e faapenei, “E saili mai outou ia te a'u, tou te maua foi, pe a outou saili mai ia te a'u ma outou loto atoa.”

E ao lava ona tuuina atu atoatoa le loto i le Atua, auā pe a leai, o le a le mafai lava ona faataunuuina i totonu ia te i tatou o le liuga ma le faafouina e toe maua ai e i tatou Lona faatusa. Pe a fuatia i lo tatou uiga faaletagata, ua tatou tete'a lava ma le Atua. O loo

faamatalaina mai lo tatou uiga e le Agaga Paia i upu faapenei: “O outou foi lava o e na oti i amio leaga ma agasala;” “O loo ma'i le ulu uma, o loo vaivai le loto uma;” “E afua i le alofivae e oo lava i le ulu, e leai se mea ua sao.” Ua taofituina i tatou i mailei a Satani, o i tatou “o e ua maua e ia, ina ia faia lona lava finagalo.” O le finagalo o le Atua, Na te fia faamalolo ia i tatou, ma faasa'olotoina i tatou. A e peitai e le mafai ona faataunuuina o lea finagalo alofa, vaganā ona ua liua ato'atoa i tatou, ma ua faafouina

lo tatou uiga atoa uma, o lea ua  
ao ai ona tatou matuā gaua'i atu  
ia te Ia.

O le taua ua sili i lo taua uma ona  
faigatā, o le taua lea o loo tau ai le  
tagata ma ia lava. O le gaua'i atu  
o se tasi, ma tuuina atu atoatoa o  
ia i le finagalo o le Atua, o se  
tauiviga faigatā lava lea; a e peitai  
ua ao lava ona faato'ilaloina le  
agaga i le Atua, i le faato'ā mafai  
ona faafouina ai e tusa ma le  
tapulaa o le paia.

Ua le faavaeina le faigā malo a le Atua i le soona gaua'i ma le pouliuli, po o se pule faaletaupulea, e pei ona tau faasesēina ai o i tatau e Satani. A e peitai ua faavaeina i luga o mataupu malamalama e pupula gofie i le mafaufau, e vave lagona foi i le loto fuatia ifo. O lea ua valaau atu ai le Atua i le fanau a tagata o e na Ia faia, "O mai ia, ina latou filifili ia." Na te le uuna'ina malosi loto o Lana fanau. Na te le mafai ona taliaina o se faaaloalo ua le o faia ma le loto, atoa ma le mafaufau i ai. O

se gaua'i tauanauina o le a taofia  
ai lava le aga'i i luma ma le  
faalauteleina o le malosi faale  
mafauafau ma uiga tāua tau le  
amio, ma o le a avea ai le tagata  
ma sē ua gaoioi e aunoa ma le  
mafauafau. E le o le faatatauga lea  
a le Atua. O Lona finagalo moni  
lenei mo le tagata, lē ua avea ma  
faapalega o Ana galuega uma, ia  
'ausia e ia le tapulaa aupito  
maualuga o le faalauteleina o ona  
malosi uma lava. Ua ia tuuina  
mai i o tatou luma le maualuga o  
le faamanuiaga ua Ia finagalo e  
faaooina atu i ai tatou i le

fesoasoani mai o Lona alofa  
tunoa. Ua Ia valaau mai ia i tatou  
ina ia tatou tuuina atu i tatou ia te  
Ia, ina ia Na galueaiina Lona  
finagalo i totonu ia i tatou. I le ua  
tuu mai nei ia i tatou ia tatou  
filifili, po o le a faasa'olotoina i  
tatou mai le nofo pologa i le  
agasala, ina ia tofusia faatasi ai  
tatou i le sa'olotoga matagofie ua  
tatau mo e ua ta'ua o atalii o le  
Atua.

Pe afai o le a tuuina atu i tatou i le  
Atua, ua tatau lava foi ona tatou  
tuu 'eseina o mea uma lava e

faamata o le a faaeseeseina ai i tatou ma Ia. E pei ona fetalai mai o le Faaola, “E faapea foi so outou e le lafoai ana mea uma, e le mafai ona fai o ia mo'u soo.” Soo se mea lava e faamata o le a tosina 'ese ai le loto mai le Atua, ia tuu 'ese lava. Ua avea lava mamone ma tupua o le toatele. O le naunau i tupe, ma le mana'o i oloa, o le filifili auro lea ua noatia ai i latou ia Satani. O se tasi foi vasega e toatele o tagata ua atua lava i latou i le ta'uleleia ma viiga faalelalolagi. O nisi foi ua fai ma o latou tupua le sailia o le olaga

faafifilemu ma le saogalemu mai  
le tauaveina o avega tatau faale  
olaga nei. A e peitai ua tatau lava  
ona gausia o nei noataga uma o le  
faapologaina. E le mafai ona  
vaeluaina i tatou i le Atua ma le  
lalolagi. E le aveia i tatou ma  
fanau a le Atua, vaganā ona ua  
tuuina atu atoatoa i tatou ia te Ia.

O loo i ai nisi o e ua faapea, o loo  
latou auauna atu i le Atua; a e  
peitai o loo latou faalagolago ifo i  
lo latou lava malosi, ma a latou  
lava galuega faaletagata latou te  
taumafai ai e tausii i Lana

tulafono, ma faatonu tonuina ai la latou amio, ma maua ai le faaolataga. Ua le o pulunaunauina i latou i se alofa loloto ia Keriso ua lagona i o latou loto, a ua latou tausisi atu i le faiga o amio e ao ina faia e le tagata Kerisiano, e tusa ma mea ua poloaiina mai e le Atua, ina ia latou maua ai le ola e faavavau. E leai se aogā o le auauna atu i le Atua i ala faapea.

Pe afai ua afio Keriso i totonu o le loto, o le a faapea ona faatumuina ai o lea tagata i Lona alofa, ma le

olioli i le mafutaga faatasi ma Ia,  
o le a vivili atu ai lava lona agaga  
ia te Ia; i le o le mafaufau atu ia  
Keriso, o le a galo ai le manatu ifo  
o le tagata lava ia ia te ia. Ona  
avea ai lea o le alofa ia Keriso ma  
puna o le auauna atu o lea tagata  
i lona Matai. O i latou o e ua  
pulunaunauina e le alofa o le  
Atua, latou te le manana'o ina ia  
fuapau ona latou faia o mea ua  
finagalo i ai le Atua; latou te le  
malilie foi i se tapulaa maualalo o  
le auauna atu, a e peitai ua  
faasaga atu o latou mafaufau ina  
ia latou faia mea ua sili ona

atoatoa e tusa ma le fmagalo o lo latou Faaola. Latou te tuuina atu lo latou malosi uma ma le loto faamaoni, ma o lo latou loto naunau foi o le a feagai lelei ma le tāua o le mea o loo latou sailia. O le ta'uta'u atu e se tasi o le suafa o Keriso, a e na te le o lagona lenei alofa loloto, ua na o ni upu fai fua, ua na o le faamatagofieina o fafo, ua avea foi o se avega mamafa ua faafafaina.

Po ua e manatu ea, o se taulaga ua sili atu ona tele ma le faigatā pe a e gaua'i atu atoatoa ia

Keriso? Ia e fesili ifo ia te oe lava i lenei fesili, “Se a se mea ua foaiina mai e Keriso mo a'u?” Na tuuina mai e le Alo o le Atua mea uma—o Lona soifua, ma Lona alofa, ma le faapuapuagāina o Ia—o mea uma ia ua faatauina a'i le olataga mo i tatou. O lea la, o i tatou tagata faatauva'a ma le lē tusa ai pe a faatatauina i le tele o Lona alofa, pe mafai faapefea ona tatou taofia o o tatou loto mai le Atua? O itula uma o lo tatou ola ua faamaligi mai ai pea i o tatou luga le faamanuiaga mai Lona alofa tunoa, i le o le pogai foi lea

ua le mafai ai ona tatou  
mautinoaina o le fua atoa o le  
loloto o le pouliuli ma le malaia  
tele ua laveaiina mai ai i tatou. Pe  
mafai ea ona tatou vaavaai atu i  
Lē na manu'a ona o a tatou  
agasala, a o tatou o  
faaleamaniaina pea le tele o  
Lona alofa ma le taulaga na Ia  
saunia? Pe a tatou manatunatu i  
le matuā faamaulaloina o le Alii o  
le mamalu, po o le a tatou  
muimui ea ona ua gata i le  
finafinau ma le faafiti ia te i tatou  
lava ona mafai ai ona tatou oo atu  
ai i le ola?

O loo faapea ona fesilisili ifo o nisi e toatele o e loto faamaualuga, “Ona o le a ea ua ao ai ona ou matuā salamō ma faamaulalo, i le faato'ā mafai ona lagona ai i lo'u loto le faamaoni o le taliaina o a'u e le Atua?” Ou te faasino atu nei outou ia Keriso. E le'i agasala o Ia, i le ma le tasi mea e sili atu ai, o Ia o le Alii o le lagi; a e peitai, talu ai le tagata, na faaeeina atu ai ia te Ia le agasala a le lalolagi. “Na faitauina o ia faatasi ma e pagotatā; na ia tauaveina foi le agasala a tagata e

toatele, ua fautua foi o ia mo e solitulafono.”

A e po o a ea ni mea tatou te lafoaiinn pe a tatou gaua'i atu atoatoa ia te Ia? Ua na o o tatou loto ua faaeleeleaina e le agasala, e tuuina atu ia Iesu ia Na faamamāina, ma fufuluina i Lona lava toto, ma faaolaina i Lona alofa lē fai tuāoi. A e ui lava i lea, o loo manatu pea le fanau a tagata, o se mea e matuā mamafa lava le tuuina atu atoatoa o i latou i le Alii! Na o lo'u masiasi ai

i faalogo i upu faapenei, ou te mā  
foi i tusia nei upu.

Ua le finagalo le Atua ina ia tatou  
lafoaiina se mea e tasi e aogā ia te  
i tatou. O mea uma lava e faia e  
Ia, Na te silasila pea lava i mea e  
lelei ma manuia ai Lana fanau.  
Maumau pe ana se'i mafai ona  
mautinoaina e i latou uma o e ua  
latou le filifilia Keriso e fai ma o  
latou Faaola, o loo ia te Ia le  
manuia e fia tuuina atu mo i  
latou, o le manuia ua sili mamao  
atu lava lona tāua i lo lea o loo  
latou sailia mo i latou. Ua tele

lava ona faaleaga ma amioletonu  
le tagata ia te ia lava pe a faasaga  
'ese ona mafaufauga ma ana  
galuega mai le finagalo o le Atua.  
E leai lava se fiafiaga moni ma le  
tumau e maua i le ala ua uma ona  
faasaina mai e Lē ua sili Lona  
poto, ma o loo fuafuaina e Ia mea  
e gata ona lelei ai o le fanau a  
tagata. O le ala o le agasala, o le  
ala foi lea o le faavauvau ma le  
faafanoga.

O se sesē tele o i tatou pe a tatou  
taliaina le manatu e faapea, e  
fiafia le Atua pe a silasila mai o lo

ua mafatia Lana fanau. O i latou  
uma o e o nonofo i le lagi, o loo ia  
te i latou lenei faanaunauga  
tumau, ia maua e tagata le olaga  
fiafia. E le punitia e le Atua ala o  
le fiafiaga i soo se tasi lava o Lana  
fanau. A o lenei le finagalo alofa  
faalelagi, ia tatou 'alo 'ese i nisi  
uiga ua faaigoaina sesē o fiafiaga,  
a e mulimuli ane o le a mafatia  
ma faanoanoa ai i latou, ma o le a  
punitia ai le faitotoa o le fiafiaga  
moni, atoa ma lo latou  
faamoemoe i le lagi. E taliaina e le  
Faaola o le lalolagi le fanau a  
tagata ma o latou uiga uma e pei

ona latou ō atu ai ia te Ia, o o  
latou mana'oga, lo latou lē  
atoatoa, ma lo latou vaivai. I le e  
le gata ina o le a Ia faamamāina i  
latou, ma faaolaina i latou i Lona  
lava toto, a o le a Ia matuā  
faamalieina foi o faanaunauga o i  
latou uma o e ua latou fiafia e  
amoina Lana amo, ma tauaveina  
Lana avega. O Lona finagalo  
lenei, ia Na tuuina atu le filemu  
ma le malologa i e ō atu ia te Ia  
mo le areto o le ola. E finagalo o  
Ia ina ia na ona tatou faia o mea e  
ao mo le ta'ita'iina a'e pea o o  
tatou laasaga i tumutumu mauga

o le manuia ma le olioli e le mafai  
lava ona oo a'e i ai o i latou o e ua  
faalogogatā. E faato'ā maua le  
fiafiaga moni ma le ola mo o  
tatou agaga pe a tino Keriso i  
totonu ia te i tatou, o Ia o lo tatou  
faamoemoe i le manuia.

E toatele o loo latou fesili mai e  
faapenei, “Pe faapefea ona faia o  
lo'u tuuina atu o a'u i le Atua?” O  
loo e mana'o ina ia e tuuina atu  
oe ia te Ia, a e peitai o loo e  
lagona foi lou vaivai faaleagaga,  
ma lou nofo pologa i le  
masalosalo vale, ma le pulea o oe

e le uiga o lou olaga agasala. O au folafolaga, ma tonu ua maua i lou mafaufau, ua peiseai o ni maea oneone. Ua le mafai ona e pulea o ou mafaufauga, ma ou mana'oga, ma le uuna'ina o oe e ou uiga lilo faaletagata. O lou manatu ifo i au folafolaga lē taunuu, ma au feagaiga lepetia soo, ua vaivai ai lou talitonu i lou lava faamaoni, ona tupu ai lea o lou manatu, e le taliaina oe e le Atua; a e peitai ua le tatau lava ona e tuulafoaiina oe i le faalotovaivai. O le mea e ao ina e malamalama lelei i ai, o le malosi o le loto. O le malosi lea e

pule i malosi uma o loo i le tagata, e maua ai o a tatou tonu, ma fai ai a tatou filifiliga. E faatatauina mea uma i le gaoioi tonu o le malosi o loo i o tatou loto. Ua tuuina mai e le Atua i tagata le malosi faaleloto ina ia latou filifili ai i le va o mea tatau ma mea e le tatau. E le mafai e oe lava ona liua o lou loto, e le mafai foi e oe lava ona tuuina atu i le Atua o lona naunautai; a o le mea e te mafaia, o lou faaaogāina tonu lea o le malosi o lou loto e te filifili ai o le a e auauna atu i le Atua. E mafai ona e tuuina atu ia

te Ia o lou loto, ona galue ai lea o  
Ia i totonu ia te oe i Lona finagalo  
alofa, ina ia e loto ma galue i ai. O  
le a faapea lava ona aumaia o lou  
olaga atoa i lalo o le tausiga ma le  
ta'ita'iga a le Agaga o Keriso; o le  
a avea o Ia ma totonugalemu o  
lou alofa uma ma lou loto gaua'i  
uma, ma o le a ō gatasi ou  
mafaufauga ma Lona finagalo.

O lou mana'o ina ia avea oe ma  
tagata agalelei ma sē ua  
faapaiaina lona olaga mo le Alii, e  
sa'o lava lea ma e lelei, a e peitai  
pe afai o le a e le faia ma ni tasi

laasaga e sili i lo le na ona  
mana'o, o le a le fua mai lava se  
aogā mo oe. E toatele o le a  
faafanoina a o i ai pea lo latou  
naunau ia avea i latou ma tagata  
Kerisiano. Ua le oo mai i latou i le  
tulaga o le gaua'i atu o le loto i le  
Atua. Ua le filifili i latou ia avea  
nei lava i latou ma tagata  
Kerisiano.

O le faaaogāina tonu o le malosi o  
le loto, o le a mafai ona liua  
ato'atoa ai o lou olaga. O lou  
matuā tuuina atu o lou loto ia  
Keriso, ua oulua 'au faatasi ai ma

Lē “e silisili lava i alii sili uma lava, ma faipule, ma e ua malolosi.” O le a e maua mai ia te Ia le faamalosiaga e taofi mauina ai oe, i le o le faafouina pea lava pea o lou gaua'i atu i le Atua, o le a mafai ona e ola ai i le ola toefuataiina, o le ola lea i le faatuatua i le Alo o le Atua.

## Mataupu E VI—O le Faatuatua Ma le Taliaina

Ina ua galueaiina lou loto fuatia ifo e le Agaga Paia, ua tauau nei ina pupula atili ai ia te oe le leaga o le agasala, ma lona malosī, ma lona faasalaga, ma ona mala; ona e vaai atu lava lea i ai ma le 'ino'ino tele. Ua e lagona ua faate'a 'eseina oe e le agasala mai le Atua, ma ua e pologa i le malosī o le leaga. O le tauau ina tetele o le tauiviga i lou fia sola 'ese, o le tauau foi lea ina e lagona ai atili o lou le mafaia o se mea. O manatu lē mamā o loo

pulunaunauina ai oe; e eleelea  
lou loto. Ua e mautinoa nei, ua  
tumu lou olaga i le alofa faapito  
mo oe lava, i le ma le agasala. Ua  
e naunau ina ia faamagaloina oe,  
ma faamamāina, ma  
faasa'olotoina. O loo e fesilisili ifo  
i lou loto, pe se ā le ala o le a  
mafai ona e maua ai o le ō gatasi  
o lau amio ma le finagalo o le  
Atua, ma le faalauteleina i totonu  
ia te oe o Ona foliga.

E tatau ona e maua o le loto ua  
faafilemuina, o le manuia lea o le  
a e lagona pe afai ua ofi atu i lou

agaga le mautinoaga o le faamagaloga, ma le filemu, ma le alofa faalelagi. E le mafai ona e faatauina mai i ni tupe, e te le maua i le malosi o lou mafaufau, e le oo atu foi i ai se poto ua ia te oe. E le mafai i lou lava taumafai ona e maua ai o lea lelei; auā o le mea alofa lava a le Atua ua folafolaina mai ia te oe, “e leai se tupe, e leai foi se tau e faatau a’i.” O lau lava mea, pe a na ona aapa atu i ai o lou lima e taofi mau i ai. Ua fetalai mai le Alii, “E ui lava ina pei o ofu mūmū a outou agasala, e sisina ia e pei o le

kiona; e ui lava ina mūmū ia e pei o le ie ulaula, e avea e pei o fulufulu mamoe.” “Ou te avatu foi ia te outou le loto fou, ma ou tuu i totonu ia te outou le agaga fou.”

Ua uma nei ona e faaali atu o au agasala ma le matuā mana'o o lou loto ina ia tuu 'eseina. Ua tonu i lou loto, o le a e tuuina atu oe i le Atua. O lenei, inā e alu atu ia nei ia te Ia, ma e ole atu ia te Ia ia Na fufulu 'eseina au agasala, ma Na foaiina mai se loto fou mo oe. Ma ia e matuā talitonu loa, Na te faia

lava lea mea mo oe, auā o le mea  
ua Ia folafolaina mai. O le  
a'oa'oga lava lenei sa a'oa'oina e  
Iesu ina o i lalo nei o Ia, e faapea,  
o le mea alofa ua folafolaina mai  
e le Atua, ia tatou talitonu i ai o le  
a tatou maua lava, ona aveā ai lea  
mo i tatou. Na faamaloloina e  
Iesu ma'i o tagata ina ua latou  
faatuatua moni i Lona mana; na  
Ia fesoasoani ia te i latou i mea sa  
latou vaaia, ina ia faatupuina ai lo  
latou talitonu ia te Ia i mea latou  
te le'i mafai ona vaaia, o Lona  
mana lea Na te faamagaloina ai  
agasala. Ua Ia faamanoina mai

lava lenei mea i Lona  
faamaloloina o le tagata sa maua i  
le ma'i supa, na Ia fetalai mai ai,  
“A e peitai ina ia iloa e outou o i  
ai i le Atalii o le tagata i le lalolagi  
le pule e faamagalo ai agasala  
(ona fetalai atu ai lea o ia i le  
supa), Ina tulai ia, ina ave lou  
moega, ma alu i lou fale.” Ua  
faapea foi ona faamalamalamaina  
mai e Ioane evagelia, ina o tautala  
o ia i vavega a Keriso, fai mai, “A  
ua tusia ia mea, ina ia talitonu ai  
outou, o Iesu o le Keriso lava ia, o  
le Alo o le Atua; ina ia maua ai foi

le ola i lona suafa e outou o e talitonu.”

Mai nei tala o loo i le Tusi Paia i le ala na faamaloloina ai e Iesu o e mama'i, e a'oa'oina ai i tatou i le ala tonu tatou te faatuatua ai ia te Ia mo le faamagaloina o a tatou agasala. Se'i o tatou liliu i le tala i le tagata pipili sa ta'oto i le taelega o Petesa. Sa matuā vaivai tele lenei tagata puapuagatia, na te le'i mafai ona faia o se mea e tasi mo ia lava, fai mai na te le'i faaaogāina ona vae i tausaga e tolu sefulu ma le valu. A e peitai

na faatonu atu Iesu ia te ia, “Inā tu ia i luga, 'ave ia lou moega, ma ia e savali.” Sa mafai e lenei tagata ma'i ona tali atu e faapenei, “Le Alii e, se'i E muai faamalolo mai ia te a'u, ona ou usiusitai atu ai lea i Lau faatonuga.” A e peitai e leai, a e na ia talitonu loa i le afioga a Iesu, na ia talitonu loa ua faamaloloina o ia, ona ia taumafai loa lava lea e tu i luga; sa ia te ia le matuā loto atu i le fia savali, ona ia savali loa lava lea. Na faia e lenei tagata e tusa ma le fetalaiga a Iesu, ona tuuina atu loa lea e le Atua o le

malosi ia te ia. Na faamaloloina o ia.

Ua faapena foi ma oe, le tagata agasala. E te le mafai ona toe faatonuina o au agasala ua mavae, e te le mafai ona liua o lou loto ma faapaia ia te oe lava. A e peitai ua folafola mai e le Atua, o le a Na faia nei mea uma mo oe e ala ia Keriso. Ua e talitonu i lene folafolaga. Ua e faaali atu au agasala, ma ua e tuuina atu oe i le Atua. Ua e matuā loto atu e auauna ia te Ia. I le e pei ona e faia o nei mea uma, o le a faapea

lava foi ona faataunuuina e le  
Atua o Lana afioga ia te oe. Pe  
afai ua e talitonu i le  
folafolaga—ua e talitonu lava ua  
faamagaloina ma faamamāina  
oe—o le a faapea lava ona faia e  
le Atua ia te oe. O le a  
faamaloloina oe e pei lava ona sa  
tuuina atu e Keriso i le tagata  
pipili le malosi e savali ai, ina ua  
talitonu lena tagata ua  
faamaloloina o ia. O lou talitonu  
atoatoa o le a faataunuuina ai.

'Aua e te faatali seia e lagona ifo  
ua faamaloloina oe, a e ia e

faapea ifo, “Ua ou talitonu i ai, i le ua faapea lava, e le ona ua ou lagona, a e peitai ona o le folafolaga a le Atua.”

Ua fetalai mai Iesu, “O mea uma lava tou te ole mai ai i a outou tatalo, ina faatuatua ia o le a maua e outou, ona faia lava lea mo outou.” O loo i ai le itu ua faatapulaaina ai lenei folafolaga—o lo tatou tatalo atu lea e tusa ma le finagalo o le Atua. A o le finagalo foi lea o le Atua, ina ia faamamāina i tatou mai a tatou agasala, ia ave a i

tatou Māna fanau, ma ia mafai ona tatou ola i le olaga ua faapaiaina. O lea ua tatau ai ona tatou ole atu mo nei manuia, ma tatou talitonu o le a tatou maua lava, ma tatou faafetai atu foi i le Atua ona ua tatou maua. O le mea foai fuaina lea mo i tatou, ina ua mafai ona tatou ō atu ia Iesu ia Na faamamāina i tatou, ma ia tatou tutū ai i luma o le tulafono ma le leai o so tatou masiasi, po o se loto mafatia. “O lenei, ua leai se faasala i e o ia Keriso Iesu, o e le savavali i la le tino, a e i la le Agaga.”

E amata mai nei ona le toe aiā i tatou ia i tatou; auā ua faatauina i tatou i le tau. “Auā ua outou iloa e le'i togiolaina outou i mea e pala, o le ario po o le auro, . . . a o le toto tāua o Keriso pei o lo le tamai mamoe e le ponā lava, e leai foi sona leaga.” Mai lou talitonu atoatoa i le Atua, ua fanauina ai e le Agaga Paia le ola fou i totonu o lou loto. Ua pei lava oe o se tamaitiiti fou ua fanauina mai i le aiga o le Atua, i le ua alofa mai lava o Ia ia te oe e pei ona Ia alofa i Lona lava Alo.

O lenei ua e tuuina atu oe ia Iesu, 'aua ne'i e toe tuumuli, 'aua ne'i e toe 'ave 'eseina oe mai ia te Ia, a e ia e faapea ifo i aso taitasi uma lava, “O a'u o la Keriso; ua ou tuuina atu o a'u ia te Ia;” ma ia e ole atu ia te Ia ia Na foaiina mai Lona Agaga ia te oe, ma ia Na taofia ma leoleoina pea oe i Lona alofa tunoa. E pei lava ona avea oe ma alo o le Atua talu ai ona ua e tuuina atu oe ia te Ia, ma ua e faatuatua ia te Ia, ia faapea foi ona e ola ia te Ia. Ua faapea mai le aposetolo, “O lenei, faapei ona

outou talia o le Alii Keriso Iesu, ia savavali ai outou o ia te ia.”

O le manatu o nisi e faapea, o loo na ona tofotofoina i latou, o lea ua tatau ai ona latou muai faamaonia i le Atua ua faafouina i latou, i le faatoā tatau ai ona latou tapaina o Lana faamanuiaga. A e peitai e mafai ona latou tapaina nei lava le faamanuiaga mai le Atua. E ao lava ona latou maua o Lona alofa tunoa, ma le Agaga o Keriso e fesoasoani i lo latou vaivai; auā pe a aunoa ma lea, o le a le mafai ona latou tetee atu i

loo leaga. E fiafia lava Iesu ina ia  
tatou ō atu ia te Ia i lo tatou lava  
uiga moni e pei ona i ai nei, o le  
agasala, aunoa ma se malosi, ma  
le faalagolago tele i Lona  
fesoasoani. Ia tatou ō atu pea ia te  
Ia ma lo tatou vaivai uma, lo  
tatou valea, lo tatou uiga agasala,  
ma tatou faapau'ū atu i Ona aao  
ma le loto salamō. O Lona lava  
olioli tele lenei e fusia i tatou i aao  
o Lona alofa, ma fusifusia o tatou  
manu'a, ma faamamā ia te i tatou  
mai le leaga uma.

O le tasi lenei mea e iuvale ai le afe ma afe o tagata: ona ua le talitonu i latou, e faamagaloina i latou taitoatasi e Iesu. Latou te le talitonu i le afioga ua pa'ū mai i le Atua. Ua foaiina atu ia i latou uma o e ua latou uia le ala e tusa ma le faasinoga a le Atua, ina ia latou mautinoa e i latou lava, e foaiina fua mai le faamagaloga a le Atua mo agasala a soo se tasi. Ia tuu 'ese lea masalosalo e faapea, e le faasino folafolaga a le Atua ia te oe lava. O folafolaga mo tagata agasala uma lava ua salamō. Ua saunia e Keriso o

faalumaga o le malosi ma le alofa  
tunoa ina ia tufaina mai e le 'au  
agelu i agaga uma lava o e ua  
talitonu ia te Ia. E leai ni tasi ua  
faapea ona pau'ū maulalo i le lua  
o le agasala o le a le mafai ona  
latou maua ai o lenei  
faamalosiaga, ma lenei  
faamamāina, ma lenei  
ta'uamiotonuina ia Keriso, o Lē  
na maliu mo i latou. O loo  
faatalitali mai o Ia Na te talai  
'eseina o latou ofu ua pisia ma  
faaleagaina i le agasala, ma Na  
faaofuina i latou i ofu sisina o le  
amiotonu. O Lona finagalo lenei

ia latou ola, a e le ina ia latou fano.

E le faia e le Atua ia i tatou e pei ona faia e le tasi tagata i le tasi tagata. O Ona mafaufauga, o mafaufauga o le alofa, ma le alofa mutimutivale e le mafaamatalaina. O loo fetalai mai o Ia, “Ia lafoai e lē ua amio leaga lona ala, ma le tagata agasala ia lafoai e ia ona manatu; a ia foi mai ia Ieova, ona alofa mai lea o ia ia te ia; ia foi mai i lo tatou Atua, auā na te matuā faamagaloina.” “Ua ou sōloia ou

solitulafono e pei o se ao uliuli,  
ma au agasala e pei o se ao.”

“Auā ou te le fiafia lava i le oti o  
lē oti, o loo fetalai mai ai le Alii o  
Ieova; o lenei, liliu mai ia outou  
tou te ola ai.” O loo nofo sauni  
pea Satani na te gaoi 'eseina lo  
tatou talitonu ma lo tatou  
mautinoa lelei o folafolaga tāua a  
le Atua. O lona mana'o lenei, ia  
na aveeseina uma nai  
malamalama mu itiiti o le  
faamoemoe, ma 'ave o le  
malamalama mai le agaga o le  
tagata; a e peitai, 'aua lava ne'i e  
tuuina atu ia faia e Satani lea mea

ia te oe. 'Aua ne'i e faalogologo  
atu i ana faaosoosoga, a e ia e fai  
atu i ai, "Na maliu Iesu ina ia ou  
ola. E alofa o Ia ia te a'u, Na te le  
finagalo foi ina ia ou malaia. O  
loo i ai lo'u Tamā i le lagi e alofa  
mutimutivale; i le e ui ina ua ou  
le tau'i atu ia te Ia e tusa ma Lona  
alofa, ma ua ou soona  
faamaumauina le manuia na Ia  
tuuina mai mo a'u, a e ou te tulai  
nei, ma ou alu atu i lo'u Tamā, ma  
ou fai atu ia te Ia, 'Lo'u Tamā e,  
ua ou agasala i Lē o i le lagi, atoa  
ma Ou luma; ua ou le toe aogā  
ona ta'ua o Lou atalii; ia E ave'a

a'u ia pei o se tasi o Au auauna.' ”  
Ua faailoa mai i lenei faataoto le uiga o le toe taliaina mai o lē na taasē: “Ua iloa mamao atu foi o ia e lona tamā, ona mutimutivale lea o lona alofa, ua momo'e atu ia, ua fusi ia te ia, ma sogi atu ia te ia.”

A e peitai, e ui ina e ootia ma momomo ai loto i lenei faataoto, a e le mae'a mai ai lava le faaaliga o le alofa mutimutivale tele o le Tamā faalelagi. Ua fetalai mai le Atua i Lana perofeta, “O le alofa e faavavau, ua ou alofa atu ai ia te

oe; o le mea lea ua ou  
faafualoaina ai lo'u alofa ia te oe.”  
A o mamao atu pea le tagata  
agasala mai le fale o lona Tamā,  
ma o loo ia faamaumauina Ana  
oloa i le nuu 'ese, a e o loo  
faanaunau atu pea le finagalo o le  
Tamā ia te ia. I le a o naunau atu  
foi le tagata agasala e toe fia fo'i  
atu i le Atua, e le tupu fua lea  
faalogoga, a e peitai ona o le  
galuega alofa a le Agaga o le  
Atua i totonu o lona loto, o loo  
oleole atu ma tauanau atu ia te ia,  
ma tau toso mai lē ua sē i le  
fatafata o lona Tamā.

A o ē feagai ma folafolaga silisili  
ma le tāua o loo i ai i le Tusi Paia,  
pe i ai ea se toe masalosalo ia te  
oe? O lou manatu ea, pe a  
faanaunau atu le tagata agasala e  
toe fia fo'i atu i lona Tamā, ma ua  
na fia lafoai 'eseina ana agasala, a  
e teena malosi o ia e le Atua mai  
le faapa'ū atu i Ona aao ma le  
salamō? Ia e matuā tuu 'eseina  
lava manatu faapea mai ia te oe!  
E leai se tasi mea e sili atu ona  
faaleagaina ai o lou lava agaga i  
lo lenei mea, o lou taliaina o  
manatu sesē faapea e uiga I lo

tatou Tamā faalelagi. E 'ino'ino le Atua i le agasala, a e alofa pea o Ia i le tagata agasala, i le ua avea Keriso ma ala ua foaiina mai ai o Ia e Ia, ina ia laveaiina ai i latou uma o e ua fia sao, ma ia latou ulufale atu i le manuia e faavavau i le malo o le mamalu. O a ni afioga sa mafai ona fetalai mai ai le Atua e sili atu ona malolosi, po o le vaivai foi i lo ia ua Na filifilia e faailoa mai ai Lona alofa ia i tatou? Ua Ia ta'utino mai, “E galo ea i le fafine lana tama ua susu, na te le alofa i le tama a lona lava

manava? ai lava e galo ia te i  
latou, a e le galo lava oe ia te a'u.”

Ia outou tetepa a'e, o outou na o e  
o loo masalosalo ma gatete pea; o  
loo soifua pea lava Iesu Na te faia  
le faiva o le Fautua mo i tatou. Ia  
tatou faafetai i le Atua i Lana mea  
alofa, o Lona Alo pele ua Ia  
foaiina mai; ma ia tatou tatalo foi  
ina ne'i le aogā ia te i tatou le  
maliu o Iesu. O loo valaauina oe e  
le Agaga Paia i le asō. Inā e sau ia  
nei ia te Ia ma lou loto atoa, ma ia  
e aapa atu loa e fai mou Lana  
faamanuiaga.

A o ē faitauina folafolaga a le Atua, ia e manatua, o lo ua faaalia mai ai le alofa naunau ma le alofa tunoa e le mafaamatalaina. Ua tosina mai le finagalo alofa mutimutivale o le Atua i le tagata agasala i le tigā alofa e leai sona gataaga. “O ia foi ua tatou maua ai le togiola i lona toto, o le faamagaloina o agasala, e tusa ma le oloa faulai o lona alofa tunoa.” Ioe, tau lava ina ia tatou talitonu, o le Atua o Ia o lo tatou fesoasoani. Ua Na fia toe faatuina Lona faatusa faaleagaga i totonu

o le tagata. A o ē faalatalata atu ia  
te Ia ma le faaalia o au agasala,  
atoa ma le salamō, o le a Ia sōsō  
mai foi ia te oe, ma Na foi mai ia  
te oe Lona alofa tunoa ma Lana  
faamagaloga.

## Mataupu E VII—O le Tofotofoina o le Ua Fia Avea ma Soo

O lenei, afai o ia Keriso se tasi, o le tagata fou ia; ua mavae mea tuai, faauta, ua faafouina mea uma.”

Atonu o le a le mafaia e le tagata ona ta'uina mai o le aso tonu, po o le mea tonu foi na liua ai o ia; po o le a le mafaia foi e ia ona toe su'esu'e atu i tua i le uiga ma laasaga uma o lona faafouina, a e le faapea o le a avea lea ma ala e ta'ua ai o ia o se tasi e le'i liua. Na

fetalai atu Iesu ia Nikotemo, “E  
agi le matagi i le mea e loto i ai o  
ia, e te faalogo foi i lona agi, a e te  
le iloa le mea e alu atu i ai; e  
faapea i latou uma o e ua fanau  
mai e le Agaga.” E pei o le matagi  
e le mavaaia lona tino, a e  
faalogoina ma vaaia lelei fua o  
lana galuega, e faapea le Agaga o  
le Atua ma Lana galuega i loto o  
tagata. O le mana lea e faafouina  
ai, e le vaaia e mata faaletino, a e  
na te galueaiina le ola fou i le  
agaga; na te faafouina le tagata ia  
foliga i le faatusa o le Atua. E ui  
ina e le mavaaia ma e le gaoiā le

galuega a le Agaga, a e aliali mai lava ona fua.

Pe afai ua faafouina le loto i le galuega mana a le Agaga, o le a molimauina mai lea i le olaga o le tagata. E ui ina tatou te le mafaia se mea ina ia liua ai o tatou loto, pe ina ia faafouina ai i tatou ina ia ō gatasi a tatou amio ma le fmagalo o le Atua; e ui foi ina e le aogā pe a tatou faatuatua ia i tatou lava po o a tatou galuega lelei, a e o le a faaalia lava i o tatou olaga, pe afai o loo mafuta i totonu ia i tatou le alofa tunoa o

le Atua. O le a vaaia se fesuiaiga i  
le uiga o le amio, ma masaniga,  
ma mea e tausisi i ai le tagata. O  
le a matuā iloga lava ona i ai o le  
eseesega i le amio sa faia  
muamua ma le amio o loo faia  
nei. E le faaalia le uiga moni o le  
tagata i ni ana amio lelei, po o le  
lē lelei foi, e faia taitāsitāsi, a e  
peitai e faaalia i le uiga o ana upu  
ma amioga e fai soo.

E moni lava e mafai ona maua o  
foliga o le amio tatau e aunoa ma  
le galuega mana a Keriso e  
faafouina ai. O le fia ta'uleleia, ma

le mana'o ina ia alofagia ma viia e  
isi tagata, o le a maua ai foliga o  
le olaga ua faatonu tonuina lelei.  
O le fia faaeteete ifo foi o le tagata  
lava ia ia te ia e ta'ita'iina ai nisi  
ina ia latou 'alo 'ese mai le uiga  
aliali o le leaga. E mafaia e se tasi  
ua pulea e le agaga o le alofa  
faapito ia te ia lava ona faia o ni  
galuega alofa. Po o le a faapefea  
la ona tatou ma utinoaina o le  
tulaga moni ua tatou i ai?

O ai ua i ai le loto? O ai ua i ai o  
tatou mafau fauga? O ai tatou te  
fia talanoa i ai? O ai ua i ai lo

tatou alofa moni ma lo tatou malosi? Pe afai o ia Keriso i tatou, ua ia te Ia o tatou mafaufauga, ua ia te Ia foi o tatou manatunatuga tāua uma. Ua faapaiaina mo Ia i tatou lava, atoa ma a tatou mea uma. Ua naunau i tatou ina ia tatou tauaveina Ona foliga, ma ia tatou mānava atu i Lona Agaga, ma faia Lona finagalo, ma ia faafiafia ia te Ia i mea uma lava.

O i latou o e ua aveia ma tagata fou ia Keriso Iesu, o le a fua mai i latou i fua o le Agaga, “o le alofa, o le olioli, o le filemu, o le onosai,

o le mataalofa, o le agalelei, o le faamaoni, o le agamalū, ma le lē gaoiā.” O le a le toe faia e i latou e tusa ma o latou tuinanau tuai, a e peitai talu ai le faatuatua ua ia i latou i le Alo o le Atua, o le a latou mulimuli ai i Ona tulagāaao, o le a faalauteleina ia te i latou foliga o Lana amio matagofie, ma o le a faamamāina i latou e i latou e pei ona mamā o Ia. O mea sa latou 'ino'ino i ai, ua latou fiafia nei i ai; a o mea sa latou fiafia i ai, ua latou 'ino'ino nei i ai. O i latou o e sa mitamita vale ma amio faamaualuga, ua

avea nei ma e loto maulalo ma le  
agamalū. O e sa fia tagata ma  
faasāusili, ua faautauta lelei ma  
ua le o toe fia muamua. O le  
tagata sa inu 'ava ua le toe onā,  
ma lē sa soona ulavale ua amio  
mamā ma le filemu. O tu ma uiga  
le aogā o le lalolagi ua tuu  
'eseina. E le sailia e tagata  
Kerisiano “teuga e faia i le tino,”  
a e peitai “o le tagata lilo o le loto,  
ia teua lea i le mea e le pala, o le  
loto agamalū ma le filemu.”

E leai se molimau o le salamō  
faamaoni, vaganā ona ua

galueaiina ai le toe fuataiina. Pe afai na te toe faafoi atu le mea na taofia i le faatau, ma na toe faafoi atu le mea na gaoia, ma faaali atu ana agasala, ma alofa atu i le Atua, atoa foi ma ona uso a tagata, o fua ia o le galuega mana a le Agaga i lona loto o le a mafai ona mautinoa ai e le tagata agasala, “ua oo atu ia i le ola, sa i le oti.”

O i tatou o tagata agasala ma le sesē gofie, a e pe afai tatou te o atu ia Keriso ma ua tatou maua le faamagaloga mai Lona alofa

tunoa, o le a puna a'e loa lava le alofa i o tatou loto. Ona māmā ai lea o avega uma, auā o le amo e tuuina mai e Keriso, e avegofie lea. O le a avea ia soo se tiute ma se galuega ma faafiafiaga, ma o le a avea le taulaga semanū a tigā ai ma mea e olioli ai le agaga. O le ala i o tatou luma sa faapouliuligia muamua, ua faamalamalamaina nei i le susulu mai o 'ave mai le La o le amiotonu.

O le a vaai le matagofie o le amio a Keriso i e mulimuli atu ia

te Ia. Sa fiafia o Ia e faia le  
finagalo o le Atua. O le alofa i le  
Atua, ma le maelegā i le fia faia o  
mea e viia ai o Ia, o mea ia sa  
avea ma malosi na pulea ai le  
soifuaga o lo tatou Faaola. O Ana  
galuega uma na faamatagofieina  
ma teuteuina i le alofa. O le alofa,  
e mai le Atua lea. E le tupu pe  
maua mai lea alofa i le loto e le'i  
faapaiaina. E gata ona maua i le  
loto ua pule ai Iesu. “Ua tatou  
alolofa ia te ia, auā na ia muai  
alofa mai ia te i tatou.” O le alofa,  
o le malosi lava lea e  
pulunaunauina ai galuega uma i

le loto ua faafouina i le alofa  
tunoa. Na te faatonutonuina le  
amio, na te ta'ita'iina mafaufauga  
o le tagata lilo e uunaina ai o ia,  
na te pulea ma taofiofi i tuinanau,  
na te tineia le feitagai, ma na  
faalauteleina atili mafaufauga  
lelei ma le aogā. O lenei alofa pe  
afai ua nofo mau ma ua  
faapelepeleina i le agaga, o le a  
faamatagofieina ai uiga uma o le  
olaga, ma o le a siomia ai le  
tagata i le manogi e manuia ai i  
latou uma o e latou te mānavaina.

E lua lava sesē o loo lamatia ai le fanau a le Atua, ma ua tatau ona latou matuā mataala i ai, a e maise o i latou o e ua faato'ā latou maua le faatuatua i Lona alofa tunoa. O le sesē muamua, e pei ona muai faamatalaina, o le vaai tasi lea i a latou lava galuega, o le faatuatua lea i ni mea o le a mafaia e i latou lava ina ia maua ai lo latou leleiga ma le Atua. O lē ua taumafai ia na 'ausia le tapulaa o le faapaiaina i ana lava galuega faale tulafono, ua na taumafai se mea e le mafaia lava e se tasi. Soo se mea ua loto i ai le fanau a

tagata latou te faia e aunoa ma Keriso, a e faaeleeleaina lava i le manatu faapito ma le uiga agasala. Ua na o le alofa tunoa lava o Keriso, i lo tatou faatuatua i ai, e mafai ona faapaiaina ai tatou.

O lona lua o sesē, i le ua le itiiti foi lona leaga i lo le sesē muamua, o le manatu lea e faapea, o le faatuatua ma le talitonu ia Keriso e tuusaunoaina ai tagata mai le tausiga o le tulafono a le Atua. O le manatu lea ua faasilia ai le faatuatua e

faapea, ua na o lea le ala e tasi  
tatou te maua ai le alofa tunoa o  
Keriso, ona faatauvaaina ai lea o  
galuega peiseai ua leai lava se  
aogā o a tatou galuega i le  
faaolaina o i tatou.

A e se'i faauta mai, o le uiga tonu  
o le usiusitai, ua le na ona ia  
maua ai o se uiga faafoliga o le ō  
gatasi ma le finagalo o le Atua; a  
e peitai o lona aano moni, o le fia  
auauna atu lea ia te Ia mai le alofa  
faamaoni ua pogai mai i le taele o  
le loto. O le tulafono a le Atua, o  
le faaaliga lava lea o Lona uiga

moni; o le feaofaiga lava lea o le mataupu silisili o le alofa, ma o lea foi ua avea ai ma faavae o Lana faigā malo i le lagi, atoa foi ma le lalolagi. Pe afai ua faafouina o tatou loto i le faatusa o le Atua, ma ua totōina le alofa faalelagi i le agaga o le tagata, po ua le tatau ea la ona faataunuuina ai ma galuega o le tulafono i lona olaga? Pe afai ua faavae tonuina i le loto le mataupu silisili o le alofa, ma ua faafouina le tagata i foliga o le Atua, Lē na faia o ia, ona faataunuuina lea ia te ia o le folafolaga faale feagaiga fou, “Ou

te tuuina atu a'u tulafono i o latou loto, ma ou tusi ai i o latou mafaufau." I le pe afai ua tusia le tulafono i le loto, po o le a le foliga faapea ai ea ma le olaga o lea tagata? O le usiusitai—o lona uiga moni, o le auauna atu lea ma le pipii atu i le Atua ma le alofa—o le faailoga moni lava lea o lē ua tatau ona avea ma soo. O lea ua molimau mai ai le Tusi Paia, "Auā o lenei lava le alofa i le Atua, ia tatou tausi i ana poloaiga." "O sē faapea, Ua ou iloa o ia, a e le tausi e ia i ana poloaiga, o le pepelo lava lea, e le

o i totonu ia te ia le upu moni.” E le faasa'olotoina lava i tatou e le faatuatua mai le mataupu o le usiusitai, a o le sa'o, o le faatuatua, ua na o le faatuatua lava, e mafai ona avea ai o i tatou ma ē e tufaina mai i ai le alofa tunoa o Keriso, a o lea foi le malosi o le a faato'ā mafai ai ona tatou usiusitai.

E le maua e i tatou le faaolataga ona o lo tatou usiusitai; auā o le faaolataga, o le mea foai fua lea a le Atua, e gata ona maua i le faatuatua. A e peitai le usiusitai, o

le fua lava lea o le faatuatua. “Ua outou iloa foi na faaalia o ia ina ia aveeseina e ia a tatou agasala; e le o ia te ia foi se agasala. E le agasala se tasi o e tumau ia te ia; o sē agasala ua le vaai o ia ia te ia, ua le iloa foi o ia e ia.” O le faailoga mautinoa lenei. Pe afai ua tatou maua le mafutaga faatasi ma Keriso, ma ua nofo mau le alofa o le Atua i totonu ia te i tatou, o le a o gatasi ai la tatou faalogo, o tatou mafaufauga, ma mea tatou te faia ma le finagalo o le Atua e pei ona faamalamalamaina mai i poloaiga

o Lana tulafono paia. “Le fanau e,  
'aua ne'i faasesē se tasi ia te  
outou; o lē fai le amiotonu, o le  
amiotonu lea, faapei ona  
amiotonu o ia.” O le tapulaa ua  
faamalamalamaina mai ai le uiga  
moni o le amiotonu, o poloaiga  
lava ia e sefulu o le tulafono paia  
a le Atua e pei ona sa tuuina mai i  
Sinai.

O le mea ua ta'ua o le faatuatua ia  
Keriso, a ua fia tatalaina ma  
faasa'olotoina ai tagata mai le  
tiute o le usiusitai atu i le Atua, e  
le o se faatuatua, a e peitai o le

faamaualuga ma le fia pule. “O le alofa tunoa ua faaolaina ai outou i le faatuatua.” A e peitai “le faatuatua, pe afai e le i ai galuega, e mate lava ia ina ua na o ia.” Na faapea le afioga a Iesu ia te Ia lava, a o le'i afio mai o Ia i lalo nei, “Lo'u Atua e, ou te fiafia e fai lou finagalo; o loo i totonu lava ia te a'u lau tulafono.” Ina ua taulata i Lona toe afio a'e i le lagi, na Ia toe molimau ai i Lona tausi faamaoni i le tulafono a le Atua, e faapea, “Pei ona ou tausia poloaiga a lo'u Tamā, ma ou tumau i lona alofa.” O loo faapea

mai foi le Tusi Paia, “O le mea foi lea tatou te iloa ai ua tatou iloa o ia, pe afai tatou te tausī i ana poloaiga . . . o lē faapea o loo tumau ia i totonu ia te ia, e tatau ona savali o lena tagata faapei ona savali o ia.” “Auā na tigāina Keriso lava o le sui o outou, ua tuuina mai ai e ia le faaa'oa'o mo outou, ina ia outou mulimuli atu i ona tulagāaao.”

O loo tumau pea nei le tapulaa o le ola e faavavau e pei lava ona sa i ai i le amataga—o le tapulaa lava lea e pei ona sa i ai i

Parataiso a o le'i pau'ū o tatou uluai mātua—o le usiusitai atoatoa i le tulafono o le Atua, i le ma le amiotonu ua atoatoa. Pe ana faatagaina mai le ola e faavavau i soo se tasi tapulaa e maulalo i lo lenei, po o penei ua faaumatia le fiafiaga o le aoao o mea. Semanū lava a avanoa ai le ala mo le faatumauina e faavavau o le agasala ma lona faasologa uma lava o le tagi auē ma le pagātia.

Sa mafaia lava e Atamu, a o le'i pa'ū o ia, ona maua o le amiotonu

i lona usiusitai i le tulafono a le Atua. A e peitai, na ia le faaaogāina lena avanoa, i le talu ai lana agasala, ua mavae ai ia te i tatou le uiga mamā, ma ua le mafai ai e i tatou ia i tatou lava ona 'ausia o le tapulaa o le amiotonu. Talu ai ina ua tatou agasala, ma ua tatou le paia, ua tatou le mafai ai ona usiusitai atoatoa i le tulafono paia a le Atua. Ua leai sa tatou lava amiotonu ina ia mafai ona tatou faafesagai lelei ai ma le tulafono. A e peitai ua saunia e Iesu se ala ina ia mafai ona tatou sao ai. Sa

soifua o Ia i le lalolagi nei i totonu  
o tofotofoga ma faaosoosoga e pei  
ona feagai ai o i tatou. Sa soifua o  
Ia i le soifuaga ua aunoa lava ma  
se agasala. Na maliu o Ia mo i  
tatou, i le o lenei ua ofo mai o Ia  
Na te tauaveina a tatou agasala, a  
e 'aumai mo i tatou Lana  
amiotonu. Pe afai o le a e tuuina  
atu oe ia te Ia, ma e taliaina o Ia ia  
avea mōu Faaola, e ui lava ina  
agasala tele lou olaga, a o le a  
faitauina oe o sē ua amiotonu ona  
o Ia. O le a tu mai le amio a  
Keriso e sui a'i lau amio, ona talia

ai lea o oe i luma o le Atua e pei  
lava e te le'i agasala.

E le gata i lea, a e liua e Keriso le  
loto. E afio o Ia i lou loto i le  
faatuatua. Ia e tausia pea lenei  
fesootaiga ma Keriso i le  
faatuatua, ma le tuuina atu pea o  
lou loto ia te Ia; i le a o faapea ona  
e faia, o le a galue o Ia i totonu ia  
te oe, ina ia e loto atu ma ia e faia  
mea uma e tusa ma Lona finagalo  
alofa. O lea o le a mafai ai ona e  
faapea ifo, "O le ola foi ou te ola  
ai nei i le tino, ou te ola ai lava i le  
faatuatua i le Alo o le Atua, o lē

na alofa mai ia te a'u, ma foaiina mai o ia e ia e fai mo'u sui." Sa faapea foi ona fetalai ane o Iesu i Ona soo, "Auā e le o outou e tautala atu ai, a o le Agaga o lo outou Tamā e tautala mai ai i totonu ia te outou." O lea, ina ua galue Keriso i totonu ia te oe, o le a faaalua ai lea lava agaga e tasi ia te oe, ma o le uiga foi lea o galuega o le a e faia—o galuega o le amiotonu ma le usiusitai.

O lea la, ua leai lava se mea o i totonu ia i tatou e tatau ona tatou mitamita ai. Ua leai lava se ala e

tatau ai ona tatou faamaualuluga.  
E tasi pē le faavae o lo tatou  
faamoemoe, o le amiotonu lea a  
Keriso ia Na foaiina mai e ufitia  
a'i a tatou agasala ua mavae, i le  
ma le amiotonu foi e galueaiina  
pea e Lona Agaga i totonu ia te i  
tatou.

A o tatou o tautala i le upu  
faatuatua, ia tauave pea i o tatou  
mafau fau le faamaninoga o lenei  
lava upu. E i ai le tasi ituaiga o le  
talitonu e matuā vāvāmamao  
lava ma le faatuatua. O le i ai o le  
Atua, o Lona Mana, ma le

faamaoni o Lana Afioga, o mea lava ia e le mafaafitia, e oo lava foi ia Satani ma lana auao, latou te le mafafai ona faafiti i ai mai totonu lava o o latou loto. O loo molimau mai le Tusi Paia e faapea, “Ua talitonu foi temoni ma latou tetemu;” a e peitai o le talitonu lea e 'ese i lo le faatuatua. Pe afai ua le gata i le na ona talitonu o le tagata i le Afioga a le Atua, a ua faato'ilaloina foi ia te Ia ma le malosi o lona loto, ua gaua'i atu atoatoa ia te Ia, ma ua taulai uma atu ona faanaunauga ia te Ia, ona i ai lea ma le

faatuatua—o le faatuatua lea e matuā galue i le alofa, ma e faamamāina ai le agaga. Mai lenei faatuatua o le a faafouina ai le loto i le faatusa o le Atua. Ina o tumau pea le loto i lona uiga tuai a o le'i faafouina, sa le mafai ona fiafia ma usiusitai i le tulafono a le Atua; a o lenei ua fiafia tele i ana poloaiga paia, ma ua la alalaga a'e faatasi ma Tavita, “Ua tele lava lo'u naunau i lau tulafono; ou te mafaufau i ai i le aso atoa.” I le o le a faapea lava ona faaatoatoaina o le amiotonu i la le tulafono ia i tatou, “o e le

savavali i la le tino, a e i la le  
Agaga.”

O loo i ai ē ua latou iloa le alofa o  
Keriso e faamagaloina ai, ma ua  
latou matuā naunau lava ina ia  
avea i latou ma fanau a le Atua; a  
e peitai ua latou mautinoa le lē  
atoatoa o a latou amio ma le ponā  
o o latou olaga, ona maua gofie ai  
lea o i latou i le masalosalo po ua  
taunuu ea ona faafouina o o latou  
loto e le Agaga Paia. O i latou na  
ou te fai atu nei i ai, 'Aua ne'i  
outou toe solomuli ma le  
faalotovaivai. E ui ina o le a tatou

ō atu soo ma ifo ia Iesu, ma fetagisi i talane o Ona aao ona o o tatou sesē ma lo tatou le tusa ai, a e 'aua ne'i o tatou faalotovaivai ai. E ui foi ina o le a manumalo mai le fili ia te i tatou, e le tia'iina ai i tatou, pe lafoaiina ma teena e le Atua. E leai, auā o loo afio pea Keriso i le itu taumatau o le Atua, o Ia foi Na te faia le faiva o le fautua mo i tatou. E pei ona molimau mai Ioane, le soo alofagia, "Ou te tusi atu nei mea ia te outou, ina ne'i agasala outou; pe afai foi e agasala se tasi, o ia te i tatou le fautua i luma o le

Tamā, o Iesu Keriso lea o lē amiotonu.” A e 'aua foi ne'i galo ia i tatou le fetalaiga lenei a Keriso, “Auā e alofa mai lava le Tamā ia te outou.” O Lona finagalo moni lenei, ia toe faafoi atu i tatou ia te Ia; Na te fia silasila mai, o loo susulu atu mai ia te i tatou le pupula o Lona lava mamā ma Lona paia. I le pe afai o le a e tuuina atu ato'atoa oe ia te Ia, o Ia lava na Ia amataina le galuega lelei i totonu ia te oe, o le a faaatoatoaina lava e Ia e oo atu lava i le aso o Iesu Keriso. Ia finafinau atili pea i le tatalo; ia

talitonu atili pea. Ina ua tauau  
pea ina faateleina lo tatou lē  
talitonu i lo tatou lava malosi, ia  
tatou faatuatua atili pea i le mana  
o lo tatou Faaola, ma o le a tatou  
vivii atu ai ia te Ia, o lo tatou  
faaolataga Ia ma lo tatou Atua.

O le tauau pea ina ē latalata atu ia  
Iesu, o le tauau foi lea ina pupula  
ia te oe o lou lava ponā; auā o le a  
tauau pea ina faamaninoina i lau  
vaai, ma o le a e vaai le matuā  
tele o lou lē atoatoa pe a  
faatusatusaina ma le paia o le  
Atua. O le molimau lenei ia e iloa

ai, ua tauau ina uma le malosi o le galuega faasesē a Satani; ma o loo fafaguina nei oe e le Agaga o le Atua.

E leai se alofa loloto mo Iesu e maua i le loto o se tasi na te le'i mautinoaina lona lava leaga. E matagofie le amio a Keriso i le vaai a lē ua liua i le mana o Lona alofa tunoa; a e pe afai tatou te le'i malamalama i lo tatou lava leaga, o le faailoga mautinoa lea, tatou te le'i iloa atu le matagofie ma le silisili o Keriso.

O le tauau ina faatauva'a o lo  
tatou manatu ifo ia i tatou lava, o  
le tauau foi lea i luma o lo tatou  
vaai atu ma lo tatou fiafia i le  
mamā ma le matagofie o lo tatou  
Faaola. O lo tatou mautinoa lelei  
o lo tatou lava leaga, e tosina atu  
ai i tatou ia tatou sulufai atu ia te  
Ia o Lē na te faamagalo mai; i le  
pe a lagona e le agaga lona matuā  
vaivai, ma ua aapa atu ia Keriso,  
o le a faailoa mai lava o Ia e Ia i  
Lona mana tele. O le tauau pea  
ina uuna'ina i tatou e le  
mautinoaga o lo tatou lava vaivai  
ia tatou saili atu ia te Ia ma Lana

Afioga, o le tauau foi lea ina  
pupula atili ia te i tatou o Lona  
uiga, ma o le a faalateleina atili  
ai foi Ona foliga i totonu ia te i  
tatou.

## Mataupu E VIII—O le Tupu a'e ia Keriso

O le liua o o tatou loto e avea ai i tatou ma fanau a le Atua, ua ta'ua lea i le Tusi Paia, o le fanaufouina. I le ma le tasi, ua faatusaina i le totogo a'e o le fatu lelei na lūlūina e le galue fanua. Ua faapea lava i latou o e ua faato'ā liua ia Keriso, ua avea i latou e pei o “tama meamea” o loo “tutupu a'e,” seia oo ina ua latou maua le fua o tagata matutua ia Keriso Iesu. Po ua avea foi i latou e pei o le fatu lelei ua lūlūina i le fanua, ua tupu a'e ma ua fua mai. Fai mai Isaia,

“E igoa i latou, O laau o le amiotonu, o le faatoaga a Ieova, e fai mona viiga.” Ua faapea ona toina mai o faatusa mai le olaga faaletino, e fesoasoani mai ia tatou malamalama atili ai i matematega moni o le ola faaleagaga.

E le mafai e le poto uma ma le atamai o tagata ona faatupuina ai o le ola i soo sina mea aupito itiiti o i le lalolagi nei. E gata i le ola e foaiina mai e le Atua lava Ia ona mafai ona ola ai o laau, atoa ma manu. Ua faapea foi i le ola

faaleagaga, e gata lava i le Atua  
ona maua mai ai lea ola i loto o  
tagata. Vaganā ona ua “toe fanau  
le tagata,” o le a le mafai lava ona  
ia maua o le ola na aumaia e  
Keriso.

E pei o le ola, e faapea foi lona  
tuputupu a'e. O le Atua lava Na  
te faia ia matala le fua, ma le  
fugalaau ia maua mai lona fua. O  
Lona mana e totogo a'e ai le saito,  
“e muamua ona lau, ona oo lea i  
lona fuga mai, mulimuli ane foi  
ua i ai saito matua.” Ua faapea  
mai foi le perofeta o Hosea e uiga

ia Isaraelu, “e fuga mai o ia e pei o le susana.” “E toe ola mai i latou e pei o saito, e fua mai e pei o le vine.” Ua fetalai mai foi Iesu, “Ia outou mafaufau i laotalotalo pe faapefea ona tupu.” E le o la latou lava tausiga, po o lo latou lava popole, po o lo latou lava foi taumafai e ola ma tutupu a'e ai laau ma fugālaau, a e peitai ona ua latou maua mai le Atua mea e ao mo le tausiga o lo latou ola. E le mafai e le tamaitiiti i sona popole, po o sona malosi ona faaopoopoina o sona maualuga. E faapea foi ona tatou le mafaia i so

tatou loto popole, po o lo tatou  
lava taumafai, ona maua o le  
tuputupu a'e i le ola faaleagaga.

E tupu le laau, faapea foi ma le  
tamaitiiti, ona o lona maua o mea  
e ao mo le tausiga o lona ola mai  
mea o loo siomia ai o ia—e i ai le  
ea, ma le la, ma mea 'ai. E pei o le  
aogā o nei mea alofa i le ola  
faaletino o laau ma manu, e  
faapea foi le aogā o Keriso i e ua  
faatuatua ia te Ia. O Ia o lo latou  
“malamalama e faavavau,” “o le  
la lava ia ma le talita.” E avea o ia  
ma “sau ia Isaraelu.” “E alu ifo ia

e pei o le ua i le mutia ua  
seleseleina.” O Ia o le punāvai  
ola, “o le areto mai le Atua. . . . ua  
alu ifo mai le lagi, ma au mai le  
ola i le lalolagi.”

O Lana mea alofa le  
mafaatusaina, o Lona Alo lea, ua  
siomiaina ai e le Atua le lalolagi  
uma i le 'ea mamā o Lona alofa  
tunoa, e pei lava ona ufitia o le  
atulaulau i le savili. O i latou uma  
o e ua manana'o ina ia latou  
mānavaina lenei 'ea mamā  
faalelagi, o le a ola lava i latou,

ma tutupu a'e seia oo ina ua avea  
ma tagata matutua ia Keriso Iesu.

E pei ona faasaga atu o le  
fugālaau i le la na te maua mai ai  
le fesoasoani e faaatoatoaina ai  
lona matagofie, ia faapea foi ona  
tatou liliu atu i le La o le  
Amiotonu, ina ia susulu mai ia i  
tatou le pupula o le lagi, ina ia  
faalauteleina ai foliga o Keriso ia i  
tatou.

O le mea lava lenei e tasi na a'oa'o  
mai ai Iesu ina ua Ia fetalai mai,  
“Inā tumau ia o outou ia te a'u, o

a'u foi ia te outou. Faapei o le la e le mafai ona fua pe a na o ia, pe afai e le mau i le vine; e faapea foi outou, pe afai tou te le tumau ia te a'u . . . auā e le mafaia e outou ona fai o se mea e tasi pe a a'u le i ai." O lo tatou faalagolago ia Keriso ina ia tatou ola i le olaga paia, ua pei lava lea o le faalagolago o le la laau i le pogai ina ia tupu ma ia fua mai ai. Pe a tatou tete'a ma Ia, ua leai so tatou ola. Ua leai so tatou malosi e tetee atu ai i faaosoosoga, ma tatou tutupu a'e ai i le alofa tunoa ma le paia. Pe a tatou tumau ia te Ia, o

le a le mafai ona tatou  
magumagu ai pe le fua mai. A o  
le a avea i tatou e pei o le laau ua  
totōina i tafatafa ane o vaitafe.

E toatele ua i ai le manatu, e  
mafaia e i latou ona faataunuuina  
o se tasi vaega o le galuega o le  
faaolataga. Sa latou faatuatua ia  
Keriso mo le faamagaloina o a  
latou agasala, a o lenei o le a  
taumafai e i latou lava ona  
galueaiina o se amiotonu mo i  
latou. A e peitai o le taumafai  
uma faapea e le pine lava ona  
iuvale. Ua fetalai mai Iesu, “E le

mafaia e outou ona fai o se mea e tasi pe a a'u le i ai." O lo tatou tutupu i le alofa tunoa, o lo tatou fiafia, ma lo tatou aogā—e faatatauina uma lava i le uiga o la tatou fesootaiga ma Keriso. O lo tatou fesootai pea ma Ia i aso ma itula uma, o lo tatou tumau ia te Ia—o le ala lea tatou te tutupu ai i le alofa tunoa. E le gata ina o Ia o le māfuaaga, a o Ia foi o le faaatoatoaga o lo tatou faatuatua. O Keriso e muamua, o Ia foi e mulimuli i mea uma. E tatau lava ona faatasi mai o Ia ma i tatou, e le gata i le amataga ma le faaiuga

o la tatou savaliga, a e peitai o laasaga uma lava o le ala. Fai mai Tavita, “Ou te tuu Ieova i o'u luma e le aunoa; auā o i lo'u itu taumatau o ia, e le faagaeetia ai lava a'u.”

E te fesili ea, “Pe faapefea ona ou tumau ia Keriso?” E te tumau ia te Ia i lea lava ala e tasi e pei ona e muai taliaina o Ia. “O lenei, faapei ona outou talia o le Alii o Keriso Iesu, ia savavali ai outou o ia te ia.” “E ola lē amiotonu i le faatuatua.” Ua e tuuina atu atoatoa oe mo le Atua, e auauna

ma usiusitai ia te Ia, ma ua e  
taliaina foi Keriso ina ia avea o Ia  
mōu Faaola. Ua le mafaia e oe ia  
te oe lava ona saunia o se togiola  
mo au agasala, pe liua lou loto; a  
e peitai ua e tuuina atu oe i le  
Atua ma lou faatuatua, ua faia e  
Ia nei mea uma mo oe ona o  
Keriso. O le faatuatua na muai  
avea ai oe o la Keriso, i le o le  
faatuatua foi o le a e tupu a'e ai ia  
te Ia—i lou tuuina atu ma lou  
taliaina mai. Ia e tuuina atu mea  
uma—o lou loto, o lou  
faamoemoe, ma lou malosi— ia e  
matuā tuuina atu oe ia te Ia ina ia

e usiusitai i Ana faatonuga uma. A e le gata i lea, auā ua tatau foi ona e taliaina mai mea uma—o Keriso lea, ma le atoatoa o Lana faamanuiaga, ia afio mau o Ia i lou loto, ia fai o Ia mōu malosi, ma au amiotonu, ma ou fesoasoani. Na te foaiina atu ia te oe le malosi e te usiusitai ai.

Ia e faapaiaina oe mo le Atua i le taeao; ia avea lena ma au galuega muamua lava. Ia faapenei lau tatalo: “Le Atua e, ia avatua a'u mo Oe atoatoa. Ou te faataatiaina mea uma ua ou mafaufauina i Ou

aao. Ia E faaaogāina a'u i le aso nei mo Au feau. Ia ta mafuta ma Oe, ma ia ta galulue faatasi ma Oe i feau uma ou te faia.” Ia e faia lenei mea i aso uma lava. O taeao uma ia e faapaiaina ai oe mo le Atua e tusa ma ou laasaga i lena aso. Ia e tuuina atu ia te Ia mea uma ua e mafaufauina, ina ia faataunuuina po o le lē faataunuuina foi e tusa ma Lona finagalo o le a faailoa mai. I le a o faapea i aso taitasi ona e tuuina atu o lou ola i Ona aao, o le a tauau pea ina foliga ai lou olaga i le soifuaga o Keriso.

O le olaga ua ia Keriso, o le olaga to'a filemu lea. Atonu e le o lagona se fiafiaga ua sili atu ona tele, a e peitai o le a to'a filemu pea le loto talu ai ona ua faalagolago ia Iesu ma ua faatuatua ia te Ia. Ua e le o toe faamoemoe ia te oe lava, a e peitai o Keriso. Ua faafesootaiina lou vaivai i Lona malosi, o lou valea i Lona poto, o lou uiga vaivai ma le fetōai i Lona malosi tumau. O lea, 'aia ne'i e toe vaai ai ia te oe lava, 'aia foi ne'i faapito ia te oe lava mafaufauga o

lou loto, a e ia e vaavaai atu pea  
ia Keriso. Ia e mafaufau atu i  
Lona alofa, ma Lona matagofie,  
ma le atoatoa ona lelei o Lona  
uiga ma Lana amio. O Keriso i  
Lona faafiti ia te Ia lava, o Keriso  
i Lona faamaulaloina, o Keriso i  
Lona mamā ma Lona paia, o  
Keriso i Lona alofa lē  
mafaatusaina—o mataupu tāua  
lava ia ia faa'autūina ai  
mafaufauga o le agaga. O lou  
alofa atu ia te Ia, ma lou faaa'oa'o  
ia te Ia, ma lou faalagolago  
atoatoa ia te Ia, o le a liua ai oe ia  
foliga ia te Ia.

Ua fetalai mai Iesu, “Inā tumau ia o outou ia te a'u.” Ua momoli mai e lea fetalaiiga ia te i tatou le malologa, le lē mafaagaetia, ma le faatuatuga malosi. Ua toe valaau mai foi o Ia ia te i tatou, “Ia outou o mai ia te a'u ... o a'u foi e malolo ai outou.” A e molimau mai Isaia, “O le filemu ma le faatuatua, o lo outou malosi lea.” O lenei malologa, e le o lona uiga le faafifilemu; auā o le fetalaiiga a le Alii Faaola ua sosoo faatasi ai le folafolaga i le malologa ma le valaau mo le

galuega: “Ia outou amoina la'u amo . . . ona maua lea e outou o le malologa mo outou agaga.” O lē ua atoatoa ona malolo atu ia Keriso, o ia foi lea o le a matuā faamaoni ma filigā i le faiga o Ana feau ma galuega.

O le faasaga atu o le mafaufau o le tagata i le manatu faapito ia te ia lava, o lona faasaga 'ese foi lea mai ia Keriso, le pogai o le malosi ma le ola. O lea o loo taumafai ai pea Satani e faaliliu 'eseina le mafaufau o le tagata mai le Faaola, ina ia taofia ai le

fesootaiga ma le mafuta faatasi o  
le agaga ma Keriso. O fiafiaga o le  
lalolagi; o le atuatuvaile, ma  
faalavelave, ma faanoanoaga o le  
olaga nei; o sesē o isi tagata; po o  
ou lava foi sesē ma lou lē  
atoatoa—i soo se tasi o nei mea,  
po o nei mea uma foi, o le a  
taumafai Satani e ta'ita'i 'ese i ai  
lou mafaufau. 'Aua ne'i  
faasesēina oe i ana mailei.

E toatele lava nisi o e ua loto  
faamaoni, ma ua fia faapaiaina o  
latou ola mo le Atua, a ua  
ta'ita'iina i latou e Satani ina ia

faapito ona latou mafaufau pea i  
o latou lava pona ma o latou  
vaivai, seia oo ina ua  
faavāvāmamaoina i latou ma  
Keriso, a e maua ai le faamoemoe  
o Satani i lona fia manumalo ia te  
i latou. 'Aua lava ne'i aveā lo  
tatou manatu ifo ia i tatou lava  
ma 'autū o o tatou mafaufauga,  
ma tatou pau'ū atu ai i le tulaga o  
le popole vale ma le faaletonu pe  
faaolaina i tatou. O uiga uma  
faapenei e faaliliu 'eseina ai le  
agaga mai le Pogai o lo tatou  
malosi. Ia e tuuina atu le tausiga  
o lou agaga i le Atua, ma ia e

faatuatua ia te Ia. Ia e talatala ma mafaufau ia Iesu. Ia avea lou mafaufau atu ia te Ia ma ala e faaliloina ai oe. Ia e tuu 'eseina masalosaloga uma; ia e lafoai 'eseina le popole ma le fefe uma lava. Ia oulua 'au faatasi ma le aposetolo o Paulo i ana upu, "Ou te le toe ola a'u, a o Keriso o loo ola i totonu ia te a'u; o le ola foi ou te ola ai nei i le tino, ou te ola ai lava i le faatuatua i le Alo o le Atua, o lē na alofa mai ia te a'u, ma foaiina mai o ia e ia e fai mo'u sui." Ia e mapu atu i le Atua. E mafai lava e Ia ona tausia o mea

ua e tuuina atu ia te Ia. Pe afai o  
le a e tuuina atu pea oe i Ona aao,  
o le a Ia ta'ita'iina oe ina ia e  
manumalo a'ia'i ona o Ia ua alofa  
mai ia te oe.

Ina ua faaeeina a'e e Keriso le tino  
tagata ia te Ia, na Ia noatia ai o Ia i  
le fanau a tagata i le fusi o le alofa  
e le mafai ona toe motusia i se  
tasi malosi, vaganā le filifiliga a le  
tagata lava ia. O le a taumafai pea  
lava e Satani ona faaalia mai i o  
tatou luma o ni faa'ole'olega e  
tauanauina a'i i tatou ina ia tatou  
faamotuina lenei fusi —ina ia

tatou filifili i le ō 'ese mai ia Keriso. O le mea lava lenei ia tatou mataala ai, ma finafinau, ma tatalo, ina ne'i i ai se mea e faasesēina ai i tatou ma tatou loto atu ai i se tasi matai; auā o loo i ai pea ia te i tatou lea sa'olotoga. Ia taulai pea o tatou mata ia Keriso, o le a Na leoleoina ma puipuiina i tatou. O lo tatou vaavaai atu pea ia Iesu, o le a tatou saogalemu ai. E leai se mea na te mafai ona faoa mai i tatou mai Lona aao. Ina o tatou o vaavaai atu pea ia te Ia, o le a “liua ai i tatou ua foliga i ai nai le pupula e oo i le pupula.”

O le ala lava lenei na maua ai e le 'au soo muamua foliga o le Faaola pele. Ina ua faalogo atu lenei 'au soo i fetalaiga a Iesu, na latou lagona le faanaunau atu ia te Ia. Na latou saili ia te Ia, na latou maua foi o Ia, ma mulimuli ia te Ia. Sa latou faatasi ma Ia i le maota, i le la'o'ai, i le afeafe, i le laufanua. Sa latou faatasi ma Ia e pei o ni tamaiti o se a'oga ma lo latou faia'oga, ma sa latou maua mai ai pea mai Ona laufofoga a'oa'oga tau le upu moni paia. Sa latou vaavaai atu ia te Ia, e pei o

auauna i lo latou matai, mo feau e faatonu mai. O na soo, “o tagata e tusa ma i tatou.” Sa tau foi i latou i lenei lava taua e tasi ma le agasala. Sa fia maua foi e i latou lenei lava alofa tunoa e tasi, ina ia mafai ona latou ola ai i le olaga ua faapaiaina.

E oo lava foi ia Ioane le soo alofagia, lē sa sili atu ona iloga mai ai o toliga o le Alii Faaola, sa le ia te ia muamua lea amio matagofie. E le gata ina sa ia te ia le amio pa'a'ā ma le fia ta'uleleia, a e sa osovare foi o ia ma loto ita

pe a agaleagaina. A e peitai ina  
ua faaalia ia te ia le uiga ma le  
amio a Lē Paia, na ia vave iloa ai  
lona le tusa ai, ona maua ai lea o  
lona loto maulalo talu ai lea  
mautinoaga. O le malosi ma le  
onosai, o le mana ma le alofa  
mutimutivale, o le mamalu ma le  
agamalu, na vaaia e Ioane i aso  
uma i le soifuaga o le Alo o le  
Atua, na faatumuina ai lona  
agaga i le ofo ma le alofa. O aso  
taitasi uma na tosina atu ai lona  
loto ia Keriso, na oo ai ina galo  
lona manatu ifo ia te ia lava ona o  
lona alofa i Lona Matai. O lona

uiga fia tau ma sui, ma le fia viia,  
ua gaua'i atu nei i le mana o  
Keriso e liua ai. Ua faafouina lona  
loto i le galuega mana a le Agaga  
Paia. O le malosi o le alofa o  
Keriso ua matuā liua ai lana  
amio. O le fua mautinoa lenei o le  
fesootaiga ola ma Iesu. Pe a afio  
Keriso i le loto, o le a liua uma ai  
le uiga o le tagata. O le Agaga o  
Keriso, ma Lona alofa, e  
faamalūlūina ai le loto, ma o le a  
aga'i a'e ona mafauauga ma ona  
mana'oga i le Atua ma le lagi.

Ina ua toe afio a'e Iesu i le lagi, sa lagona ai pea lava e Ona tagata Lona faatasi mai. Sa latou maua le mafutaga moni faatasi ma Ia, o se mafutaga lava ua tumu i le alofa ma le malamalama. O Iesu, le Faaola, Lē sa latou savavali ma talatala ma tatalo faatasi, o Lē sa fetalai i o latou loto i upu o le faamoemoe ma le faamafanafanaga, na 'aveina a'e o Ia nai ia te i latou i le lagi a o i ai pea le feau o le filemu i Ona laufofoga. I le ina ua taliaina o Ia e le 'au agelu ua tino mai e pei o se ao, na latou toe faalogoina ai

Lona siufofoga o faapea mai,  
“Faauta foi, ou te ia te outou i aso  
uma lava, e oo lava i le gataaga o  
le lalolagi.”

Na Ia afio a'e i le lagi ma foliga o  
le fanau a tagata. Na latou  
mautinoa, o le a tu o Ia i luma o le  
nofoālii o le Atua, o Ia o la latou  
Uō ma lo latou Faaola; e le'i liua  
Lona finagalo mutimutivale, ma o  
loo Ia tauaveina pea le uiga o i  
tatou le fanau vaivai ma le  
puapuagatia. O le a Ia faailoa i  
luma o le Atua le mana ma le  
aogā o Lona toto paia, ma Na

faasilasila atu ia te Ia Ona aao ua i ai faailoga o manu'a, e faamanatu a'i le tau tele ua Ia togiolaina a'i Lana fanau. Na latou iloa ua afio a'e o Ia i le lagi e sauni se mea e nonofo ai latou, ma o le a toe afio mai o Ia e talia i latou ia faatasi ma Ia.

A o latou o faapotopoto ina ua mavae o Lona afio a'e, sa fiafia i latou e momoli o latou mana'o i le Tamā i le suafa o Iesu. Ma le āva tele na latou ifo ai ma tatalo, ma faamanatu lenei folafolaga tāua, “O mea uma tou te ole atu ai i le

Tamā i lo'u igoa, e foai mai e ia ia te outou. Ua oo mai nei lava tou te le'i ole atu i se mea i lo'u igoa; ina ole atu ia, ona outou maua ai lea, ina ia atoatoa ai lo outou olioli.” Ua maualuga atili pea ona latou aapa atu i lima o le faatuatua, a o latou o finau atu i lenei finauga malosi, “O Keriso o ia na maliu, a ua toe tu mai lava o ia; o loo i le itu taumatau foi o le Atua, o loo fautua foi o ia mo i tatou.”

A o le Aso Penetekoso foi na latou maua ai le Fesoasoani, Lē

na fetalai mai ai Keriso, “E tumau pea ia ia te outou, e i ai foi o ia i totonu ia te outou.” I le ma le tasi foi fetalai a Iesu, “E aogā ia te outou pe a a'u alu 'ese; auā afai ou te le alu 'ese, e le maliu mai le Fesoasoani ia te outou; a e afai ou te alu, ou te auina mai o ia ia te outou.” E amata mai ai i na ona po, o loo afio tumau pea lava Keriso i loto o Lana fanau i Lona Agaga. Ua sili nei ona latou vāvālalata ma Ia i lo aso a o latou faatasi ma Ia i le tino. Sa susulu atu mai ia te i latou le pupla, ma le alofa, ma le mana o le Keriso

Lē na afio i totonu ia te i latou; i le a o molimau atu i ai tagata, “ua latou ofo ai; ua latou iloa foi o i latou sa latou faatasi ma Iesu.”

O mea uma sa finagalo ai Iesu e uiga mo Ona soo muamua, o loo faapea foi Lona finagalo mo Lana fanau i ona po nei; auā o loo i ai lea i Lana tatalo mulimuli a o faatasi o Ia ma nai soo e toaitiiti o e sa potopoto ane ia te Ia, na Ia fetalai ai, “E le faapito la'u tatalo mo i latou nei, a o i latou foi e faatuatua ia te a'u ona o la latou upu.”

Sa tatalo Iesu mo i tatou, ma sa Ia ole atu ai foi ina ia tasi i tatou ma Ia, e pei lava ona tasi o Ia ma le Tamā. Se mafutaga a matuā ofoofogia! Na faapea le fetalaiga a le Faaola ia te Ia lava, “E le mafai e le Atalii ona fai o se mea, na o ia lava;” “A o le Tamā o loo nofo i totonu ia te a'u, o ia lava na te faia ia galuega.” O lea, pe afai o loo afio Keriso i totonu i o tatou loto, o le a galue o Ia i totonu ia te i tatou, ina ia tatou loto ma galulue i Lona finagalo alofa. Ona o lo tatou alofa ia te Ia, ma lo tatou

tumau ia te Ia, o le a tatou  
“tutupu ai ia te ia i mea uma, o le  
ulu lava ia, o ia foi o Keriso.”

## Mataupu E IX—O le Galuega ua Tatou Feagai ai i le Olaga Nei

O le Atua, o Ia lava o le pogai o le  
ola, ma le malamalama, ma le  
fiafia o le aoao o mea. E pei o 'ave  
o le malamalama mai le Ia, ma  
magāvai mai le punāvai, ua  
faapea ona tafe mai o  
faamanuiaga mai ia te Ia i mea  
ola ma tagata na Ia faia. I le o i  
latou uma o e ua i ai le ola fou  
mai le Atua i o latou loto, e puna  
atu ai foi mai ia i latou i isi tagata  
le alofa ma le manuia.

O le fiafiaga o lo tatou Faaola, o le  
toe faatuina mai lea ma le  
laveaiina o tagata o e ua pau'ū.  
Ona o lea na Ia le faapelepeleina  
ai Lona soifua, a e na onosai o Ia i  
le satauro, ma sa faatauvaa ia te  
Ia le mā. O loo faapea foi le 'au  
agelu ona latou galulue pea mo le  
manuia o isi. O lo latou lea  
fiafiaga. O le auauna atu ma  
fesoasoani atu i e ua pagātia ma  
ua maulalo lo latou tulaga ma le  
uiga o la latou amio, o le feau lea  
e manatu i ai le loto lē alofa, o se  
faamaulaloga pe a faia, a e peitai  
o le feau lava lea ma le galuega a

le 'au agelu o e o loo aunoa ma le  
agasala. O le finagalo alofo o  
Keriso na ala ai ona tuuina atu o  
Ia e Ia e fai ma taulaga, o le  
finagalo lava lea o loo aoao i le  
lagi, ma o le māfuaaga foi lea o  
lona fiafiaga. O le agaga lava lea  
ia maua e i latou o e ua mulimuli  
ia Keriso, o le galuega foi lea ia  
latou faia.

O le alofa o Keriso pe afai ua nofo  
mau i le loto, e le o se mea e  
mafai ona nātia, auā o le a  
puaiina atu lava e pei o le manogi  
o fugālaau. O le a lagona lona

uiga paia e tagata uma o e feagai  
ma i tatou. O le agaga o Keriso pe  
a pulea ai o tatou loto, e pei lava  
o se puna i le nuu naumati, e tafe  
atu e faasūsū a'i, ma o le a  
naunau atu i ai e a fano i le fia inu  
i le vai o le ola.

O le alofa ia Iesu, o le a faaalua lea  
i le naunau atu i galuega e pei  
ona sa faia e Ia mo le manuia ma  
le toe faaeaina o i latou o e ua  
pau'ū. O le a ta'ita'iina atu ai oe i  
le alofa, ma le alofa  
mutimutivale, ma le tigā alofa  
faatasi ma tagata uma lava o loo i

le tausiga a lo tatou Tamā  
faalelagi.

O le soifuaga o le Faaola i le  
lalolagi, sa le o se soifuaga  
faatalanoa, pe sa faaaogāina mo  
Ia lava, a e peitai sa matuā galue  
o Ia ma le naunautai, ma le filigā  
e le fiu, mo le faaolaina o le fanau  
a tagata ua le iloa. O le ala na Ia  
uia mai le fale povi i Peteleema  
seia oo i Kolokota, o le ala lava  
lea o le faafiti ia te Ia lava. E le'i  
tau saili atu foi o Ia ina ia  
faasaoina o Ia mai galuega  
mamafa, ma malaga fitā, ma le

matuā faalailoaina o Ia i le tele o feau ma avega. Na fetalai mai o Ia, “O le Atalii o le tagata e le'i sau ia ina ia auauna mai tagata ia te ia, a ia auauna atu ia, ma foaiina atu lona ola e fai ma togiola e sui a'i tagata e toatele.” O le mataupu sili lava lenei e tasi na faaaogā i ai Lona soifuaga. A o isi mea uma, sa avea o ni mea faaopoopo ma sa faato'ilaloina i lenei mataupu sili. O Lana lava lea mea e 'ai ma Lana mea e inu, ia na faia le finagalo o le Atua ma faaumaina Lana galuega. E le'i ofi

atu pe taulia i Lana galuega Sona  
manatu ifo mo Ia lava.

E faapea foi i latou o e ua latou  
maua le alofa tunoa o Keriso ona  
latou nofo sauni mo soo se  
taulaga e faatigāina ai i latou, a e  
tau lava ina ia maua e nisi o e na  
Ia maliu ai le mea foai fuaina mai  
le lagi. O le a latou faia mea uma  
ua latou mafaia ina ia atili  
manuia ai le lalolagi talu ai ona  
ua latou i ai. O le agaga faapenei,  
o le fua lava lea e tupu mai le loto  
ua liua faamaoni.

E oo atu loa le tagata ia Keriso,  
ona fanaua loa lea i lona loto o le  
mana'o na te fia faailoa atu i nisi  
le tāua tele o le Uō ua na maua ia  
Iesu; auā e le mafai ona punitia i  
lona loto o le upu moni o le ola e  
faapaiaina ai. Pe afai ua faaofuina  
i tatou i le amiotonu a Keriso, ma  
ua faatumuina o tatou loto i le  
olioli ona o le mafutaga lilo ma  
Lona Agaga, o le a le mafai lava  
ona tatou faalologo. Pe afai ua  
tatou tofotofo ma ua tatou iloa e  
lelei le Alii, o le a tataua lava ona i  
ai o sa tatou molimau tatou te tala  
atu ai i nisi. E pei foi o Filipino ina

ua na maua le Faaola, o le a tatou  
valaauina nisi ina ia latou o mai  
ia te Ia. O le a tatou sailia ni ala  
ina ia mafai ona tatou faailoa atu  
ia te i latou le matagofie o Keriso,  
ma mea moni e le o vaaia o le ola  
atali. O le a tele lava lo tatou  
faanaunau atu ina ia tatou uia le  
ala na savalia e Iesu. O le a ia te i  
tatou foi lenei faanaunauga ina ia  
vaaia e i latou o e ua tatou feagai  
ai le “Tamai mamoe a le Atua, na  
te aveesea le agasala a le  
lalolagi.”

I le o lo tatou taumafai ina ia  
tatou faamanuia atu i nisi, o le a  
toe galue lava lea mo le  
faatotōina ifo o le manuia i o  
tatou lava luga. O le finagalo lea  
sa i le Atua na Ia tuuina mai ai se  
vaega mo i tatou i le feau o le  
galueaiina o le faaolataga. Ua  
foaiina mai e le Atua i tagata ina  
ia tofusia faatasi i latou i le amio  
Atua, a o i latou foi, ia latou  
faasalalauina atu le manuia i  
tagata uma lava. O le mamalu  
aupito maualuga lenei, ma le  
fiafiaga aupito sili, ua mafai ona  
foaiina mai e le Atua i tagata. O i

latou o e ua faapea ona latou 'au faatasi ma Ia i Lana galuega alofa, o le a sili atu i latou ona nonofo latalata i Lē na Ia faia i latou.

Sa mafaia lava e le Atua ona tuuina atu o le feau o le talaiina o le tala lelei, ma galuega alofa uma, i lima o agelu o le lagi latou te faia. Sa mafai e Ia ona uia o nisi ala mo le faataunuuina o le mea sa i Lona finagalo. A e peitai ona o Lona alofa lē fai tuāoi, ua Ia filifilia ai i tatou ia aveia ma e faigaluega faatasi ma Ia, faatasi foi ma Keriso ma agelu, ina ia

tatou ma tofi ai i le manuia, ma le olioli, ma le siitia a'e o lo tatou tulaga faaleagaga, o fua tāua lava ia o galuega alofa ua tatou faia e aunoa ma le manatu ifo ia i tatou lava.

O lo tatou 'au faatasi ma Keriso i Ona tigā e maua atili ai e i tatou le fesootaiga ola ma Ia. O galuega uma lava tatou te tautigā ai mo le lelei o nisi, o le a faamalosia atili ai lo tatou alofa ma lo tatou loto fiafia, ma o le a tauau ai ina sili atu ona tatou 'au faatasi ma nonofo latalata i le Faaola o le

lalolagi, o Lē “sa tamaoaiga ia, a ua faamativaina ona o outou, ina ia faatamaoaigaina outou i lona mativa.” I le ua na o lo tatou faataunuuina faapea o le finagalo faalelagi na ala ai ona faia o i tatou, o le a faato'ā mafai ona lagona ai i o tatou loto le faamanuiaga moni.

Pe afai o le a e alu atu e te galue e pei ona faamoemoe ai Keriso ia faia e Ona soo, ma e maua mai agaga mo Ia, o le a e lagona lava lou fia maua atili o le atamai i mea tau le Atua, ma o le a e saga

fia 'ai ma fia inu i le amiotonu. O le a e oleole atu i le Atua, ona faamalosiina atili ai lea o lou faatuatua, ma o le a tauau pea ina loloto inumaga o le a maua e lou agaga mai le vaipuna o le faaolataga. O lou faafeagai ma le faatuiese mai o nisi, faapea foi ma tofotofoga, o le a uuna'i atu ai oe i le Tusi Paia ma le tatalo. O le a e tupu a'e i le alofa tunoa ma le poto uma ia Keriso, ma o le a saga faalauteleina pea lou tamaoaiga i le oa tāua faaleagaga.

O lou galue mo le manuia o nisi e  
aunoa ma le agaga o le manatu  
faapito ia te oe lava, o le a maua  
ai e lou agaga se faavae loloto ma  
le mautū lelei, o le a foliga ai lau  
amio i le amio matagofie a Keriso,  
ma o le a e maua mai ai le to'a  
filemu o lou loto ma le olaga  
fiafia. O le a paia ma maualuga  
mea e te fiafia ma tausisi atu i ai.  
O le a le ofi ai i lou loto se uiga  
faapaiē ma le manumanu. O i  
latou o e ua faapea ona latou  
sailia ma galueaiina i o latou  
olaga o uiga tāua faa-Kerisiano, o  
le a tutupu i latou ma o le a tauau

ina malolosi i latou e galulue mo  
le Atua O le a manino la latou  
vaai faaleagaga, o le a mautū ma  
tuputupu pea lo latou faatuatua,  
ma o le a faateleina lo latou  
malosi i le tatalo. O le a  
galueaiina o latou agaga e le  
Agaga o le Atua, ma o le a avea ai  
o latou olaga e peiseai o se fati  
mālie ina ua pa'i mai le aao o le  
Atua i mānoa o le loto. O i latou  
uma o e ua faapea ona tuuina atu  
o i latou i galuega alofa mo le  
lelei o nisi, ua mautinoa o loo  
galueaiina e i latou ma lo latou foi  
olataga.

O le ala e tasi o le a tatou tutupu  
ai i le alofa tunoa, o lo tatou  
faasaga atu lea, e aunoa ma ni tasi  
manatu 'ese, e faia le feau ua  
tuuina mai e Keriso ia i tatou—o  
lo tatou galulue lea ma lo tatou  
malosi atoa e fesoasoani ma  
faamanuia atu i e o loo latou fia  
maua le fesoasoani ua mafai ona  
tatou tuuina atu mo i latou. O le  
galue soo e tupu ai le malosi; o le  
gaoioi ma le to'aga i feau tatau, o  
le tasi lava lea vaega o le ola. O i  
latou o e ua taumafai e tausii i lo  
latou ola faa-Kerisiano i lo latou

taliaina pea o le manuia ua ala  
mai i le alofa tunoa, a o latou o  
nonofo faatalanoa ma le leai o ni  
a latou galuega o faia mo Keriso,  
ua avea i latou o ni e ua latou fia  
maua pea le mea 'ai e ola ai, e  
aunoa ma lo latou galulue. I le e  
pei lava o le olaga faaletino, e  
faapea foi i le olaga faaleagaga, o  
le amio faapea e tauau lava i tua,  
ma e i'u ina faaleagaina ma  
faaumatia ai le ola o le tagata. O  
se tasi e musu e faaaogāina ona  
vae ma ona lima i se feau, o le a  
lagona e ia ua alu 'ese uma le  
malosi i ia itu tino. E faapea foi le

tagata Kerisiano na te le  
faaaogāina lona malosi mai le  
Atua; e le gata ina o le a lē tupu  
a'e o ia ia Keriso, a o le a tauau  
lava ina mavae 'ese uma le malosi  
sa ia te ia.

O le Ekalesia a Keriso, o le sui  
filifilia lea o le Atua mo le  
faaolaina o tagata. O lana lava lea  
galuega, o le momoli atu o le tala  
lelei i le lalolagi. O lea lava le feau  
o loo feagai ma tagata Kerisiano  
uma. O tagata uma lava, e tusa  
ma a latou taleni ua maua, po o ni  
ala foi ua faaavanoaina mo i

latou, ia latou galulue ai mo le  
faataunuuina o le feau a le Faaola  
ua Ia poloai mai ai. O le alofa o  
Keriso ua faaalua mai ia i tatou, ua  
avea ai itatou ma e ua nofo  
aitalafu i e latou te le'i iloa o Ia.  
Ua foaiina mai e le Atua ia te i  
tatou le malamalama, e le mo na  
o i tatou, a e ia tatou faasusuluina  
atu i e latou te le'i iloa.

Pe ana mataala le fanau a Keriso i  
lo latou tiute e ao ina latou faia,  
semanū lava a maua ai le to'a afe  
ma afe i le mea o loo i ai nei na o  
le toatasi, o e o loo latou talaiina

atu le tala lelei i nuu faapaupau.  
O i latou uma foi o e ua le mafai  
ona latou ō atu mo le galuega, a o  
le a latou 'au ai lava i a latou  
taulaga, lo latou alofa naunau,  
ma a latou talosaga. Semanū foi a  
sili mamao atu ona filigā ai o  
tagata i nuu Kerisiano i a latou  
galuega mo le ta'ita'iina mai o  
agaga ia Keriso.

Pe afai o loo taatia mai i o tatou  
tafatafa le galuega ua tofia i ai i  
tatou, e le tau tuua ai e i tatou o  
tatou aiga ma tatou ō atu i nuu  
faapaupau, ina ia tatou galulue ai

mo Keriso. E mafai ona ave'a o i  
tatou ma molimau faamaoni mo  
Keriso i totonu o o tatou lava  
aiga, po o totonu o le 'au ekalesia  
o tatou i ai, po o lo tatou galulue  
atu foi i e o loo tatou fefaauōai,  
ma i latou o loo tatou faafesootai  
ai i a tatou galuega.

O le vaega tele o le soifuaga o lo  
tatou Faaola i lalo nei, sa  
faaaogāina i lona galue ma le  
onosai i le fale kamuta i Nasareta.  
O agelu o e auauna atu sa latou  
faatasi mai ma le Alii o le ola a o  
feafioai o Ia faatasi ma e galulue

fanua, ma tagata faigaluega; latou te le'i mātauina o Ia po o ai, latou te le'i āva atu foi ia te Ia e tatau ai. Sa tutusa lava Lona faamaoni i le faiga o le feau na Ia afio mai ai a o faasaga atu o Ia i Lana galuega maulalo o le kamuta, ma ona aso na Ia faamalolo atu ai i e mama'i, ma aso foi na Ia savali ai i luga o peau sousou o le sami o Kalilaia. O lea, i soo se galuega ma se tulaga maulalo faale olaga nei, a e ua mafai lava ona tatou savavali ma galulue ai faatasi ma Iesu.

Ua faapea mai le aposetolo, “Ia taitoatasi ma nofo pea i luma o le Atua i le mea na valaauina ai o ia.” E mafaia e se tasi o loo galue i se faiva, po o se alii fai oloa, ona faia o lana galuega i se ala o le a viia ai lona Matai ona o lona fai mea faamaoni. Pe afai o ia o se soo moni o Keriso, o le a na tauaveina le uiga o le faatuatuaga ua ia te ia i mea uma na te faia, ma o le a ia faaali atu i tagata uma le agaga moni o Keriso. E mafai e lē o loo galue i le faiva faa-enesinia ona avea ma sui maelegā ma le faamaoni o Lē sa

galue i le faiva maualalo i atu mauga iti o Kalilaia. Soo se tasi na te ta'uina le suafa o Keriso, ua tatau lava ona faapea ona ia galue ina ia iloa atu e nisi le lelei o ana galuega, ma ia ta'ita'iina atu ai i latou ia vivii atu i Lē na faia i tatou ma lo tatou Faaola.

E toatele nisi ua latou fe'alo'alofai i lo latou faapea ane, ua ala ona le faaaogāina o a latou taleni e galulue ai mo Keriso, ona o loo i ai nisi ua sili atu ona tāua o a latou taleni, ma ua latou atamamai foi e sili i lo latou. I le

ua salalau atu lava lea manatu e faapea, e gata ia i latou o e ua foaiina atu i ai taleni e tele ona fia maua e faapaiaina lo latou aogā mo le feau a le Atua. Ua faapea foi le manatu o le toatele, e gata i le vasega ua sili ona alofagia ona tuuina atu i ai o taleni, a o isi ua le valaauina i latou mo le galuega, ma ua leai foi ma so latou tau i o loo faamoemoeina e le Matai. A e peitai ua le faapea ona faatusaina mai i le faataoto. Na valaauina e le matai o le aiga ana auauna, ma na tuuina atu ia i

latou uma taitoatasi lana lava  
galuega e faia.

O le agaga o le alofa ia tatou  
faasaga atu ai e faia ma le  
faamaoni feau uma o le olaga, e  
oo lava i feau aupito faatauva, ia  
faia “e peiseai ua faia i le Alii.” Pe  
afai ua i o tatou loto le alofa i le  
Atua, o le a faaalua lea i lo tatou  
olaga. O le a siomia i tatou i le  
manogi o Keriso, ma o le a  
manuia ma faamalosi ai nisi.

'Aua e te faatali ina seia tutupu  
mai ni mea tetele, pe se'i iloga

mai sou malosi uiga 'ese, i le faato'ā e alu atu ai e te galue mo le Atua. 'Aua foi ne'i e mafaufau fua po o le a se manatu mai o le lalolagi ia te oe. Pe afai ua avea lou olaga i aso taitasi ma molimau i le mamā ma le faamaoni o lou faatuatua, ma ua talitonu nisi o loo e taumafai e saili se lelei mo i latou, o le a le iuvale lava lou taumafai.

E mafai lava e soo aupito faatauva ma le matitiva o Iesu ona avea ma ala atu o le manuia i nisi. Atonu e le o mautinoaina e i

latou ia, o loo fai se aogā o lo  
latou taumafai, a e peitai, talu ai  
le manogi o Keriso o loo siomia ai  
i latou, o le a mafai ona salalau  
atu ai mai ia te i latou le manuia e  
saga faalateleina pea ma tauau  
pea ina loloto, ma o ona fua  
matagofie foi latou te le mailoa  
seia vaganā le aso o le tau  
mulimuli. Latou te le o lagona pe  
iloa foi o loo latou faia ni mea  
tetele. E le tatau foi ona  
faatuatuvaleina o o latou loto i  
lo latou fia iloa po o le a manuia  
lo latou taumafai. Tau lava ina ia  
latou aga'i atu pea i luma ma le

filemu, ma faia ma le faamaoni le feau ua tuuina mai e le Atua i o latou lima, ona le iuvale ai lea o lo latou ola. O le a tutupu a'e pea lava o latou agaga i foliga o Keriso; o i latou o faigaluega faatasi ma le Atua i le olaga nei, ma o loo faapea ona saunia o i latou mo le feau e sili atu lona maua luga, ma le fiafiaga mamā o le ola atali.

## Mataupu E X—O Ala e Mafai Ona Iloa ai le Atua

O loo saili le Atua i ala e tele ina ia faailoa mai ai o Ia ia i tatou, ma ia tosina atu ai i tatou i le mafutaga paia ma Ia. O loo le mapu ona vagana mai i o tatou mafaufau mea uma o loo tumu ai le lalolagi. O le a matuā ootia lava le loto o loo mafaufau i nei mea pe a vaavaai atu i le alofa ma le mamalu o le Atua ua faaalia mai i galuega a Ona aao. O le a malamalama foi ma lagona i taliga o loo faalogologo lelei le fesootaiga ma le Atua o loo ala

mai i galuega ofoofogia o le  
foafoaga. O le lausiusi mai o le  
fanua, o laau mafalā, o le fofotu  
mai o laau ma fugālaau, o le  
felelei ane o ao o le lagi, o le totō  
ifo o timuga, o le fetafeai o  
vaitafe, o le pupula o le lagi, o  
mea uma ia o loo faamatala mai i  
o tatou loto, ma valaau mai ia i  
tatou ina ia tatou faamasani atu i  
Lē na Ia faia i latou uma.

Sa masani lo tatou Faaola i Ana  
a'oa'oga tāua ona faamanatuina  
pea o galuega o loo tumu ai le  
lalolagi. O laau, ma manu felelei,

ma fugālaau i vanu, o mauga iti,  
o vaituloto, ma le matagofie o le  
lagi, atoa foi ma mea sa tutupu  
mai, ma mea sa siomia ai tagata  
ma sa masani ona latou vaaia i  
aso faisoo—na faafesootaiina nei  
mea uma e le Alii ma Ana  
faamatalaga o le upu moni, ina ia  
faamanatuina mai ai pea i loto o  
tagata Ana a'oa'oga, e oo lava foi i  
itula o mafatia ai i latou i le tele o  
feau ma galuega faale olaga nei.

E finagalo le Atua ina ia mātauina  
ma ia iloa lelei e Lana fanau Ana  
galuega, ma ia latou fiafia i le

faigofie ma le lē gaoiā o le matagofie ua Ia faaofuina a'i lo latou nofoaga faa-lalo-nei. E fiafia lo tatou Tamā i mea uma e matagofie. a e sili atu i lo uiga uma e aliali mai i fafo ona Ia fiafia i le amio matagofie. E finagalo o Ia ina ia maua i Lana fanau le amio mamā ma le amio matagofie, e pei o le lalelei lē gaoiā ua i fugālaau.

Pe ana fai se'i tau lava ina tatou faalogo, o le a a'oa'oina lava i tatou i a'oa'oga tāua o le usiusitai ma le talitonu mai galuega uma

na faia e le Atua. E amata mai i fetu o le lagi, o e o loo felelei i o latou ala ua faatonuina mo i latou i le vānimonimo mai ona po o le vavau, ma ua le mafai ona latou sē 'ese mai ai, seia oo lava i mea aupito iti ma le faatauva, o loo latou usiusitai uma lava i le finagalo o Lē na Ia faia i latou. O loo tausia ma fafagaina e le Atua o mea uma lava na Ia faia. O Ia, Lē o loo Na taofiofia le manomanō o paneta i le loloto o le vānimonimo, o loo faapea foi ona Ia silasila ifo i le tausiga ma le fafagaina o nai manu felelei

ninii o loo tausani i a latou pese  
faatauva'a e aunoa ma le fefe.

A o aga'i atu tagata i a latou  
galuega i aso taitasi, e faapea foi a  
o latou o punonou ifo ma tatalo; a  
o taoto ifo i latou i le po, ma  
latou toe ala mai i le taeao; a o 'ai  
le tagata mauoa i lona maota, ma  
faapotopoto ane foi e le tagata  
mativa si ana fanau i la latou 'aiga  
faatauva'a, a e o loo leoleoina i  
latou uma ma le mutimutivale e  
le Tamā o i le lagi. E leai ni  
loimata maligi e le o silasila mai i

ai le Atua. E leai se tasi o loo  
'ata'ata fiafia, a e le mātauina e Ia.

Pe ana se'i mafai ona tatou  
talitonu atoatoa i le ta'ita'iga ma  
le tausiga alofa a le Atua, semanū  
lava e mavae 'ese ia i tatou le  
soona popole vale. Semanū foi e  
le lofitūina o tatou olaga i  
faanoanoaga e pei ona i ai nei;  
auā o mea uma lava, e tusa po o  
ni mea tetele, po o ni mea  
faatauvaā, a e o le a tatou tuuina  
atu uma lava i aao o le Atua. E ui  
i le manomanō ma le matalasi o  
mea o loo Ia tausia, a e le

femēmēai ai Lona finagalo, pe  
to'ilalo ai foi Lona malosi i le  
mamafa a'ia'i o Ia galuega.

Semanū lava e lagona ai i o tatou  
loto le filemu ma le malologa  
faaleagaga ua loa ona tatou tagata  
'ese i ai.

Ina o faafiafiaina lou loto i lou  
maimoa atu i le matagofie 'ese o  
lenei lalolagi, ia e mafaufau atu  
foi i le lalolagi fou o lo ua  
folafolaina mai, e le toe iloa ai  
sina ila o le agasala po o le iuvale,  
pe toe vaaia ai foi le ata o le  
faafanoga. Se'i e faatu ane i lou

mafau fau foliga o le nofoaga  
tumau o le 'au paia, ma ia e  
manatua lenei mea, e sili atu lona  
matagofie i lo le matagofie uma e  
mafai ona tatou manatu i ai. O  
mea alofa eseese a le Atua e pei  
ona tatou vaaia i Ana galuega  
faa-lalo-nei, ua na o se ata  
faanenefu lava lea o Lona pupula  
tele. Ua tusia, "O mea e le'i vaaia  
e mata, e le'i lagona foi e taliga, e  
le'i oo foi i le loto o se tagata, o  
mea ia ua saunia e le Atua mo i  
latou o e alofa ia te ia."

E tele tala ua saunia e tagata tusi tala ma alii a'oa'oina e uiga i le matagofie o mea o loo tumu ai le lalolagi nei, a e sili i lo latou uma ona fiafia o le tagata Kerisiano i le matagofie o le lalolagi; auā ua na mautinoa, o mea ua faia e aao o le Tamā, ma ua na vaaia foi Lona alofa o loo faaalia mai i fugālaau, ma ituaiga eseese o laau. E le mafai se tasi ona matuā fiafia atoatoa i le uiga o atumauga ma vanu, po o vaitafe foi ma le sami, pe afai na te le vaai i ai ma lona mautinoa lelei, o ia mea uma ua

faamatalaina mai ai le alofa o le  
Atua i tagata.

O loo fetalai mai le Atua ia i tatou  
i Ana galuega ua faaalia mai ai  
Lana sauniga poto, ma o loo  
faapea foi ona Ia musumusu mai i  
o tatou loto i le galuega mana a  
Lona Agaga. Pe afai e matala o  
tatou loto, o le a tatou maua pea  
ni a'oa'oga tāua mai le tele o mea  
o loo tatou feagai ai, ma mea o  
loo siomia ai tatou, po o mea foi o  
loo tutupu mai i aso taitasi i o  
tatou autafa. Ina ua mātauina le  
galuega mana ma le sauniga poto

a le Atua e lē na tusi salamo, na ia faapea ane ai, “Ua tumu le lalolagi i le alofa o Ieova.” “O lē ua poto na te tausia nei mea; e iloa e i latou o mea alofa a Ieova.”

O loo fetalai mai foi le Atua ia i tatou i Ana afioga tusia. O le faamaninoga atili lea ia i tatou o le faaaliga o Lona uiga ma Lana amio, o Lana faiga i tagata, i le ma le galuega tele o le faaolataga. O le Afioga lea ua tatalaina mai ai i o tatou luma le tala tuu faasolo i le 'au pateriaka ma perofeta ma isi tagata paia anamuā. O i latou

ia, “o tagata lava e tusa ma i tatou.” Ua tatou vaai i lo latou t̄auiivi ma mea faafatiātamai e pei lava o i tatou, ma lo latou pau'ū i lalo ifo o tofotofoga e pei foi o i tatou; a e peitai na toe faatutūina i latou i luga ma latou manumalo i le alofa tunoa o le Atua. I le a o tatou o vaavaai atu ia i latou, e faamafanafanaina ai o tatou loto ma faafouina ai lo tatou malosi mo le taua o lo ua tatou tau ai i lo tatou sailia o le amiotonu. A o tatou o faitau i lona t̄aui o le uiga o la latou fesootaiga ma le Atua; ma le malamalama, ma le alofa,

ma le manuia na foaiina atu mo i latou e faafiafiaina ai o latou loto; i le ma le galuega na latou mafaia ona o le alofa tunoa na tuuina atu ia i latou—o le a faamūina ai e lea lava agaga na osofia ai i latou le afi paia i o tatou loto, o le a fia tutusa ai lo tatou uiga ma lo latou, ma tatou fia savavali ai ma le Atua e pei ona sa faia e i latou.

O le ta'utinoga lenei a Iesu e uiga i afioga o lo ua tusia mai i le Feagaiga Tuai—i le ua sili lava foi ona faataunuuna lelei o lea ta'utinoga i afioga tusia o i le

Feagaiga Fou—“O Tusi foi ia o loo molimau ia te a'u,” O le Faaola lava lea, Lē o loo faa'autū i ai o tatou faamoemoega mo le ola e faavavau. Ioe, o Keriso lava o loo molimau i ai le Tusi Paia atoa. E amata mai i le muai tala lava i le faiga o le lalolagi—auā “e leai se mea e tasi na faia e le'i faia e ia”—e oo atu lava i le folafolaga mulimuli o i ai i le Tusi Paia, e faapea, “Faauta, ou te vave alu atu,” o loo tatou faitau ai pea i Ana galuega ma tatou faalogologo atu ai i Lona siufofoga. O lea la, pe afai ua e fia

faamasani ma le Alii Faaola, ia e to'aga pea e faitau ma su'esu'e i le Tusi Paia.

Ia atoatoa ona faatumuina o lou loto i afioga a le Atua, o le vai lea o le ola e faamalieina ai lou matelāina i le fia inu. O le areto o le ola lea mai le lagi. O le ta'utinoga lenei a Iesu, “Afai tou te le aai i le tino o le Atalii o le tagata, a le inu foi i lona toto, ua le i totonu ia te outou le ola.” Ona Ia toe faamaninoina lea i Lona fetalai mai, “O upu ou te fai atu ia te outou, o le agaga ia, o le ola foi

ia.” E galueaiina le ola o o tatou tino i mea tatou te aai ai ma inu ai, i le ua faapea foi i lo tatou ola faaleagaga, o mea e naunau i ai o tatou mafaufau e maua mai ai le malosi ma le maloloina o o tatou tino faaleagaga.

O le mataupu i le faaolataga, o se mataupu lava e fia iloilo pea i ai le 'au agelu; i le o le mataupu lava foi lenei o le a saga iloilo ma su'esu'e pea i ai le 'au paia, ma o le a faa'autūina ai a latou pese i tausaga e le gata mai o le ola e faavavau. Pe le tataua ea la ona

tatou su'esu'e nei i ai ma le  
faaeteete? O le alofa lē fai tuāoi  
ma le alofa mutimutivale o Iesu, i  
le ma le taulaga tele na Ia saunia  
ona o i tatou, e tatau lava ona  
tatou mafaufau loloto i ai ma le  
matuā āva tele. Ia tatou mafaufau  
pea i le uiga ma le amio a lo tatou  
Faaola ma lo tatou Puluvaaga. Ia  
taulai mafaufauga o o tatou loto i  
lona tāua o le feau a Lē na afio  
mai ia Na laveaiina Lona nuu mai  
a latou agasala. A o faapea ona  
tatou mafaufau pea i mataupu  
silisili faalelagi, o le a malosi atili  
ai lo tatou faatuatua ma lo tatou

alofa, ma o le a tauau pea ina sili  
atu ona fiafia mai ai o le Atua i a  
tatou talosaga, auā o le a fefiloi  
atili pea ma le faatuatua ma le  
alofa. O le a i ai le poto ma le  
aano i a tatou talosaga. O le a  
saga faateleina pea le talitonu ma  
le faatuatua ia Iesu, ma o le a  
matuā lagona i aso taitasi uma  
Lona mana tele Na te mafai ona  
faaola ai pea lava i e faalatalata  
atu i le Atua ona o Ia.

A o tatou o mātauina atu le  
atoatoa o le Faaola, o le a tatou  
naunau atu ai ina ia liua atoatoa i

tatou, ma ia faafouina i le faatusa  
o Lona mamā. O le a gālala o  
tatou agaga i le fia avea ia faapei  
o Ia, Lē ua tatou fiafia ma alolofa i  
ai. O le tele o lo tatou mafaufau  
atu ia Keriso, o le tele foi lea o lo  
tatou fia talatalaina atu o Ia i nisi,  
ma lo tatou fia avea ma Ona sui i  
le va ma le lalolagi.

E le'i tusia le Tusi Paia mo na o e  
ua a'oa'oina; e leai, a e na tusia  
ma faatatauina mo tagatā lautele.  
Ua matuā faamaninoina lava e  
pei o le aoatea upu moni tāua  
uma e aogā mo le faaolaina o i

tatou; o lea, e leai se tasi o le a  
sesē ai pe le iloa ai lona ala,  
vaganā i latou o e ua fia mulimuli  
pea i le mea ua tonu i o latou lava  
manatu faaletagata, a ua latou  
lafoaiina le finagalo o le Atua ua  
manino ona faamalamalamaina  
mai.

'Aua ne'i o tatou soona  
faaaogāina se manatu o se tasi  
tagata e uiga i le a'oa'oga o loo i le  
Tusi Paia, a e ao ina tatou su'esu'e  
lava tatou i afioga a le Atua. Pe  
afai o le a tatou tuuina atu i nisi ia  
latou faia o tatou mafaufauga, o

le a tautevateva ai lo tatou  
maelegā, ma faaitiitia ai lo tatou  
atamai. Pe afai e le faaaogāina  
pea le malosi aupito tāua o le  
mafauafau e su'esu'e ai i mataupu  
silisili ma le aogā ua tatau ona  
taulai i ai, o le a tauau pea ina  
faaitiitia o lea malosi, seia oo ina  
o le a le toe mafai ona taofi tonu  
ai i le uiga loloto o le Afioga a le  
Atua. A e peitai, o le a faateleina  
le malosi o le mafauafau pe a  
faaaogāina pea e su'esu'e atu i le  
fesootaiga o mataupu o i le Tusi  
Paia, o loo faatusatusaina lea mau  
ma lea mau, ma “faamatalaina

mea faaleagaga i upu  
faaleagaga.”

E leai lava se tasi mea e tusa ona  
faamalosiina ai o le atamai faapei  
o le su'esu'e i le Tusi Paia. E leai  
lava se isi tusi e sili i lo le Tusi  
Paia, o loo aofia ai upu moni e le  
mafaatusaina, i lona faalateleina  
ma faamalosiina o le mafaufau.  
Pe ana matuā su'esu'eina le  
Afioga a le Atua e pei ona tataui  
ai, po ua maua ai e tagata le  
faalateleina o le atamai, ma le  
tapulaa maualuga o le amio, ma  
le matuā faasaga tonu o le loto

ma le malosi I mea o loo tausisi  
atu i ai, o mea lava ia o loo seāseā  
vaaia i nei ona po.

A e peitai e faatauvaā se aogā e  
maua mai i le soona faitau  
faavave i le Tusi Paia. E mafai e se  
tasi ona faitauina uma le Tusi  
Paia, a e aunoa ma lona  
mautinoaina o lona matagofie, po  
o lona pu'eina foi o lona loloto  
ma lona uiga lilo. E sili ona aogā  
o le su'esu'e i na o se fuaiupu o  
tasi seia oo ina ua maua lelei e le  
mafau fau lona uiga, ma ua  
mautinoaina lona faafesootaiga i

le mataupu o le faaolataga, i lo le  
faitauina .o mataupu e tele e  
aunoa ma le mautinoa lelei o le  
mea o loo tau aga'i i ai le  
su'esu'ega, ma le faale iloga foi  
ona maua mai ai o se a'oa'oga  
tatau. Taofi lau Tusi Paia ia te oe.  
Pe a i ai sou itula e mafai ai, ia e  
faitau loa i ai; ia taofi upu ua e  
faitauina i lou mafaufau. E oo foi  
i sau savalivaliga i le auala, se'i e  
faitau lava i se fuaiupu, ma  
fefuliai I lou loto, ona mautū ai  
lea i lou mafaufau.

E le mafai ona tatou maua o le poto faaleagaga pe a aunoa ma le vilivilitai ma le su'esu'e ma le tatalo. O nisi vaega o le Tusi Paia ua matuā malamalama lava e le mafai ona sesē ai se tasi; a o loo i ai nisi vaega e le o taatia mai i luga lo latou uiga ina ia mafai ai ona iloa vave i le tepa tasi i ai. E ao lava ona ia faatusatusaina lea mau ma lea mau. Ia matuā mafaufau i ai ma le tatalo. O le su'esu'ega ua faia faapea, o le a tauia tele lava. E pei ona maua e le tagata 'eli auro le vaega o le auro ma maa tāua sa natia i lalo

ifo o le fogāeleele, o le a faapea  
foi ona maua o le oa e silisili ona  
tāua e le ua saili atu ma le filigā i  
le Afioga a le Atua, o le oa tāua  
lava lea e nātia mai lē o loo saili  
atu ma le faatamala. O afioga  
tāua mai le Agaga o le Atua, pe a  
teuina i le loto ma fefuliai ai, o le  
a avea ia e pei o magāvai o loo  
tafe mai i le vaipuna o le ola.

'Aua lava ne'i o tatou su'esu'e atu  
i le Tusi Paia e aunoa ma le muai  
tatalo. A o le'i susu'eina ona  
itulau, e tatau ona tatou muai ole  
atu lava ina ia faamalamalamaina

i tatou e le agaga Paia, i le o le a faafofogaina lava la tatou tatalo. Ina ua alu atu Natanielu ia Iesu, na fetalai atu ai le Faaola ia te ia, “Faauta, o le Isaraelu moni, e leai sona pepelo.” Na fai atu loa Natanielu, “Na e silafia a'u ifea?” Ua tali atu Iesu, “Na ou iloa oe i lalo o le mati, a o le'i valaau atu lava Filipo ia te oe.” E faapea lava foi ona silafia mai o i tatou e Iesu i le mea lilo e masani ona tatou tatalo atu ai ia te Ia, a o tatou o saili atu ia te Ia ina ia tatou maua le malamalama tatou te iloa ai le upu moni. O agelu o e o loo mau

i le malamalama faalelagi, o le a faatasi mai ia te i latou o e ua saili atu ma le loto maulalo ina ia latou maua le ta'ita'iga tonu faale Atua.

E faasilia le Faaola e le Agaga Paia ma Na vivii atu ia te Ia. O Lana lea feau, o le faaalua mai o Keriso, ma le mamā o Lana amiotonu, i le ma le faaolataga tele ua tatou maua ona o Ia. Ua fetalai mai Iesu, “E maua e ia mai ia te a'u, ma faailoa atu ai ia te outou.” O le Agaga o le upu moni, ua na o Ia Na te mafai ona

a'oa'o tonuina mai o le upu moni.  
Faauta i le matuā manatu tele mai  
o le Atua i le fanau a tagata, ina  
ua Na foaiina mai Lona Alo e  
maliu mo i latou, ma ua Na tofia  
foi Lona Agaga e aveia ma  
faia'oga ma ta'ita'iala tumau ia i  
latou!

## Mataupu E XI—O lo Tatou Tofi o le Tatalo

O loo fetalai mai pea le Atua ia i tatou i galuega a Ona aao, i faaaliga o Lona finagalo e pei ona tusia mai i le Tusi Paia, i Ana sauniga poto, atoa foi ma le galuega mana a Lona Agaga. A e peitai ua le lava lea; a ua tatau ona tatalaina atu foi o tatou loto ia te Ia. E ao lava ona tatou maua le fesootaiga ola ma lo tatou Tamā faalelagi, ina ia tumau ai pea ia te i tatou le ola ma le malosi faaleagaga. Atonu o loo tosina atu lava o tatou loto ia te Ia, ma o

loo tatou mafaufau atu i Ana  
galuega, ma Lona alofa, ma Lana  
faamanuiaga; a e le maua ai le  
tino atoatoa o la tatou fesootaiga  
ma Ia. Ina ia faaatoatoaina lo  
tatou fesootaiga ma le Atua, e ao  
lava ona tatou talatalanoa ai ma  
Ia e uiga i lo tatou olaga  
faa-lalo-nei.

O le tatalo, o le tatalaina atu lea o  
le loto i le Atua, e pei ona  
tatalaina atu i se uō. E le faapea  
tatou te faia lea mea ona ua le  
silafia mai e le Atua o tatou loto,  
a e peitai ina ia mafai ai e i tatou

ona maua o le fesootaiga ola ma  
Ia. E le aveina ifo le Atua ia i  
tatou e le tatalo, a e peitai e  
aveina a'e ai i tatou ia te Ia.

Ina o femāliu'ai Iesu i le lalolagi  
nei, na Ia a'oa'oina ai Ona soo i le  
ala tonu e fai ai a latou tatalo. Na  
Ia faatonuina i latou ina ia latou  
laulauina atu o latou mana'o mo  
aso taitasi i luma o le Atua, ma  
lafo atu mea uma latou te popole  
ai ia te Ia. I le o le folafolaga na  
tuuina atu e Iesu ia i latou e  
faapea, o le a taliaina a latou

talosaga, o Lana folafolaga foi lea mo i tatou.

O Iesu foi, ina o mafuta o Ia ma tagata, sa tatalo soo. Sa i lo tatou Faaola o tatou mana'o ma lo tatou vaivai, o lea na avea ai o Ia ma Sē ua fai talosaga ma olega, na Ia saili atu ai i Lona Tamā mo nisi faaopoopoga fou o le malosi, ina ia mafai ona Ia tulai atu ai mo Lana galuega, ma onosai ai i tofotofoga. O Ia o lo tatou faaa'oa'oga i mea uma lava. O lo tatou Uso lava Ia i o tatou vaivai, na “faaosoosoina o ia i mea uma

pei o i tatou;” a e peitai, talu ai ona ua leai se agasala ia te Ia, sa Ia matuā 'ino'ino tele ai i le leaga, ma ona o lea foi sa feagai ai o Ia ma ni tauiviga faigatā, ma le faapuapuagatiaina o Lona agaga i lenei lalolagi o agasala. O le faaeeina atu ia te Ia o le uiga o i tatou le fanau a tagata, sa ao ai lava ia te Ia ona tatalo, ma sa aogā ai foi ia te Ia le tatalo. Sa maua e Ia le faamafanafanaga ma le olioli i le fesootaiga ma Lona Tamā i le tatalo. I le pe afai sa lagona le fia tatalo e le Faaola o tagata ma le Alo o le Atua, e le

sili ai ea ona tatau ona fia tatalo  
faatauana, ma tatalo soo i tatou  
tagata vaivai ma le tumu i le  
agasala?

O loo faatalitali mai lo tatou Tamā  
o i le lagi Na te fia liligiina mai ia  
i tatou le fua atoa o Lana  
faamanuiaga. O lo tatou tofi lea, o  
le feinu tele i le puna o le alofa lē  
fai tuāoi. O se mea e matuā ofo ai  
ona o lo tatou seāseā tatalo! O loo  
naunau le finagalo o le Atua ma o  
loo faatali mai o Ia Na te fia  
faafogaina le tatalo faamaoni a  
se tasi ua aupito faatauva ma le

maulalo o Lana fanau, a o i tatou  
ua tele ina peiseai ua tatou  
mumusu e faailoa atu o tatou  
mana'oga i le Atua. Po o le a se  
manatu o le 'au agelu ia i tatou le  
fanau vaivai ma le lē mafaia O se  
mea, o e o loo matitiva, ma o loo  
siomia e le vao faaosoosoga; ina o  
loo naunau mai le finagalo o le  
Atua ua tumu i le alofa lē fai  
tuāoi, Na te fia foai mai ia i tatou  
le manuia e faasilisili lava i mea  
tatou te ole atu ai ma mafaufau i  
ai; a o lenei, o loo seāseā ona  
tatou tatalo, ma e faatauvaā foi lo  
tatou faatuatua? E fiafia le 'au

agelu e ifo atu i luma o le Atua; e fiafia i latou e faalatalata atu ia te Ia. O le mea lea e sili ona latou olioli ai, o lo latou mafuta pea ma fesootai pea ma le Atua; a e peitai i tatou, le fanau o i lenei lalolagi, o e ua tatau ona latou fia maua tele o le fesoasoani e gata i le Atua ona maua mai ai, ua peiseai o loo tatou malilie e feōai pea e aunoa ma le malamalama mai Lona Agaga, e aunoa foi ma le mafutaga faatasi ma Ia.

O e ua faavaivai i le tatalo, o le a ufitia lava i latou i le pogisa o lē o

loo leaga. E tauanauina i latou ia  
agasala e le fili, lē o loo  
musumusu mai ana faaosoosoga i  
o latou taliga; i le ua māfua lenei  
leaga uma ona ua latou le  
faaogāina le tofi ua tuuina mai e  
le Atua ia i latou, o le tatalo lava  
lea. Ona o le a ea ua faagesegese  
ai le fanau a le Atua i le tatalo,  
meāmanū o le ki lava lea i lima o  
le faatuatua e tatalaina a'i le fale  
teu 'oa faalelagi, o loo teuina ai  
faulaigā 'oa e le mafaamatalaina  
ma le tamaoaiga matalasi a Lē  
Silisili 'Ese? Pe a tete'a i tatou ma  
le tatalo e le aunoa, i le ma le

matuā finafinau i le mataala, o le  
a tauau lava ina maua i tatou e le  
agaga o le faatamala, ma tatou sē  
'ese ai mai le ala tonu. O loo le  
mapu le fili i lona taumafai e  
pupuni le ala tatou te sao atu ai i  
le nofoa o le alofa tunoa, ina ia  
'aia ne'i avea a tatou talosaga ua  
faia ma le faamaoni ma ala tatou  
te maua ai le alofa tunoa ma le  
mana e tetee atu ai i faaosoosoga.

O loo i ai ni mea e ao lava ona  
tatou muai faataunuuina, i le  
faato'ā tataui ai ona tatou  
faamoemoe o le a faafofoga mai

ma tali mai le Atua i a tatou talosaga. O le tasi o ia mea, ia tatou matuā lagona lo tatou fia maua o le fesoasoani mai ia te Ia. Ua Ia folafolaina mai, “Ou te liligi atu le vai i le nuu naumati, ma vaitafe i le eleele mātūtū.” O e ua fia aai ma inu i le amiotonu, ma ua faanaunau atu o latou agaga i le Atua, ia latou mautinoa, e ma'o'ona lava i latou. Ia faaavanoaina le loto mo le galuega mana a le Agaga, ina ne'i le maua mai le faamanuiaga a le Atua.

E ui ina ua avea lo tatou mativa  
a'ia'i ma uiga ma'utinoa o loo  
finau atu ma ole malosi mo i  
tatou, a e tatau lava ona tatou  
saili atu pea i le Atua, ia Na  
faaatoaina ia mea uma mo i tatou.  
O loo fetalai mai o Ia, "Ia outou  
ole atu, ona foaiina mai ai lea ia te  
outou." I le ma lenei, "O ia lava  
sa na le faasaoina lona lava Alo, a  
ua tuuina mai o ia e sui a'i i tatou  
uma lava, e le foai fua mai ea e ia  
ia te i tatou mea uma lava faatasi  
ma ia i se a?"

Pe afai ua tatou mautinoaina se leaga ua i o tatou loto, ma ua tatou pipii atu pea i ai, o le a le faafofoga mai le Atua ia i tatou; a e peitai le tatalo a lē ua salamo moni, e talia pea lava. Pe afai ua uma ona tatou faatonuina o mea uma ua tatou mautinoa ua tatou sesē ai, ia tatou talitonu loa o le a tali mai le Atua i a tatou talosaga. E le ona o so tatou lava lelei o le a alofagia ai i tatou e le Atua, a e peitai ona o le lelei o Iesu lava o le a laveaiina ai i tatou, ma o Lona toto foi o le a faamamāina ai i tatou; a e ui foi i lea, o loo i ai

lava le vaega e ao ina tatou faia  
ina ia mafai ona taliaina ai o i  
tatou.

O le tasi foi uiga e maua ai le  
aogā o a tatou talosaga, o le  
faatuatua lea. “Auā e tatau i lē alu  
atu i le Atua ona talitonu o loo  
soifua o ia, o ia foi na te tauia mai  
o ē matuā saili ia te ia.” Na fetalai  
atu foi Iesu i Ona soo, “O mea  
uma lava tou te ole mai ai i a  
outou tatalo, ina faatuatua ia o le  
a maua e outou, ona faia lava lea  
mo outou.” Pe tatou te talitonu ea  
i Lana ua fetalai mai?

O le folafolaga e lautele, ma e le  
fai sona tuāoi; e faamaoni foi o Ia,  
Lē ua folafola mai. Pe afai tatou te  
le maua le mea tonu na tatou ole  
atu ai, i le aso lava na tatou tatalo  
atu ai, ia tatou talitonu pea ua  
faafogaina i tatou e le Alii, ma o  
le a tali mai lava o Ia i a tatou  
tatalo. O i tatou o le fanau e sesē  
gofie, ma e puupuu foi la tatou  
vaai, ua ala ai ona tatou ole atu i  
nisi aso mo mea e le maua ai so  
tatou manuia; a e peitai lo tatou  
Tamā alofa faalelagi, e tali mai  
pea lava o Ia i Lona foaiina mai o

mea ua Na silafia e sili ona aogā  
mo i tatou—o mea lava ia  
semanū o le a tatou ole atu ai pe  
ana se'i mafai ona tatou maua o le  
vaai manino faalelagi, ma tatou  
iloa tino ai le uiga moni o mea.

Pe afai ua peiseai ua le talia mai a  
tatou talosaga, ia tatou taofi mau  
pea i Lana folafolaga; auā e le  
pine lava ona oo mai o le aso e  
tali mai ai le Atua, ona tatou  
maua ai lea o le manuia ua sili  
ona aogā mo i tatou. A e peitai e  
matuā sesē lava le manatu e  
faapea, o le a talia mai lava e le

Atua ia soo se mea tatou te ole  
atu ai ia te Ia, atoa foi ma mea le  
aogā tatou te manana'o atu ai. O  
le poto tele o le Atua e le mafai ai  
ona sesē o Ia; o Lona agalelei foi  
Na te le taofia ai “se mea lelei i e  
ua sao lo latou savavali.” O lea, e  
ui lava ina ua tatou le vave vaai  
se tali mai i a tatou tatalo, a e 'aua  
ne'i o tatou fefefe i talitonu pea ia  
te Ia. Ia tatou faalagolago pea i  
Lana folafolaga faamaoni, “Ia  
outou ole atu, ona foaiina mai ai  
lea ia te outou.”

Pe afai o le a tatou usiusitai atu i lo tatou masalosalo ma lo tatou fefe, ma o le a tatou taumafai i se poto ma se malosi ua ia i tatou ona faamalamalamaina ai o mea uma ua le o manino i la tatou vaai, a e leai so tatou faatuatua, o le a na ona tupu tele ma tauau ina loloto ai lo tatou faaletonu. A e peitai pe a tatou ō atu i le Atua, a o tatou o lagona lo tatou fia faalagolago atu ia te Ia, ma lo tatou le mafaia o se mea e pei o lo tatou lava uiga moni, ma tatou faailoa atu o tatou mana'o ma le faamaulalo, atoa ma le faatuatua

ola i luma o Lē Na te silafia mea  
uma, ma o loo pulea e Ia mea  
uma lava i Lona finagalo ma le  
mānava atu o Lona fofoga, o le a  
faafofoga mai lava o Ia i lo tatou  
tagi atu, ma Na faasusulu mai le  
malamalama i o tatou loto. O le  
tatalo ua faia ma le faamaoni, o le  
a mafai ona tatou faafesootai ai  
ma le finagalo o Lē Silisili 'Ese. E  
ui lava ina e le o vaaia i o tatou  
nei mata faaletino o loo punou ifo  
lo tatou Faaola i o tatou luga i  
Lona finagalo alofa ma le alofa  
mutimutivale, a ia tatou talitonu  
pea, o loofaapealava o Ia. E ui ina

tatou te le o faalogoina le pa'i mai  
o Lona aao, a e peitai o loo i ai  
lava i o tatou luga Lona aao alofa.

Pe afai tatou te ō atu i le Atua ma  
la tatou olega ia alofagia i tatou e  
Ia, ma ia Na faamanuia mai ia i  
tatou, ua tatau lava ona muai  
maua i o tatou lava loto le agaga  
o le alofa ma le faamagalo atu i  
nisi. Auā, po o le a faapefea ona  
tatou tatalo atu e faapea, “Ia e  
faamagalo ia te i matou i a matou  
agasala, e pei o i matou foi ona  
matou faamagaloina atu i e ua  
agaleaga mai ia te i matou,” a o

loo i ai pea ia i tatou le agaga o le lē fia faamagalo atu i nisi? Pe afai ua tatou faamoemoe ina ia talia mai a tatou talosaga, e ao lava ona faapea ona tatou faamagalo atu i nisi i le faamagaloga o loo tatou ole atu ai ia oo mai ia i tatou.

O le filigā i le tatalo, o le tasi lea ala o le a talia mai ai. E ao ona ia tatou tatalo soo pe afai ua tatou manana'o ina ia faatupu teleina lo tatou faatuatua ma lo tatou poto faaleagaga. Ua apoapoaiina i tatou ia tatou “finafinau i le

tatalo,” ma ia tatou “mataala i lea mea ma le faafetai.” Ua lapatai atu foi Peteru i le 'au faatuatua, “O lena, ia faautauta ai, ma ia mataala outou ma le tatalo.” Ua faapea foi ona faatonu mai o Paulo, “Ia faailoa atu o outou mana'o i mea uma lava i le Atua, i le tatalo, ma le faatoga, atoa ma le faafetai.” Ua toe fai mai Iuta, “A o outou, le 'au pele e . . . o le Agaga Paia tou te tatalo ai, ia outou faatumau ia te outou i le alofa o le Atua.” O le tatalo e le aunoa, o le fesootaiga lē motusia lea o le agaga ma le Atua, e tafe mai ai le

ola mai le Atua i o tatou ola, ona toe tafe atu ai lea o le mamā ma le paia mai o tatou ola i le Atua.

Ua tatau lava ona tatou vilivilitai i le tatalo; 'aua ne'i faalavelaveina oe i se mea e tasi. Ia e matuā taumafai lava ina ia avanoa pea le fesootaiga i le va o o Iesu ma lou lava agaga. Ia e saili lava ina ia e faaaogāina ia soo se avanoa ua feagai ma oe o le a mafai ona e aga'i atu ai i “le mea ua masani ona fai ai o tatalo.” O i latou o e o loo matuā saili i le mafutaga ma le Atua, o le a vaaia pea i latou i

saunigā lotu tatalo, o loo latou faamaoni pea i lo latou tiute, ma o loo naunau pea lava latou te fia seleseleina mai le lelei uma latou te mafai ona maua. O le a tauau pea lava i latou i luma, ona o lo latou tutū tonu pea i le mea o le a latou maua ai 'ave o le malamalama mai le lagi.

Ia tatou tatalo i faatasiga faaleaiga; a ia sili ona tatou to'a'aga i le tatalo i le mea lilo i lo mea uma lava; auā o le ola lava lea o le agaga. E le mafai lava ona ola tālaulau le agaga, pe a faale

iloga ona filigā i le tatalo. Pe afai o le a na o talosaga e faia i lotu faaleaiga, po o lotu fai tele, e le lava lea. Pe afai ua na o oe i se mea tuufua, ia e fofola uma atu lou loto i luma o le silafaga malamalama a le Atua. O le tatalo ua faia i le mea lilo, e na o le Atua lava e faafofoga mai i ai. O upu ua faailoa atu ai i luma o le Atua le mafatia o le agaga, ia le faalogoina e taliga o se tasi. O le tatalo faalilolilo foi e sa'oloto ai le agaga mai le tele o uiga faale olaga nei o loo vagavagaia ai, e tosina 'ese ai le mafaufau ma lē

maua ai le to'a filemu o le loto. O le tatalo faapea e aapa atu ai le agaga i le Atua ma le filemu, a e i ai foi ma le naunautai faamaoni e pulunaunauina ai. Ona maua mai ai lea ia te Ia, Lē o loo silasila mai i le mea lilo, le mafutaga mālie ma le tumau, ina ua faafofogaina e Ia le tatalo ua alu a'e mai le taele o le loto. O le faatuatua ola ma le lē gaoiā, o le a maua ai e le agaga le mafutaga paia ma le Atua, ma o le a na maua ai foi se faaopoopoga o le malamalama moni mai le lagi e faamalosiina ma faamautuina ai o ia i le taua

ma Satani. O le Atua, o Ia o lo tatou 'olo malosi.

Ia e tatalo i lou afeafe, ma ia fai ma au masaniga le siitia a'e pea o lou loto i le Atua a o e fealuai i au feau i aso taitasi. O le amio faapea na feōai ai Enoka ma le Atua. O le siitia a'e faapea o o tatou loto i le tatalo e aunoa ma se leo, a e alu a'e lava i luma o le nofoālii o le alofa tunoa e pei o le asu o mea manogi ua faamūina i luga o le fata faitaulaga. E le mafai ona manumalo mai o Satani i lē ua faapea ona mafuta ma le Atua.

E leai se itula po o se mea e faapea ua le tatau ona fai ai o se talosaga i le Atua. E leai se mea na te mafai ona vavaoina o le agaga moni o talosaga e siitia a'e ai o tatou loto. E mafai lava e i tatou ona siitia a'e pea o se talosaga i le Atua i totonu o se motu o tagata i le ala tele, po o totonu foi o galuega, ma tatou ole atu ai ina ia tatou maua le ta'ita'iga faalelagi, e pei ona sa faia e Neemia ina o faailoa atu e ia lona mana'o i luma o le tupu o Aretaseta. I soo se mea lava tatou

te i ai, o le a mafai lava ona tatou maua ai o se afeafe po o se mea tuufua tatou te faafesootai ai ma le Atua. E tatau lava ona tatalaina pea puipui o o tatou loto, ma tatou valaau atu pea ia Iesu ina ia afio mai o Ia e mafuta ma i tatou, o Ia o le malo faalelagi i o tatou agaga.

E ui ina o loo siomia i tatou i se 'ea eleelea ma le leaga, a e 'aua lava ne'i o tatou mānavaina, a ia tatou ola pea i le 'ea mamā mai le lagi. O le siitia a'e o o tatou agaga I luma o le Atua i le tatalo ua faia

ma le faamaoni, o le a mafai ona tatou tapunia ai o faitotoa uma e aga'i i mafaufauga eleelea, ma manatu e le paia. O i latou o e ua faaavanoaina o latou loto ina ia latou taliaina mai le fesoasoani ma le faamanuiaga a le Atua, o le a mānavaina e i latou le 'ea e sili atu lona paia i lo le 'ea o le lalolagi, ma o le a latou maua pea le fesootaiga paia ma le lagi.

Ua tatau ona manino atili pea la tatou vaaiga ia Iesu, ma faalauteleina atili pea lo tatou malamalama i Iona tāua o mea

moni e faavavau a le Atua. O le matagofie o le paia ia faatutumuina ai loto o le fanau a le Atua; o lea ua tatau ona tatou saili atu ai pea mo le faaalua mai o mea tāua faalelagi ina ia faaatoatoaina ai lea matagofie I totonu ia te i tatou.

Ia tuuina atu pea o tatou agaga ia tosia a'e i le Atua, ia Na faatagaina i tatou tatou te mānava atu i le 'ea mai le lagi. E mafai lava ona faapea ona tatou nonofo latalata i le Atua, ina ia oo mai loa se tofotofoga faafuase'i, a

e liliu atu loa foi ia te Ia o tatou  
mafaufau e pei ona liliu atu o le  
fugālaau i le Ia.

Ia i luma pea o le Atua ou  
mana'o, ma lou fiafia, ma ou  
faanoanoaga, ma mea e te mata'u  
ai. E le mafai ona mamafa o se  
avega ia te Ia; e le mafai ona le  
lavā o Ia. O Ia, o Lē Na te  
faitauina lauulu i lou ulu, e le  
faatauvaā ia te Ia mana'oga o  
Lana fanau. “E mutimutivale tele  
le Alii ma le alofa naunau.” E  
ootia Lona finagalo alofa i o tatou  
faanoanoaga, e oo lava foi i lo

tatou ta'uta'u atu i Ona luma o  
mea o loo tatou mafatia ai. O mea  
uma e faatupuina ai le faaletonu  
ma le fetōa'i i o tatou mafaufau, ia  
avatu uma lava i Ona luma. E leai  
se mea e mamafa ia te Ia, auā o Ia  
lava Lē o loo taofiofi a'e i paneta,  
o loo pulea e Ia le aoao o mea. E  
leai se mea faatauva'a Na te le  
silafia o mea uma e faamata o le a  
i ai sona fesootaiga ma lo tatou  
filemu. E leai se matapu lilo ma le  
pouliuli o loo lagona i o tatou loto  
e faapea e le mafai ona ati i ai  
Lana silafaga; e leai foi se  
femēmēaiga po o se fenumiaiga

ua maua ai o tatou olaga e faapea  
Na te le mafai ona toe  
faasa'osa'oina. E silafia uma e lo  
tatou Tamā o i le lagi, ma  
amanaia loa i Lona finagalo, soo  
se puapuagā e oo mai i sē aupito  
faatauvaā o Lana fanau, soo se  
mea e mafatia ai le mafaufau o so  
latou, soo se fiafiaga, po o soo se  
upu foi e sau i o latou laugutu i le  
tatalo. “E faamaloloina e ia e ua  
loto momomo; e fufusi e ia o  
latou manu'a.” O le fesootaiga i le  
va o le Atua ma agaga taitoatasi  
uma lava, ua matuā iloga lelei  
lava, ma ua atoatoa, e peiseai ua

na o lea lava le agaga e toatasi na  
Ia auina mai ai Lona Alo pele ina  
ia laveaiina.

Ua fetalai mai Iesu, “O lea aso e  
ole atu ai outou i lo'u igoa; ou te  
le fai atu foi ia te outou ou te  
faatoga i le Tamā mo outou; auā e  
alofa mai lava le Tamā ia te  
outou.” “Ua filifilia outou e a'u . .  
. ina ia foaiina atu e le Tamā mea  
uma lava tou te ole atu ai ia te ia i  
lo'u igoa.” A e peitai le tatalo atu i  
le suafa o Iesu, e sili atu lona tāua  
i lo le na ona ta'uina o lea suafa i  
le amataga ma le faaiuga o se

talosaga. A o lona uiga moni, ia tatou tatalo atu o ia i tatou le manatu ma le agaga o Iesu, ma o loo tatou matuā talitonu i Ana folafolaga, ma faalagolago I Lona alofa tunoa, ma galulue i Ana galuega.

E le o le finagalo lenei o le Atua ia avea i tatou e pei o nisi o e ō ma nonofo taitoatasi i mea tuufua, po o monike foi o e ua tuumuli atu ma nonofo 'ese mai tagata, ina ia tuuina atu ai i latou i lea galuega o le fai tapuaiga. A e ia pei lava o le soifuaga o Keriso o tatou

olaga— sa Ia tuumuli atu i mauga  
ma mea tuufua e tatalo ai ma saili  
ai le faafouina o Lona malosi, a e  
sa fo'i atu pea lava o Ia i mea sa i  
ai faapotopotoga ma motu o  
tagata, auā le tala'iga o le malo o  
le Atua. O se ua leai se tasi mea  
na te faasaga atu i ai, a e na o le  
tatalo lava, e tauau ina le toe  
tatalo o ia; a le o lea, o le a avea  
ana tatalo ua na o se galuega ua  
masani ai. Pe a faapea ona o'ese o  
tagata mai le faatasiga ma le  
fesootaiga ma isi tagata, ma latou  
tuua le galuega ua tatau mo le  
tagata Kerisiano, ma le tauaveina

o le satauro; pe a i'u ona latou galulue ma le faamaoni mo le Matai, o Lē sa galue mo i latou ma le faamaoni; o le a mavae ia te i latou le aano moni e faapogai a'i talosaga, ma o le a le maua foi e i latou le agaga moni o tapuaiga. O le a avea a latou tatalo ma tatalo ua faia ma le manatu ifo mo na o i latou lava. O le a le iloa e i latou ona tatalo mo le manuia o tagatā lautele, po o le atiina a'e o le malo o Keriso, ma le faatoga atu ina ia maua mai le malosi e galulue ai.

E maua ai lo tatou mativa  
faaleagaga pe a tatou lafoaiina le  
faapotopotoina o i tatou ina ia  
tatou fefaamafanafanai ma  
fefaamalosiai ai mo le feau a le  
Atua o loo tatou auauna atu ai. E  
tauau ina te'a 'ese ai ma o tatou  
mafauafau le lausiusi ma le tāua o  
upu moni o Lana Afioga. E i'u ina  
le toe lagaina ma  
faamalamalamaina ai o tatou loto,  
ma o le a solomuli foi i tatou i la  
le agaga. I a tatou feiloaiga ma  
faatasiga faa-Kerisiano, e tele ina  
tatou le maua ai se isi vaega tele o  
le manuia mai le Atua, talu ai ona

ua tatou lē feagaleleia ma  
femutimutivaleai i le alofa. O lē  
ua manatu o le a nofo 'ese pea o  
ia na o ia lava, ua le tu lea tagata i  
le tulaga ua tofia i ai o ia e le  
Atua. O lo tatou tausia ma  
faatuputupuina o lenei uiga tāua  
o le faatasitasi atu i tagata, o le a  
le gata ina tatou maua ai o ni  
fesootaiga lelei ma nisi i le  
fealofani, a e o le a maua ai foi ma  
le aga'i i luma o lo tatou lava  
malosi ma lo tatou aogā i le feau a  
le Atua.

Pe ana se'i māfuta faatasi tagata Kerisiano, ma latou fetautalatalai i le alofa o le Atua, ma upu moni tāua tau le faaolataga, semanū e faafiafiaina ma faafouina ai o latou lava loto, ma faamafanafana atu ai le tasi i le tasi. Ua tatau i aso taitasi uma ona tatou maua atili pea le a'oa'oga e uiga i lo tatou Tamā faalelagi, ma le faafouina o le faalogoina i o tatou loto o le galuega mana o Lona alofa tunoa. Ona faatupuina ai lea o lo tatou fia molimau atu ma talatala atu i Lona alofa; i le a o faapea ona tatou faia, o le a tatou

lagona ai, ua faamafanafanaina  
ma faamalosia ma o tatou lava  
loto. Pe ana se'i faateleina lo tatou  
mafaufau atu ma lo tatou  
talatalaina o Iesu, a e faaititia le  
manatu faapito ia i tatou lava, po  
o le a sili atu lava ona tatou  
lagona ai o Lona faatasi mai.

Pe ana se'i tatou mafaufau soo i le  
Atua e pei ona tatou vaaia o  
faailoga o Lana tausiga alofa ia i  
tatou, po ua tatou taofia ai pea  
lava o Ia i o tatou mafaufau, ma o  
le a tatou matuā fiafia ai e talatala  
pea ia te Ia ma vivii atu ia te Ia.

Tatou te talatala i mea faale olaga nei, auā e i ai o tatou loto i ia mea. Tatou te talatala i a tatou uo, auā tatou te alolofa i ai; ua tofusia faatasi i tatou i a tatou fiafiaga ma o tatou faanoanoaga. A e peitai e sili mamao atu lava le ala ua tatau ona tatou alolofa atu ai i le Atua, i lo le ala ua tatou alolofa atu ai i a tatou uō faalelalolagi; i le po ua le ono ea la ma tatau ona ia muamua lava o Ia i o tatou mafaufauga uma, ma ia tatou talatalaina Lona agalelei ma Lona mana?

E le'i faamaligiina mai e le Atua i o tatou luga Ana mea alofa e tele ina ia tosina uma i ai o tatou mafaufau ma o tatou loto seia oo ina ua le o toe maua ai se avanoa mo le Atua; e leai, a o mea alofa lava ia e faamanatuina mai ai pea le Atua i o tatou loto, ma fusimauina atu ai i tatou i noataga o le alofa ma le loto faafetai i lo tatou Tamā agalelei faalelagi. Ua tele ona tatou nonofo latalata i mea maulalo faalenei lalolagi. Se'i tetepa a'e ia o tatou mata i le faitotoa o loo avanoa o le malumalu faalelagi, o

loo pupula mai ai le mamalu o le Atua i fofoga o Keriso, Lē Na te mafai “ona faaola pea lava i e faalatalata atu i le Atua ona o ia.”

E tatau ona ia sili atu ona tatou viia o le Atua “ona o lona alofa, ma ona vavega na fai i le fanau a tagata.” I a tatou tapuaiga, 'aua ne'i na ona tatou ole atu mo le faamanuiaga a le Atua ma tatou malilie i le na ona talia mai o mea Na te foaiina mai. 'Aua ne'i gata ona tatou mafaufau pea i mea tatou te manana'o i ai, a e galo ia i tatou le manuia o loo tatou maua

pea. E le faapea o loo tatou faatoga atu e sili i lo le mea ua tatau, a o le mea ua matuā mautinoa lava, o lo tatou seāseā faafetai a'e. O loo tatou maua pea lava mea alofa mai le Atua, a ua itiiti lava le faafetai ua tatou faailoa i Ona luma, ua matuā faatauvaavaa lava viiga ua tatou siitia a'e ia te Ia ona o mea ua Na faia mo i tatou.

Sa faatonu atu anamua le Atua i le fanauga a Isaraelu, pe a latou potopoto faatasi e tapuai ia te Ia, e faapea, "Tou te aai ai i lea mea i

luma o Ieova lo outou Atua, tou te olioli foi i mea uma lava e faia i outou lima, o outou atoa ma o outou aiga, o mea ua faamanuia ai oe e Ieova lou Atua.” O mea uma lava e faia ina ia viia ai le Atua, ia faia ma le mata fiafia, ia faia ma pese o viiga ma le faafetai, a e 'aua ne'i faia ma le loto faanoanoa.

O lo tatou Atua, o Ia o se Tamā alofa tele ma le alofa mutimutivale. O lea, 'aua ne'i o tatou manatu ai i le auauna atu ia te Ia peiseai o se mataupu faigatā

tatou te tigāina ma faanoanoa ai.  
Ia avea o se fiafiaga le tapuai atu i  
le Atua ma le tagolima atu i Lana  
galuega. E le finagalo le Atua ina  
ia manatu Lana fanau, o Ia o se  
Matai faigatā ma le sauā; a o Ia  
foi ua Na saunia le faaolataga tele  
mo i latou. O Ia lava o la tatou Uō  
pito sili; i le pe a saunia a tatou  
tapuaiga ia te Ia, e fiafia o Ia e  
faatasi mai ma i tatou, Na te  
faamanuia mai ma  
faamafanafana mai, ma  
faatumuina o tatou loto i le fiafia  
ma le alofa. E finagalo le Atua ia  
faia tapuaiga e Lana fanau ma le

maua mai ai o le  
faamafanafanaina o o latou loto;  
ia latou faia Ana feau ma le fiafia,  
a e le o le mafatia. O i latou o ē ō  
mai e tapuai ia te Ia, ua finagalo o  
Ia ia latou toe fo'i atu a ua ia i  
latou mafaufauga tāua i Lana  
tausiga ma Lona alofa, ma ia  
faalototeteleina i latou mo le  
feagai ai ma feau ma galuega i  
aso faisoo, ma ia maua foi e i  
latou le alofa tunoa e galulue ai  
ma le faamaoni ma le faautauta  
lelei i mea uma lava.

Ia tatou potopoto atu uma i lalo ifo o le satauro. Ia avea Keriso, o Lē na faasatauroina, ma 'autū o lo tatou su'esu'e atu, ma a tatou talatalaga, ma mea e pito sili ona tatou fiafia i ai. Ia taofia i o tatou mafaufau faamanuiaga uma tatou te maua mai le Atua, i le a o tatou o mautinoaina Lona alofa tele, e tataua ona tatou loto atu loa i le tuuina atu o a tatou mea uma lava i aao na tu'ia i fao i le satauro ona o i tatou.

E mafai ona faalatalata atu le agaga i le lagi i apaau o viiga. O

pese ma viiga o loo faia i nofoaga faalugā o loo tapuai atu ai le 'au agelu i le Atua, o lea, a o faaalia lo tatou loto faafetai, o le a tatou latalata atu ai atili e tapuai faatasi ma 'au o le lagi. “O lē faia le viiga . . . o lē āva lea ia te a'u.” Ia tatou ō atu i luma o Lē na faia i tatou ma le fiafia ua i ai le āva, ma “le faafetai ma le leo o le pese.”

## Mataupu E XII—O le Mea e Faia i le Masalosalo

Etoatele i latou o e o loo  
faatuatuvaleina o latou loto i  
mafaufauga o le masalosalo i nisi  
aso, a e maise lava i latou o e o  
loo iti pea i le olaga faa-Kerisiano.  
E tele mea o loo i le Tusi Paia e le  
mafai ona latou faamatalaina,  
latou te le o malamalama foi i ai,  
ona faaogāina lea e Satani o ala  
nei e lepetia ai i lalo faavae o lo  
latou talitonu i le Tusi Paia, e  
faapea, o se faaliga lava lea mai le  
Atua. E fesili ifo i latou e  
faapenei, “Po o le a faapefea ona

ou iloa o le ala tonu? Pe afai ua moni, o le Tusi Paia o le Afioga lava lea a le Atua, po o le a faapefea ona faasa'olotoina o a'u mai nei masalosaloga ma nei manatu faaletonu?"

E le mafai ona fetalai mai o le Atua ia tatou talitonu, a e aunoa ma Lona tuuina mai foi o ni molimau ua lava e faavaeina a'i lo tatou faatuatua. O le i ai o le Atua, o Lona uiga ma Lana amio, ma le faamaoni o Lana Afioga, ua faavaeina ia mea i luga o molimau e mafai ona taliaina ma

taofia i o tatou mafaufau; i le ua  
tele foi ma fāulai ia molimau. A e  
ui lava i lea, ua le aveeseina lava  
e le Atua mai ia i tatou o ala e  
mafai ona tutupu mai ai o  
masalosaloga. O e ua fia  
masalosalo, latou te maua pea  
lava le ala o le masalosalo; a o i  
latou o e ua naunau faamaoni i lo  
latou fia iloa o le upu moni, o le a  
latou maua faamatalaga ma  
molimau e tele e mapu ai lo latou  
faatuatua.

E matuā le mafaia lava e le  
mafaufau faaletagata ona matuā

pu'eina uma amioga ma galuega  
a Lē Silisili 'Ese. E oo lava i e ua  
sili ona atamamai, ma e ua pito  
sili ona a'oa'oina, a e le matāea e o  
latou mafaufau le uiga o Lē Paia.  
E avea pea lava o Ia ma mataupu  
lilo i le mafaufau faaletagata. “O  
le su'esu'e e te maua ai ea le  
Atua? e te maua atoatoa ai ea Lē e  
ona le malosi uma lava? Ua  
maualuga i le lagi; se a se mea e  
te faia? Ua sili ona loloto i seoli;  
se a se mea e te iloa ai?”

Na ofo ai foi le aposetolo o Paulo  
ma na tusi ai, “Aue! le loloto o le

tamaoaiga o le poto atoa ma le silafaga a le Atua. E le masu'esu'eina ana faamasinoga; e le mafai foi ona iloa ona ala.” A e ui lava ina o “siosiomia o ia i ao ma le pogisa; o le amiotonu ma le faamasinoga o loo tumau ai lona nofoālii.” E lava se malamalama e mafai ona tatou maua i le uiga o Lana faiga ia i tatou, ma mafauauga o Lona finagalo paia o loo galue a'i o Ia, o le a mafai ona tatou mautinoa ai o le lē fai tuāoi o Lona alofa ma Lona alofa mutimutivale ua fusia faatasi ma Lona mana silisili. E i ai le

tapulaa o le malamalama i le uiga  
o Lona finagalo paia e mafai ona  
tatou 'ausia, i le o le tapulaa foi  
lea ua faatatau tonuina e le Atua  
ia lava mo lo tatou lelei; a o mea i  
ona talatu o loo tatou le o manino  
i ai, ia tatou faatuatua atu ai pea i  
Lona aao mana, ma Lona finagalo  
ua tumu i le alofa.

O loo i ai i le Afioga a le Atua, e  
pei foi ona i ai i le uiga o Lē ua  
pogai mai ai, nisi mea e le mafai  
lava ona manino atoatoa i le  
mafau faaletagata. O le ofi mai  
o le agasala i le lalolagi, o le liu

tino tagata o le Keriso, o le toe fuataiina o i tatou, o le toe tutū mai o e ua oti, atoa ma nisi lava mataupu e tele o loo tusia mai i le Tusi Paia, o ni mataupu lilo lava ia, e loloto na'uā, ma ua le mafai e le mafaufau faaletagata ona faamatalaina pe malamalama atoatoa i ai. A e peitai ua leai lava se ala e tatau ai ona tatou masalosalo i le Afioga a le Atua, talu ai ona ua le aafia e i tatou mataupu lilo tau Lana sauniga poto. I le lalolagi nei foi o loo siomia ai pea i tatou i mea lilo e le mafai ona tatou fuatia. E oo lava

foi i mea ola aupito ninii ma le  
faatauva'a, ua avea lava ia ma  
mataupu ua le mafaia e le vasega  
o e ua sili ona popoto ona  
faamalamalamaina mai. I soo se  
itu tatou te liliu i ai, tatou te  
feagai ai lava ma mea ofoofogia e  
le mafaamatalaina e se tagata. Po  
o se mea ea la e tatau ona faate'ia  
ai o o tatou mafaufau ina ua i ai  
foi i le itu faaleagaga ni mea lilo e  
le mafai ona tatou fuatia? E  
māfua le faigatā o nei mea ona o  
le vaivai ma le va apiapi o le  
mafaufau faaletagata. Ua lava  
molimau o i ai i totonu o le Tusi

Paia ina ia tatou matuā talitonu ai i lona māfuaaga paia, o lea ua le tatau ai ona tatou masalosalo vale i Lana Afioga ona o loo i ai nisi mataupu lilo ua le mafai ona atoatoa i ai o so tatou malamalama.

Ua molimau mai le aposetolo o Peteru, e faapea, o loo i ai i tala i Tusi Paia “nisi upu faamatalagatā, ua faauigaeseina e tagata e le'i a'oa'oina, ma ua le faatumauina . . . e oo ai lo latou lava malaia.” O afioga faamatalagatā ia o i le Tusi Paia

ua uuna'ina faamalosi e nisi tagata loto masalosalo, ma ua latou faavaeina a'i ni finauga e faasaga i le Afioga a le Atua; a e peitai ua sesē tele ai i latou, auā ua le avea nei afioga lilo ma ala e ta'usesēina ai le Tusi Paia, a ua avea o se molimau malosi e faamaonia atili ai lona māfuaaga faale Atua. Pe ana fai o faamatalaga uma tau le uiga o le Atua o i ai i le Tusi Paia, ua na o ni faamatalaga lava ua mafai ona tatou malamalama gofie i ai; ma pe ana fai foi ua mafai ona manino atoatoa i le mafaufau o le

tagata le silisili 'ese o le Atua ma Lona mamalu, semanū lava a tatou le maua i le Tusi Paia faailoga e lē mafaafitia o lona māfuaaga paia. O le maualuga ma le mamalu, o le loloto ma le lilo o mataupu o lo ua faaalia mai i le Tusi Paia, ua tatau ona faatupuina ai o lo tatou matuā talitonu atoatoa, o le Afioga moni lava lea a le Atua.

O loo fofolaina mai i le Tusi Paia le upu moni i lona faigofie, ma ua matuā faatatauina lelei lava i mea o loo mana'omia ma faanaunau

atu i ai loto o le fanau a tagata. O le tasi lenei uiga o le Afioga a le Atua ina ua ofo ai ma faafiafiaina ai mafaufau o e ua a'oa'oina i le poto uiga eseese, a ua mafai ai foi ona malamalama lelei ai o le ala o le faaolataga i tagata faatauva ma le le'i a'oa'oina. A e ui lava i le faigofie ma le malamalama gofie o upu moni e pei ona faaalia mai i le Tusi Paia, a e tau tonu atu lava i mataupu ua faapea lo latou maualuga, ma lo latou lautele, ma lo latou silisili 'ese, ua le mafai ai ona taofia i le mafaufau vaivai o le tagata; o lea, ua na o le tasi ai o

le ala e mafai ona tatou taliaina ai, o lo tatou talitonu lea i ai, auā o mea ua ta'utinoina mai e le Atua. Ua faapea lava ona fofolaina mai i o tatou luma matematega o le ola, ina ia iloa ai e agaga taitoatasi uma laasaga o le salamō e savali atu ai i le Atua, i le ma le faatuatua i lo tatou Alii o Iesu Keriso, ina ia tatou maua ai le ola i le ala ua atofaina e le Atua. A e peitai, i lalo ifo o nei upu moni ua faapea ona tatou malamalama gofie i ai, o loo taatitia mai ai mataupu lilo, o le ufiufi lava lea o Lona mana ma

Lona mamalu. O mataupu lilo ia e matuā faatoilaloina ai le mafaufau faaletagata i lona fia malamalama i ai, a e faaosofiaina ai i le āva ma le faatuatua lē o loo saili ma le loto faamaoni ia na iloa le upu moni. A o saga su'esu'e atu pea o ia i le Tusi Paia, o le a saga faaopoopoina mai ai foi lona talitonu, o le Afioga lava lea a le Atua soifua, ona gaua'i atu ai lea o le mafaufau faaletagata i le mamalu o faaaliga mai le lagi.

O lo tatou ioe atu e faapea, ua  
tatou le mafaia ona pu'eina uma  
le uiga o le loloto o upu moni o  
loo i le Tusi Paia, o lo tatou faapea  
ane foi lea, e le mafaia e le  
mafau Fau faatauva'a o le tagata  
ona aafia le uiga o Lē e leai sona  
gataaga. I le ma lenei, o le  
malamalama ua i le tagata, ma le  
tuāoi ua vaseina mo lona  
mafau Fau, na te le mafai ai ona  
matāea o mea lilo uma o loo i le  
finagalo o Lē Silisili 'Ese.

O lona le mafaia ona fuatia o le  
loloto o mataupu faale Atua, ua

teena ai e lē ua masalosalo ma lē  
ua le talitonu le Afioga a le Atua;  
i le o i latou foi o e ua faapea mai,  
o loo latou talitonu i le Tusi Paia,  
e le sao uma i latou ai lenei  
faigatā. Fai mai le aposetolo, “Le  
'au uso e, ia outou, ne'i i ai i so  
outou le loto leaga ma le lē  
talitonu, tou te o'ese ai i le Atua  
soifua.” O le mea tonu lava lea,  
pe a tatou su'esu'e ma le faaeteete  
i a'oa'oga ua i le Tusi Paia, ma  
tatou saili atu i “mea loloto a le  
Atua,” e pei lava ona faaalia mai i  
le Tusi Paia. E ui ina “o ia Ieova lo  
tatou Atua mea lilo,” a e peitai

“mea ua faailoa mai o ia te i tatou ia.” A o le galuega lava lea a Satani, o le faaliliu 'eseina o le malosi o loo i le mafaufau e su'esu'e atu ai. E taumafai le fili ina ia faafefiloiiina le agaga o le faafiapoto ma le iloiloga o upu moni o i le Tusi Paia, ona tauau ai lea ina uma le onosai o tagata, ma ua latou manatu ifo ai ua faia'ina i latou pe afai ua le mafai ona latou faamatalaina o soo se vaega o le Tusi Paia ina ia latou malilie ai. E le mafai foi i lo latou loto faamaualuga ona latou ioe mai e faapea, ua latou le o malamalama

i afioga loloto a le Atua. E  
mumusu i latou i faatali ma le  
onosai, seia oo ina faaalia mai e le  
Atua le uiga o Lana upu moni ia i  
latou i se aso ua Ia finagalo ai. O  
lo latou manatu, ua lava le poto  
faaletagata o le a mafai ai ona  
latou malamalama i afioga a le  
Atua e aunoa ma se isi  
fesoasoani; i le talu ai ona ua  
iuvale lo latou taumafai, ona  
latou faafiti ai lea i le māfuaaga  
faale Atua o le Tusi Paia. E moni  
lava, o loo i ai faamatalaga ma  
a'oa'oga e tele ua taliaina ma  
faaaogāina e le toatele ma lo latou

manatu e pogai mai le Tusi Paia;  
a e peitai ua le faavaeina lava i le  
a'oa'oga moni faale Afioga a le  
Atua, e le gata i lea, a ua matuā  
iloga foi ona feteenai ma upu ua  
a'oa'oina mai e le Agaga Paia. O  
nei mea ua faapogai ai lava le  
masalosalo ma le fetōa'i i manatu  
o le toatele. A e peitai ua le māfua  
ia a'oa'oga ma taofi sesē ona ua le  
sa'o le Afioga a le Atua, a e ona  
ua faauigaeseina e tagata.

Pe ana mafaia e tagata, o e na faia  
e le Atua, ona latou 'ausia o le  
tapulaa o le matuā malamalama

atoatoa i le uiga o Lē Silisili 'Ese  
ma Ana galuega, po ua leai se tasi  
upu moni o totoe latou te toe  
sailiili i ai, leai se tuputupu pea o  
le atamai, leai se faatamaoaigaina  
atili o le mafaufau ma le loto; auā  
ua oo nei i latou i le tuluiga o  
afioga lilo a le Atua. Semanū a le  
toe silisili le Atua; semanū foi a le  
toe aga'i i luma le tagata ina ua ia  
maua atu le tulaga e pau mai ai le  
poto. O lea ia tatou faafetai atu ai  
i le Atua ona ua le faapea ona Ia  
tuuina mai ia i tatou. E silisili 'ese  
lava le Atua, e pei ona tusia, “Ua  
ia te ia le oloa uma o le poto atoa

ma le malamalama.” I le e oo lava i le faavavau, o le a su'esu'e pea lava le 'au paia a le Atua, ma latou a'oa'o pea, a e o le a le uma ai lava ona latou iloaina o le silisili 'ese o Lona poto, ma Lona agalelei, ma Lona mana.

E oo lava i lo tatou olaga faa-lalo-nei, ua finagalo le Atua ina ia tatou saga maua pea ni faaaliga fou o upu moni o loo i ai i Lana Afioga. I le e tasi pē le ala e maua ai lenei atamai. Tatou te maua le malamalama i le Afioga a le Atua i lenei ala e tasi, o le

faapupulaga lea a le Agaga, o Lē na ala mai ai lea Afioga. E “le iloa e se tasi mea a le Atua, ua na o le Agaga o le Atua” “Auā e su'esu'e ifo le Agaga i mea uma, o mea loloto foi a le Atua.” A o le folafolaga foi a le Faaola i Ona soo e faapenei, “A e a maliu mai o ia, o le agaga lea e tupu mai ai le upu moni, e ta'ita'i e ia ia te outou i upu moni uma . . . auā e maua e ia mai ia te a'u, ma faailoa atu ai ia te outou.”

O le finagalo lenei o le Atua, ia faaaogāina e le tagata lona

mafau Fau; i le o le su'esu'e atu i le  
Tusi Paia o le a faamalosiina ma  
faamalamalamaina ai le mafau Fau  
e sili atu i lo se tasi su'esu'ega. A e  
ia manatua foi, ma ia tatou matuā  
faaeteete i ai, ina ia 'aua ne'i avea  
o tatou faigā manatu ma mea  
tatou te faatuatua tasi lava i ai;  
auā o o tatou faigā manatu foi e  
maua ia i le vaivai ma le uiga  
fetōa'i o le fanau a tagata. Pe afai  
ua tatou le manana'o ina ia  
faanenefuina afioga a le Atua i o  
tatou mafau Fau, seia oo lava ina o  
le a le pupula ai ia te i tatou se  
tasi o upu moni aupito faigofie

ma le mautinoa lelei, e tatau lava  
ona ia tatou maua le loto o le  
tamaitiiti ma le faatuatua o le  
tamaitiiti, i lo tatou fiafia ina ia  
a'oa'oina i tatou, ma lo tatou saili  
atu mo le fesoasoani o le Agaga  
Paia. Pe a lagona i o tatou loto le  
mana ma le poto o le Atua, ma lo  
tatou le mafai ona malamalama i  
Lona silisili 'ese, e tatau lava ona  
maua ai i tatou i le loto  
faamaulalo, ma ua tatau foi ona  
tatou tatalaina Lana Afioga ma le  
āva tele faapei ua tatou oo atu  
lava i Ona luma. Pe a tatou tago  
atu i le Tusi Paia, ia ioe o tatou

mafau, o loo i ai le pule ma le  
poto e sili atu i lo tatou, ma ia ifo  
atu o tatou loto ma lo tatou poto  
ia te IA LENA.

E tele mea e peiseai e faigatā ma  
nenefu i la tatou vaai, a e peitai o  
le a faamalamalamaina ma  
faafaigofieina e le Atua ia i latou  
o e ua matuā saili atu ina ia latou  
malamalama i ai. A e pe afai o le  
a le maua pea e i tatou le ta'ita'iga  
a le Agaga Paia, o le a le aunoa  
lava ona maua gofie o i tatou i  
lenei sesē, o le faauigaeseina lea o  
afioga a le Atua. E toatele o loo

latou faitauina le Tusi Paia ma le  
leai o se fua latou te maua mai ai,  
ma o nisi foi e toatele ua na ona  
latou leaga ai. Pe afai e tatalaina  
le Afioga a le Atua e aunoa ma le  
āva, e aunoa foi ma le muai  
tatalo; ma ua le taulai atu i le  
Atua o tatou mafauauga ma  
faanaunauga o o tatou loto, ua le  
ō gatasi foi ma Lona finagalo, o le  
a faanenefuina ai le mafaufau i le  
masalosalo; ona avea ai lea o le  
su'esu'e faapena i le Tusi Paia ma  
ala e famalosiina ai le agaga o le  
lē talitonu. E pulea e le fili  
mafauauga o tagata faapena, ma

na ta'ita'iina o latou manatu i ni faamatalaga e le sa'o. Pe afai ua le o saili tagata ina ia o gatasi ma le Atua a latou upu ma a latou mea e fai, e ui lava i so latou poto, a o le a sesē gofie i latou i lo latou faatatauina o le Tusi Paia, ma ua le tatau ai foi ona soona faaaogāina pe talitonu se tasi i a latou faamatalaga. O i latou o e ua gata ona su'esu'e i le Tusi Paia ona o lo latou fia maua ai o ni feteenaiga, ua le o ia i latou le loto ma le vaai faaleagaga. Ona ua le sa'o lelei ma manino la latou vaai, o le a latou mātauina ai ni ala e

tele o le masalosalo ma le lē  
talitonu i mea malamalama lava  
ma le faigofie.

E ui lava ina o loo latou tau ufiufi  
i ai, a e o le pogai tonu ua tupu  
mai ai le masalosalo ma le lē  
talitonu— o le fiafia lea i le  
agasala. O a'oa'oga ma mea  
faasaina o i le Afioga a le Atua, e  
le fiafia i ai ē faamaualuluga ma ē  
ua loto e fai le agasala; i le o i  
latou ia o e ua mumusu i usitai i  
faatonuga ua faaalia mai i le Tusi  
Paia, o i latou foi ia e sili ona  
latou vave aapa atu i le

masalosalo ma le lē talitonu i le pule o loo fetalai mai ai. Pe afai ua tatou fia maua le upu moni, ua tatau foi ona tatou naunau faamaoni ina ia tatou iloa le upu moni, ma ia matuā loto malilie e usiusitai i ai. I le o i latou uma o e latou te su'esu'e i le Tusi Paia ma lenei agaga, o le a latou maua molimau e tele e faamaonia a'i, o le Afioga lava lenei a le Atua, ma o le a latou maua ai foi le malamalama i ana a'oa'oga o le a faapotoina ai i latou e i'u ai i le ola.

Ua fetalai mai Iesu, “Ai se tasi e fia fai lona finagalo, e iloa e ia le mataupu, pe mai le Atua.” 'Aua ne'i o tatou soona sailiili vale ma finau vale i mea e le o pupula ia i tatou, a e ia tatou savavali tonu pea i le malamalama ua uma ona faasusuluina mai e le Atua ia te i tatou, ona faaopoopoina mai ai lea ia te i tatou o le malamalama e sili atu ona tele. O le alofa tunoa o Keriso ia tatou faataunuuina ai o mea tonu uma lava ua uma ona faamalamalamaina mai i o tatou mafaufau, ona i'u ai lea ina o le a tatou malamalama, ma o le a

mafai ona tatou faia ma le vaega  
o loo faanenefu nei ia te i tatou.

O loo i ai le tasi molimau o loo  
avanoa mo tagata uma —i e ua  
aupito sili ona a'oa'oina, faapea  
foi ma i latou o ē e le'i  
a'oa'oina—o le molimau lea e  
maua mai i mea ua ootia ai le loto  
o le tagata, ma ua matuā, lagona  
lava e ia i lona lava va feagai ma  
le Atua. Ua valaau mai le Atua ia  
i tatou, ina ia tatou tofotofo atu  
lava ina seia tatou mautinoaina e  
i tatou lava le matuā faamaoni o  
Lana Afioga ma Ana folafolaga.

Ua faapea ona Ia fetalai mai, “Inā tofotofo ia outou, ma ia outou iloa, e lelei Ieova.” 'Aua ne'i o tatou faalagolago i le molimau a se tasi, a ia tofotofoina e i tatou lava le agalelei ma le faamaoni o le Atua. Ua ta'utino mai foi e Ia, “Inā ole atu ia, ona outou maua ai lea.” O le a faataunuuina lava Ana folafolaga. E le'i faaletaunuuina lava folafolaga a le Atua; e le mafai lava ona le taunuu. I le, a o tatou o faalatalata atu ia Iesu, ma o loo faafiafiaina i tatou i Lona alofa tele, o le a tafia 'eseina ai lo tatou masalosalo ma

lo tatou pouliuli i le malamalama  
o Lona faatasi mai.

Ua molimau mai le aposetolo o  
Paulo e faapea, o le Atua “ua na  
laveai mai ia te i tatou nai le pule  
a le pouliuli, a ua na aumaia i  
tatou i le malo o lona lava Alo  
pele.” O i latou uma o e ua oo i le  
ola, a e sa i le oti, ua latou faailoa  
lo latou taofi, “e faamaoni lava le  
Atua.” Ua mafai e i latou uma  
taitoatasi ona molimau mai e  
faapea, “Sa ou fia maua le  
fesoasoani, i le ua ou maua lava  
ia Iesu. Ua Ia foaiina mai mea

uma e tusa ma lo'u mativa; ua malie lo'u agaga sa fia 'ai ma inu; i le ua avea nei foi le Tusi Paia ma faaaliga o Iesu Keriso ia te a'u. Pe e te fesili mai ea, po ua māfua i se ā ona ou talitonu ia Iesu?—Auā ua avea o Ia ia te a'u o lo'u lava Faaola faalelagi. A e po o le a foi le mea ua ou talitonu ai i le Tusi Paia?—Auā ua ou maua nei, o le siufofoga lava lea o le Atua i lo'u agaga." E mafai lava ona i ai i totonu ia te i tatou lenei molimau, o Keriso o Ia lava o le Alo o le Atua. Ua tatou mautinoa lava,

tatou te le o mulimuli i ni tala ua fatua ma le poto e faasesē ai.

Ua apoapoaiina i tatou e Peteru e faapenei, “A ia tutupu outou i le alofa tunoa ma le poto i a lo tatou Alii o lo tatou Faaola lea o Iesu Keriso.” Pe afai o loo tutupu a'e pea le fanau a le Atua i le alofa tunoa, o le a saga maua pea lava e i latou le faalauteleina o le malamalama i Lana Afioga. O le a latou mātauina ma vaaia pea le malamalama fou ma le matagofie fou i ana a'oa'oga paia. Ua faamaonia lava lenei mea i le tala

tuu faasolo i le ekalesia i tausaga  
uma lava, i le o le a faapea lava  
ona faia e oo atu lava i le gataaga  
o le lalolagi. “A o le ala o e  
amiotonu, e tusa ia ma le  
malamalama o le ao, o loo tupu  
pea lona malamalama e oo i le  
tutonu o le la.”

O le faatuatua ia tatou vaavaai  
atu ai i luma i ona po o la tatou  
faatasiga ma Iesu i le lalolagi fou,  
ma ia tatou taofi mau ai i le  
folafolaga a le Atua e uiga i le  
faalauteleina o lo tatou poto; auā  
o le a faasosoina atu ai lo tatou

uiga faaletagata i le uiga faale  
Atua, ma o le a matuā iloga ai foi  
ona faafesootaiina ai o i tatou ma  
le Pogai o le malamalama. Ona  
tatou olioli ai lea ina o le a  
faamanoina mea uma lava sa  
maua ai lo tatou loto fetōa'i ona o  
le uiga o le ta'ita'iga poto a le  
Atua tatou te le'i mātauina ma  
malamalama i ai; o mea sa faigatā  
ona ofi i o tatou loto ma o tatou  
mafau, o le a faamatalaina mai  
ma faamalamalamaina; i le o le  
mea sa aliali mai ai na o le  
fenumiaiga ma le lē faataunuuina  
o o tatou faamoemoe i lo tatou

manatu faaletagata, o le a tatou  
vaaia ai lona atoatoa ma lona  
matagofie o le galulue faatasi o  
mea uma lava e tusa ma Lana  
sauniga poto. “Auā o ona po nei  
tatou te vaavaai ai faanenefu i le  
faata, a o ia ona po tatou te  
fesagai ai; o nei ona po ou te iloa  
ai faaleatoa, a o ia ona po ou te  
iloa tino ai, pei ona iloatinoina o  
a'u.”

## Mataupu E XIII—Ia Olioli i le Alii

Ua valaauina le fanau a le Atua ina ia avea i latou ma sui o Keriso, latou te faailoa atu le agalelei ma le alofa o le Atua. E pei ona faaalia mai e Iesu le uiga moni o le Tamā ia i tatou, ia faapea foi ona tatou faaalia Keriso i tagata o lenei lalolagi o e latou te le o iloaina Lona alofa naunau ma Lona alofa mutimutivale. “Faapei ona e auina mai a'u i le lalolagi”—o le fetalaiga lea a Iesu—“ua faapea foi a'u ona auina atu o i latou i le lalolagi.”

“O a'u o i totonu ia te i latou, o oe foi o i totonu ia te a'u . . . ina ia iloa ai foi e le lalolagi, na e auina mai a'u.” A e faapenei ona tautala atu o le aposetolo o Paulo i soo o Iesu, “O loo faaalia outou, o outou o le tusi a Keriso,” “ua iloa ma faitaulia e tagata uma. Ua ave”a le fanau uma taitoatasi a Iesu ma Ana tusi ua Ia auina atu i le lalolagi. Pe afai o loo e mulimuli atu ia Keriso, ua avea lava oe ma Ana tusi ua Ia auina atu i le aiga, ma le nuu o loo e mau ai.

O Iesu, o Lē o loo afio i totonu ia te oe, o loo naunau o Ia Na te fia fetalai atu i loto o i latou o e latou te le o masani ma Ia. Atonu latou te le o faitauina le Tusi Paia, ma o loo latou le o faalogoina le siufofoga o loo fetalai mai ia te i latou mai ona itulau; latou te le o vaaia foi le alofa o le Atua i Ana galuega. A e pe afai o oe o se sui moni o Keriso, atonu lava o le a avea oe ma ala e ta'ita'iina mai ai i latou ina ia tau pupula ai ia te i latou Lona agalelei, ma tosina mai ai i latou ia alolofa ma auauna atu ia te Ia.

Ua tofia tagata Kerisiano e fai ma sulu malamalama i le ala e aga'i a'e i le lagi. Ia latou toe faasusuluina atu i le lalolagi le malamalama mai ia Keriso ua i ai i o latou luga. Ia avea o latou olaga ma la latou amio ma ala o le a mafai ai ona maua e nisi o le malamalama tonu ia Keriso ma le uiga o le auauna atu ia te Ia.

Pe afai o ni sui faamaoni i tatou o Keriso, o le a mana'omia ma matagofie i le vaaiga a isi le uiga o lo tatou auauna atu ia te Ia. O

Kerisiano o e ua latou faaputu  
ane le faavauvau ma le faanoanoa  
i o latou agaga, ma ua latou  
muimui ma faamemeo, ua latou  
le o faaali atu i luma o tagata le  
uiga moni o le Atua ma le olaga  
faa-Kerisiano. Ua aliali mai i lo  
latou uiga ma la latou amio e  
peiseai e le fiafia le Atua ina ia  
maua le olioli e Lana fanau, i le  
ua faapea ona avea o i latou ma e  
ua molimau pepelo i lo tatou  
Tamā faalelagi.

E matuā fiafia lava Satani pe a  
mafai ona ia ta'ita'iina atu le

fanau a le Atua i le lē talitonu ma le faalotovaivai. E fiafia tele o ia pe a vaai mai, ua tatou le o talitonu i le Atua, ma ua tatou masalomia Lona finagalo naunau ma Lona mana e laveaiina ai i tatou. E fiafia Satani pe a ia i tatou lenei manatu, o le a avea le ta'ita'iga a le Atua ma ala e tupu mai ai so tatou leaga. O lana lava lea galuega, na te fia faailoa ni foliga sesē o le Alii e peiseai e le tigā alofa o Ia faatasi ma i tatou, e le o ia te Ia foi le alofa mutimutivale. Na te faauigaeseina le a'oa'oga moni

faale Tusi Paia e uiga i le Atua.  
Na te faatumuina le mafaufau o  
le tagata i manatu lē tonu e uiga i  
le Atua; ona le faasaga tonu ai lea  
o o tatou mafauauga i le a'oa'oga  
moni e uiga i lo tatou Tamā  
faalelagi, a e taulai atu soo i  
faaaliga sesē a Satani, ma o le a  
avea ai lo tatou le talitonu ma lo  
tatou muimui ma ala o le a tatou  
le āva atu ai i le Atua. E saili pea  
lava e Satani ina ia avea le olaga  
faa-Kerisiano o se olaga mafatia e  
aunoa ma se fiafia e maua ai. O  
lona mana'o lenei, ia foliga mai o  
se mea fitā le auauna atu ia

Keriso, ma o se mea foi e matuā  
faapuapuagatia ai tatou, i le pe a  
aliali mai ni uiga faapea i le olaga  
o le tagata Kerisiano, ua ia  
fesoasoani atu ai i le pepelo a  
Satani talu ai lona le talitonu.

E toatele i latou o e o loo savavali  
atu i le ala faale olaga nei, ua  
latou mafaufau tele i o latou sesē,  
ma mea ua faavaatu'ia ai lo latou  
taumafai, po o o latou  
faamoemoega foi ua le taunuu,  
ona faatutumuina ai lea o o latou  
loto i le faanoanoa ma le  
faalotovaivai. A o o'u I ai i

Europa, sa i ai le tasi uso tamaitai  
o lē sa faapea ona ia faia, ma sa  
matuā faaatuatuvaleina ai lona  
loto, ona ia tusi mai ai lea ia te a'u  
ina ia ou faaooina atu sina upu  
faamafanafana ia te ia. O le po na  
tuāoi ma lo'u faitauina o lana tusi,  
na fai ai la'u miti, ua ou i totonu o  
se togā laau, i le o le tasi sa foliga  
mai o ia e pule i le togā laau, na ia  
faamaimoaina a'u i ona ala. Sa ou  
tufi fualaau ma ou fiafia lava i lo  
latou manogi, a e te'i ua  
faasinoina mai e lenei uso  
tamaitai, o lē sa savalivali ane i  
o'u tafatafa, ni laau tuitui laleaga

ua punitia ai lona ala. I le ua tu ai lava o ia ma tagi ma loto faanoanoa ai. Ua le ui ane o ia i le ala ma mulimuli i le ta'ita'i ala, a ua ui atu lava o ia i le mea o i ai laau tuitui ma laau talatala. Ona tagi auē ai lea o ia ma faapea ane, “Oi, maumau lenei togā laau matagofie ona faaleagaina e laau talatala!” Ona tali mai ai lea o le ta'ita'i ala, “Inā tuu pea ia o laau talatala, auā o le a na ona aveva ma mea e te manu'anu'a ai. Inā faasaga atu ia oe e tufi a'e fualaaui lanu eseese ma le matagofie.”

E leai ea ni aso fiafia ua e maua i  
lou olaga? E te le o manatua ea  
nisi aso ua tāua ia te oe talu ai  
ona sa osooso fiafia ai lou loto ina  
ua e gaua'i atu i le musumusuga  
a le Agaga o le Atua? Ina o e  
su'esu'e aga'i i tua i le tusi lou ola,  
e te le o maua ai ea nisi itulau ua  
faafiafiaina ai lou agaga ina ua e  
toe faitau i ai? Po ua le avea ea  
folafolaga a le Atua faapei o  
fugālaau manogi o loo tutupu  
solo a'e i tafatafa ane o lou ala i  
lea itu ma lea itu? Po o le a e le  
tuuina atu ea ina seia faatumuina

lou loto i le fiafia talu ai lo latou manogi ma lo latou matagofie?

O laau tuitui ma laau talatala o le a na ona e manu'a ai, ma faatupuina ai le loto faanoanoa ia te oe; i le pe afai o le a gata i ia laau leaga ona e tufiina, ma avatu i nisi, po o le a e le faaleaogāina ai ea e oe lava le agalelei o le Atua, a e le gata foi i lea, a o le a ē taofia ai foi ma nisi o e o tuāoi ma oe mai lo latou savavali atu i le ala o le ola.

O se mea valea lea mea, o le tau  
aoao mai o manatunatuga uma i  
mea faaleolea na tutupu i aso ua  
mavae o le olaga—i ana agasala  
ma ona faamoemoega lē  
faataunuuina—ma tatou toe  
talatala i ai ma faavauvau ai, seia  
oo ina ua matuā iloga ona  
manumalo mai ia te i tatou o le  
faalotovaivai. O le agaga ua  
faalotovaivai, ua tumu lava i le  
pogisa, ua punitia le malamalama  
o le Atua mai ia te ia, ma o le a na  
faaooina atu foi lea pouliuli e  
faapogisaina ai le auala mo nisi.

Ia tatou faafetai atu i le Atua ona o le pupula matagofie ua Ia faaalia mai ia te i tatou. Se'i o tatou aofa'i ane faatasi faaaliga ma folafolaga tāua o Lona alofa, ina ia tatou matamata pea i ai i aso uma. O le tuua e le Alo o le Atua o le nofoālii o Lona Tamā, ma Lona faaofuina o Lona itu Atua i le tino faaletagata, ina ia mafai ona Ia toe laveaiina mai ai o tagata mai le pule a Satani; o Lona manumalo mo i tatou, ua faaavanoaina ai le lagi mo tagata, ma faaalia mai ai i mata o le faatuatua le paia ma le pupula o

le mea o loo afio ai Lē Silisili 'Ese;  
o le toe faatuina a'e o le fanau a  
tagata ua pau'ū mai le lua o le  
malaia na lafoina i ai e le agasala,  
ma toe faafesootai atu i le Atua  
Silisili 'Ese; o le faaofuina o i  
tatou i le amiotonu a Keriso ma  
faaeaina ia nonofo faatasi ma Ia i  
Lona nofoālii, ona ua tatou  
faatuatua i lo tatou Faaola ma ua  
tatou onosai i le tofotofoina o i  
tatou e le Atua—o ata tāua lava ia  
ua finagalo i ai le Atua ina ia  
tatou matamata pea i ai.

Pe afai ua tatou le talitonu i le alofa o le Atua, ma ua tatou masalosalo i le faamaoni o Ana folafolaga, o lo tatou le āva lea ia te Ia, ma ua tatou faatigā ai i Lona Agaga Paia. Pe mata ea o le ā le manatu o se tinā pe ana faailoa atu pea e lana fanau lo latou le mālilie ia te ia, peiseai lava ua le o lelei lona loto ia i latou, a e meāmanū foi o le mea e tasi o loo taumafai i ai o ia i lona olaga, o le galueaiina lea o lo latou manuia, o le puipuiina o lo latou saogalemū, ma le saunia o mea e maua ai lo latou filemu? Pe mata

ea o le a faapefea pe ana fai latou te masalomia lona alofa? Semanū lava e matuā momomo ai le loto o le tinā i lea mea. Pe mata o le a se manatu o soo se matua, pe ana faapea ona faia e sana fanau? A e po o le a la se silasila mai a lo tatou Tamā o i le lagi pe a tatou le talitonu i Lona alofa, o le alofa lava lea na māfua ai ona Ia tuuina mai o Lona Alo pele e toatasi ina ia maua ai e i tatou le ola? O loo faapea ona tusi mai o le aposetolo, “O ia lava sa na le faasaoina lona lava Alo, a ua tuuina mai o ia e sui a'i i tatou

uma lava, e le foai fua mai ea e ia ia te i tatou mea uma lava faatasi ma ia i se a?" A e peitai, e toatele o loo latou faapea ane —pe afai ua le o ni a latou upu, a o a latou amio ua latou faapea ane ai—"E le o a'u e faasino i ai lenei fetalaiga a le Alii. Atonu e alofa o Ia i nisi, a ua Ia le alofa mai ia te a'u."

O nei mea uma o loo faaleagaina ai lou lava agaga; auā o upu masalosalo uma e te tautala atu ai, o lou valaauina lava lea o faaosoosoga a Satani; o le a

faamalosiiina ai foi i totonu ia te  
oe le agaga o masalosaloga, ma o  
le a i'u ina tete'a 'ese atu ai mai ia  
te oe ma le faanoanoa o agelu o e  
sa fia auauna atu ma fesoasoani  
atu ia te oe. Pe a faosoosoina oe  
e Satani, 'aua lava ne'i e  
mānavaina atu sina upu e tasi o le  
masalosaloga po o le pouliuli. Pe  
afai ua tonu ia te oe o le a e  
tatalaina atu le faitotoa o lou loto  
i ana musumusuga, o le a  
faatumuina ai lava lou loto i le  
masalosaloga ma fesili fouvale. Pe  
afai o le a e talatalaina atu mea ua  
e lagona i lou loto, o

masalosaloga uma e te faaalia, e le gata ina o le a toe galue lo latou leaga i totonu ia te oe lava, a o le a avea foi ma fatu leaga o le a fua mai i olaga o nisi, ma atonu o le a e le toe mafaia lava ona tineia o le leaga ua māfua mai i au upu.

Atonu po o le a mafai e oe ona e toe sola 'ese mai le faaosoosoga ma le mailei a Satani sa feagai ma oe i lea vā-i-taimi; a e peitai nisi o e ua gaua'i ona o upu na e tautala ai, atonu o le a le mafaia e i latou ona toe sosola 'ese mai lena lē talitonu na e lūlūina. Faauta i lona tāua tele o lo tatou tautala

pea i na o upu e faatupuina ai le  
malosi ma le ola faaleagaga!

O loo faalogologo mai le 'au  
agelu ina ia latou iloa pe se ā se  
molimau o loo e faia i luma o le  
lalolagi e uiga i lou Matai  
faalelagi. Ia e fiafia e talatala atu  
le lelei o Lē o loo soifua pea e  
fautua mo oe i luma o le Tamā. Pe  
afai e te tago atu i le lima o se uō,  
ia i ai i ou laugutu ma lou loto le  
viiga o le Atua, o le a tosina atu ai  
ona mafaufauga ia Iesu.

E tofua lava ma tofotofoga,  
ma faanoanoaga e faigatā ona  
tauaveina, ma faaosoosoga e tetee  
gatā. 'Aua ne'i e talatalaina atu ou  
puapuagā i ou uso a tagata, o e o  
loo vaivai e pei lava o oe, a e ia e  
tuuina atu mea lava i le  
Atua i le tatalo. Ia tonu i lou loto,  
o le a e le tautala atu lava i se upu  
masalosalo, po o se upu foi e  
faalotovaivaiina ai se tasi. E tele  
le galuega e te mafaia mo le  
faafiafiaina o le olaga o nisi, ma le  
faamalosiiina o lo latou taumafai i  
au upu faaloto tele, ma au upu  
faamafanafana.

O loo i ai nisi e toatele o e o loo  
taupati atu pea i luma, a e o loo  
fetina'ina tele i faaosoosoga, ua  
toetoe lava ina a fāi ifo ai lo latou  
malosi i le tauiviga ma lo latou  
lava uiga agasala, atoa ma le  
malosi o lē o loo leaga. 'Aua lava  
ne'i avea oe ma ala e faatupuina  
ai le loto vaivai i se tasi ua  
faapena ona mafatia; a e ia e  
faafiafia atu ia te ia i ni au upu  
faamalosi ma le faamafanafana e  
uuna'i atu ai o ia i lona ala. O le a  
faapea ona susulu atu o le  
malamalama o Keriso mai ia te

oe. “Auā e leai so tatou e ola mo ia lava.” O o tatou uiga ma amio tatou te le o mafaufauina, e faamalosina ai pe faavaivaiina ai nisi, ma tosina 'ese mai ai ia Keriso ma le upu moni.

E toatele i latou o e ua i ai le taofi sesē i le soifuaga ma le uiga o Keriso. O lo latou manatu, sa 'asa o Ia ma le finagalo alofa ma le uiga fiafia i tagata, ma o Ia foi o se Alii sauā, Na te le'i iloa se fiafia. O nisi e toatele ua matuā iloga ona faaliliueseina ai o latou

olaga uma faaleagaga talu ai nei  
taofi sesē.

E masani nisi ona latou fai mai,  
Sa tutulu Iesu, a e le'i iloaina lava  
o Ia e se tasi o soiso'i. E moni, sa  
avea lo tatou Faaola "o le tagata  
faanoanoa, ua masani foi ma le  
tigā," auā na faaavanoaina pea  
Lona finagalo mo puapuagā uma  
o tagata. A e ui lava ina sa avea  
Lona soifuaga ma soifuaga o le  
faafiti ia te Ia lava, ma sa le aunoa  
ona feagai o Ia ma tigā ma le  
mafatia i avega, a e le'i vaivai ai  
Lona finagalo. E le'i faaalia i Ona

fofoga se uiga faavauvau ma le mafatia, a e sa faaalia mai ai pea lava na o le uiga filemu ma le to'afimālie lava. O le puna o le ola lava Lona finagalo; i le soo se mea sa Ia afio atu i ai, na Ia momoli atu i ai le malologa ma le filemu, le olioli ma le fiafia.

Sa i lo tatou Faaola le matuā naunautai ma le faamaoni, a e sa leai lava ma Sona uiga paū po o le soona faavauvau vale. O i latou o e ua faata'ita'i ia te Ia, o le a uuna'ina i latou i le naunauta'i faamaoni; latou te matuā lagona

foi lona tāua o le tiute o loo feagai  
ma i latou. E le maua ia i latou se  
amio tātō vale; latou te le soona  
fiafia vale ma le pisapisaō; latou  
te le faaulaula i upu māsoā; a e  
peitai o le faatuatua ia Iesu ma le  
auauna atu ia te Ia e faafilemuina  
ai le loto e pei o se vaitafe. E le  
tineia ai le malamalama o le  
olioli; e le vaosia ai le loto fiafia; e  
le avea o se ao e ufitia ai le uiga  
mata fiafia ma le 'ata'ata. E le'i  
afio mai Keriso ina ia auauna mai  
tagata ia te ia, a ia auauna atu Ia; i  
le pe afai ua pulea atoatoa o tatou  
loto e Lona alofa, o le a tatou

mulimuli atu lava i Lana  
faaa'oa'oga.

Pe afai o le a laualuga pea i o  
tatou loto le manatua o uiga le  
alofa ma amio le tonu a nisi, o le a  
le mafai ai lava ona tatou alolofa  
atu i ai e pei ona alofa mai Keriso  
ia i tatou; a e pe afai o le a taulai  
atu pea o tatou mafaufauga i le  
alofa ofoofogia o Keriso ma Lona  
alofa mutimutivale ia i tatou, o le  
a maua ai foi e i tatou o lea lava  
agaga e tasi i lo tatou feagai ai ma  
nisi. E ui lava i ni pona ma ni  
uiga faaleolea e tau ane i ai la

tatou vaai, a e tatau lava ona  
tatou alolofa atu ma faaaloalo atu  
o le tasi i le tasi. Ia saga  
faatupuina pea ia i tatou le loto  
faamaulalo ma le lē gaua'i vale i o  
tatou lava manatu, ma ia tatou  
maua atili pea le onosai ma le  
faapalepale alofa i sesē o nisi.  
Ona tineia ai lea o lo tatou  
manatu faapito ia i tatou lava, a o  
le a faalauteleina lo tatou alofa  
atu mo nisi ma lo tatou uiga  
faapalepale.

Ua faapea mai Tavita i le salamo,  
“Ia e faatuatua ia Ieova, ma e faia

amio lelei; ia e nofo i le nuu, ma tausisi i le faamaoni.” “Ia e faatuatua ia Ieova.” E tofu le aso ma ana avega, ma ana mea e popole ma faaletonu ai; i le pe a tatou feiloai, e vave lava ona tatou fetautalatalai ai i puapuagā ma tofotofoga o loo tatou feagai ai. Ona faaopoopoina mai lea i ai ma le vao faalavelave ua tau'apoina mai, ma o le a faaalia le vao mea o loo faatuatuvaleina ai le loto, ma le tele o avega o loo mafatia ai, seia oo lava ina o le a tino mai peiseai ua le o i ai lava so tatou Faaola alofa ma le alofa

mutimutivale, o Lē o loo nofo  
sauni Na te faafofoga mai i o  
tatou mana'o, ma e fai o Ia ma  
fesoasoani silisili i puapuagā.

E i ai nisi o e ua le 'asa ma le  
popole vale, ma o loo latou  
tau'apoina mai pea faalavelave. O  
aso uma lava o loo siomia ai i  
latou i faailoga o le alofa o le  
Atua; o aso uma foi o loo latou  
faaaogāina ai le tele o Ana mea  
alofa e tusa ma Lana tausiga  
matagofie; a e peitai ua faale  
mātauina e i latou o ia  
faamanuiaga e tele o loo tuuina

mai pea i o latou luma. O loo  
latou mafaufau pea i mea  
faasoesa ua latou fefefe ai ina ne'i  
oo mai ia te i latou; po o le i ai foi  
o se faigatā o feagai ma i latou, i  
le e ui lava ina o se mea  
faatauvaā, a o le a faatauasoina ai  
lava o latou mata, ma latou le  
vaaia ai le tele o mea ua faia e le  
Atua mo i latou ua tatau ona  
latou faafetai a'e ai. O faigatā ua  
feagai ma i latou, ua le se'i  
ta'ita'iina atu ai i latou i le Atua, o  
Ia o le pogai e tasi e maua mai ai  
lo latou fesoasoani. a e peitai ua  
faavāvāmamaoina ai nei i latou

ma Ia, talu ai ona ua faatupuina ai ia te i latou le fitivale ma le faameo.

Po ua lelei ea la ia i tatou ona tatou le talitonu faapea? Ona o le a ea o le a tatou le loto faafetai ai ma tatou masalosalo vale ai faapea? O Iesu, o Ia lava o la tatou Uō; o loo manatu mai le lagi uma i so tatou lelei. 'Aua ne'i o tatou tuuina atu o tatou mafaufau ia faatigāina ma faapogisaina fua i mea faasoesa ma mea e mafatia ai o loo feagai ma i tatou i aso taitasi o le olaga. Pe afai o le a

faapena ona tatou faia, o le a le  
aunoa lava i tatou ma mea  
faasoesa e tau faatigā mai. E ao  
lava ona 'aia tatou te faamemeo i  
mea faapena, auā e na ona tatou  
femēmēai ai, ma e faavaivaiina ai  
foi i tatou, a e tatou te le maua ai  
lava se fesoasoani mo le  
tauaveina o o tatou puapuagā.

Atonu o loo e mafatia ona o ni  
faigatā ua feagai ma oe i lau  
galuega po o lou faiva; ma ua  
tauau pea ina tino mai o le lē  
manuia o lou taumafai, pe ua  
foliga foi o le a i'u ina le iloa atu o

ni au mea; a e ui lava i lea, 'aua ne'i e faalotovaivai ai; a e ia e lafoai atu i le Atua mea uma ua e mafatia ai, ma ia e to'afimālie pea ma fiafia. Ia e tatalo atu ina ia e maua le atamai e te faasaga atu ai i le faiga o lau galuega ma le faautauta lelei, ina ia faasaoina mai ai oe mai le lē iloa ma le faaleagaina o au mea. Ia e faia lava mea uma e te mafaia ina ia e maua mai se iuga lelei. Ua uma ona folafolaina mai e Iesu o Lona fesoasoani, a o lea foi fesoasoani o le a tatou le maua se'i vaganā ona ua tatou taumafai foi lava tatou. I

le pe afai ua e faia mea uma e te mafaia ma lou faalagolago atu i lo tatou Fesoasoani, ia e taliaina loa ma le loto fiafia se i'uga o le a tino mai.

E le o le finagalo lea o le Atua ina ia mafatia Lana fanau i ni avega mamafa. E le faa'ole'ole foi lo tatou Alii ia i tatou. E le o fetalai mai o Ia ia i tatou, “ 'Aua tou te fefefe; e leai ni mea faafatiātāma'i o loo i outou ala.” Ua silafia lava e Ia o loo i ai tofotofoga ma faigatā o loo lamatia ai i tatou, ma ua Na faamalamalamaina lelei

mai ia mea uma ia i tatou. Ua le faapea le faatatauga a le Atua, ia aveeseina Ona tagata mai le lalolagi o le agasala ma le leaga, a e ua Na faasino mai ia te i latou le sulufaiga e sao ai pea. E faapea le tatalo na Ia faia mo Lona 'au soo, "Ou te le ole atu ina ia e ave ese ia te i latou i le lalolagi, a ia e tausii ia te i latou ina ne'i leaga." Na Ia fetalai atu foi ia te i latou, "E maua foi outou e le puapuagā i le lalolagi, a ia outou loto tetele, ua ou manumalo i le lalolagi."

I Lana lauga i le mauga na saunia  
ai e Keriso ni a'oa'oga tāua mo  
Ona soo e uiga i lona tatau o le  
talitonu ma le faatuatua i le Atua.  
O a'oa'oga ia na faatatauina mo le  
faamalosiina o le fanau a le Atua i  
tupulaga uma lava, i le ua oo mai  
lava ia a'oa'oga ia i tatou i nei ona  
po, o loo tumu lava i le  
faamalamalamaga ma le  
faamafanafanaga. Na faasino atu  
e le Faaola i e na mulimuli atu ia  
te Ia manu felelei o le  
vānimonimo, o loo tausani i a  
latou viiga ma le leai o ni o latou  
manatu i le tausiga o i latou, auā

“latou te le lūlū saito, pe selesele.” A e ui lava i lea, ua saunia mea e ao mo le tausiga o i latou e le Tamā o le aoao o mea. Ua fesili mai le Faaola, “E le sili ea lo outou lelei i lo latou?” O Lē o loo Na tausia tagata atoa ma manu, o loo faamafola mai Lona aao e fafagaina i latou uma. E le o 'asa i Lana silafaga manu felelei o le vānimonimo. Na te le tuuina atu le mea 'ai i o latou gutu, a e Na te saunia mea e faamalieina ai lo latou mana'o. E ao lava ona latou 'oto'oto mai o fatu ua Ia faasalalauina mo i latou. E ao

lava ona latou 'aumaia ma saunia  
o mea e fai a'i o latou ofaga. E ao  
ona latou fafagaina o a latou  
toloai. E felelei atu i latou ma  
latou tausani i a latou galuega,  
auā “e fagaina i latou e lo outou  
Tamā o i le lagi.” I le “e le sili ea  
lo outou lelei i lo latou?” E le sili  
ea i lo manu felelei o le  
vānimonimo ona tāua o outou o e  
ua i ai le mafaufau ma le loto  
faaleagaga e tapuai atu ai ia te Ia?  
Pe afai tatou te faatuatua ia te Ia,  
po o le a le faamalieina ea o tatou  
mana'o e Lē na Ia faia i tatou, ma  
Le o loo Ia puipuiina o tatou ola,

ma Lē foi na Ia faia i tatou i Lona  
lava faatusa paia?

Sa faasino atu foi e Keriso i Ona  
soo fugālaau o le fanua, o loo  
tutupu a'e i le lausiusi, ma o loo  
'emo'emo mai i le matagofie ua  
tuuina atu e le Tamā faalelagi ia i  
latou, e fai ma faaaliga o Lona  
alofa i le fanau a tagata. Na Ia  
fetalai mai, “Ia outou mafaufau i  
lautalotalo o le vao, pe faapefea  
ona tupu.” O le atoatoa o le uiga  
o le matagofie o nei fugālaau, o  
galuega a le Atua, ua sili mamao  
atu lava i lo le matagofie uma na

ia Solomona. O teuga aupito matagofie ua faia i le poto o tagata, e le mafaatusaina ma le uiga 'ese ma le atoatoa o le matagofie o fugālaau ua faia e le Atua. Ua fesili mai Iesu, “Afai e faapea ona faaofuina e le Atua le vao o le fanua, o ola mai i le asō, a e lafoina a taeao i le ogāumu; e le sili ea ona faaofuina o outou e faatuatua itiiti?” Pe afai ua faapea ona faia e le Atua, le Faigaluega poto, i Lona tuuina atu o lanu eseese ma le matagofie i fugālaau e faaumatia i le aso e tasi, pe le sili atu ea Lana tausiga ma Lona

manatu alofa mai mo i latou o e  
na Ia faia i Lona lava faatusa? O  
lenei a'oa'oga a Keriso, o Lana  
a'oa'iga lava lea ia i latou uma o e  
ua i ai le loto lē faatuatua, o le  
loto lava lea e pogai mai ai le  
manatu popole, le uiga fetōa'i, ma  
le masalosalo vale.

O le finagalo lenei o le Alii mo  
Lana fanau uma, ia latou fiafia,  
ma filemu, ma usiusitai. Ua  
faapea le fetalaiga a Iesu, “Ou te  
tuuina atu ia te outou le manuia;  
o lo'u manuia ou te avatu ai ia te  
outou; ou te le avatu ia te outou

faapei ona avatu e le lalolagi.

'Aua le atuatuvaale o outou loto, aua foi tou te matata'u." "Ua ou fai atu nei mea ia te outou, ina ia tumau ai lo'u olioli ia te outou, ia atoatoa foi lo outou olioli."

O le fiafiaga ma le loto malie ua sailia i ala le tatau o le manatu faapito o le tagata mo ia lava, a e le o le ala faale Atua e pei ona faasinoina mai, e faalē mautū lelei, e fefoifoiai, e le tumau; e mavae atu ia, a e peitai le agaga, ua faatumuina i le mafatia ma le faavauvau. A e peitai le fiafia ma

le loto malie moni, e maua lea i le  
auauna atu i le Atua ma le savali i  
Ona ala. Ua le tuua le Kerisiano i  
le faaletonu o le a savali ai o ia i  
ala lē mautinoa; ua le o tuua foi o  
ia ina ia toe salamō ma faanoanoa  
mulimuli ina ua le o toe aogā, po  
o le faavauvau foi ona o ona  
faamoemoega ua le faataunuuina.  
Pe afai ua tatou le o maua fiafiaga  
o lenei olaga, a e mafai ona tatou  
vaavaai atu pea i luma ma le  
fiafia i le ola o loo tatou o lumanai  
ai.

A e peitai e maua lava le fiafiaga e tagata Kerisiano i le olaga nei i le mafutaga ma Keriso; latou te maua le malamalama o Lona alofa, ma le faamafanafanaga tumau o Lona faatasi mai. E mafai lava ona avea laasaga uma o lenei olaga ma ala tatou te faalatalata atu ai atili ia Iesu, ma tatou maua ai le malamalama i Lona alofa e sili atu ona tele, ma o le a saga latalata atu ai lava i tatou i lo tatou nofoaga tumau o i ai le manuia ma le filemu. O le mea lea, 'aua ne'i o tatou lafoaiina ai lo tatou talitonu, a ia mautū

pea lo tatou faamoemoe, ia sili  
atu ona mautū i lo muamua. “Ua  
fesoasoani mai Ieova ia i tatou, ua  
oo mai i le aso nei,” i le o le a  
fesoasoani mai lava o Ia ia i tatou  
e oo lava i le iuga. Ia tatou  
vaavaai atu i maa faamanatu o  
loo tutū i le ala na tatou savavali  
mai ai, o maa ia e faamanatuina  
ai mea ua faia e le Alii e  
faamafanafana a'i ma faaolaina a'i  
i tatou mai lima o le o loo leaga.  
Ia faafouina pea i o tatou  
mafau fau le manatua o le alofa  
mutimutivale o le Atua ua Ia  
faaalia mai ia i tatou—o loimata

ua Ia soloieseina, o o tatou tigā ua  
Ia fofōina, o popole ua Ia  
aveeseina, o le mata'u ua Ia  
faamavae 'eseina, o o tatou  
mana'o ua Ia faamalieina, ma le  
matalasi o manuia ua Ia foaiina  
mai—o le a faapea lava ona  
faamalosiina ai o i tatou mo  
ogāala o loo totoe o la tatou faigā  
malaga.

I le taua o loo i o tatou luma, e ao  
lava ona oo mai ai ia te i tatou o  
nisi faigatā fou, a e peitai e le gata  
ina tatou vaavaai atu i mea o  
lumanai, a e faapea foi ona tatou

tetepa i tua i mea ua tuanai, ma tatou faapea ifo, “Ua fesoasoani mai Ieova ia i tatou, ua oo mai i le aso nei.” “E pei o ou aso foi e faapea lou malosi.” O le a le sili atu lava se tofotofoga i lo le malosi o le a foaiina mai e tali a'i. O lea, ia tatou faasaga atu ai i le faiga o la tatou galuega i le mea lava ua tofia i ai tatou, ma ia tatou matuā talitonu, i soo se mea e tupu mai, o le a feagai lava le malosi o le a tatou maua ma le tofotofoga o le a oo mai.

Ona mulimuli ane lea, o le a  
tatalaina puipui o le lagi ina ia  
ulufale atu i ai le fanau a le Atua,  
ona pa'ū mai ai lea i laufofoga o  
le Tupu mamalu lenei  
faamanuiaga, ma o le a avea lea e  
pei o se pese e sili ona mālie i o  
latou taliga, “O mai ia, o outou ua  
faamanuiaina e lo'u Tamā, ia fai  
mo outou tofi le malo ua saunia  
mo outou a o le'i faavaeina le  
lalolagi.”

Ona taliaina ai lea o i latou o e ua  
faaolaina ma le fiafia i nofoaga o  
loo saunia nei e Iesu mo i latou. O

le a latou le toe feōa'i ai ma tagata amio leaga o lenei lalolagi, o e tāla pepelo, o e ifo i tupua, o e le mamā, o e le talitonu; a o le a latou mafuta faatasi ma i latou o e ua manumalo ia Satani, ma ua faaatoatoaina la latou amio mamā i le alofa tunoa mai le lagi. O uiga vaivai uma e tosina atu ai i le agasala, ma uiga faalē atoatoa uma sa faatigāina ai i latou i lalolagi nei, ua uma nei ona soloiesea i le toto o Keriso, ma ua tuuina atu nei ia te i latou le pupula silisili o Lona mamalu, e sili mamao atu lea i lo le pupula o le la. E le gata i

lea, a o le matagofie foi ma le  
atoatoa o le uiga ma le amio a  
Keriso, o le a pupula mai lea mai  
ia te i latou, o le mamalu lea ua  
sili atu lona tāua i lo lena  
matagofie lautua o le a ia i latou.  
Ua le ponā i latou i luma o le  
nofoālii tele e sinasina, ma ua  
latou ma tofi faatasi ma le 'au  
agelu i lo latou paia ma lo latou  
mamalu.

Ina ua tatou vaavaai atu nei i le  
manuia silisili ua saunia e fai ma  
tofi o le tagata lē ua faatuatua, “se  
a foi se mea e avatu e le tagata e

togiola a'i lona ola?" Atonu o ia o se tagata mativa, a e peitai o loo ia te ia le oa ma le tofi mamalu e le mafai e le lalolagi ona foaiina atu mo ia. O le agaga ua faaolaina, ma ua faamamāina mai le agasala, ma ua faapaiaina ona uiga tāua uma ma lona malosi mo le Atua e auauna atu ai ia te Ia, ua matuā sili atu lava le faatatau o lona tāua. E i ai le olioli i luma o le Atua ma le au agelu paia, ona o le agaga e tasi ua faaolaina, o le olioli lea e faaalia i viiga o le manumalo paia.